

Ena Apóstole Mateo májuequenehahi eta máichararacavahi em Jesucristo, ticaijare puiti eta

EANGELIO SEGÚN SAN MATEO

Ena achaneana máchucáequeneanaini em Jesús eta acane
(Lc. 3.23-38)

1 ¹Nuvaraha numetacaheya mayehe em Jesús. Éma, vijaneanahi israelítahi, taicha eta mámariéquenérahahi em viáchucaini Abraham. Énerichuvare, em Jesús rey-yarehi taicha eta mámariéquenérahahi em víyarahaini rey David. Eta juca eta nalista em máchucáequeneanaini em Jesús.

²Em víyarahaini Abraham, macachichapa em Isaac. Em Isaac macachichapa em Jacob. Em Jacob macachichapa em Judá énapa em apamuriana maparapenaveana. ³Em Judá macachichapa em Fares émapa em Zara. (Esu naena ticaijaru Tamar.) Em Fares macachichapa em Esrom. Em Esrom macachichapa em Aram. ⁴Em Aram macachichapa em Aminadab. Em Aminadab macachichapa em Naasón. Em Naasón macachichapa em Salmón. ⁵Em Salmón macachichapa em Booz. (Esu maena ticaijaru Rahab.) Em Booz macachichapa em Obed. (Esu maena ticaijaru Rut.) Em Obed macachichapa em Isaí. ⁶Em Isaí macachichapa em rey David. Em rey David macachichapa em Salomón. (Esu máenaini ticaijaru Betseba, esu mayenainihi em Urías.) ⁷Em Salomón macachichapa em Roboam. Em Roboam macachichapa em Abías. Em Abías macachichapa em Asa. ⁸Em Asa macachichapa em Josafat. Em Josafat macachichapa em Joram. Em Joram macachichapa em Uzías. ⁹Em Uzías macachichapa em Jotam. Em Jotam macachichapa em Acáz. Em Acáz

macachichapa ema Ezequías. ¹⁰Ema Ezequías macachichapa ema Manasés. Ema Manasés macachichapa ema Amón. Ema Amón macachichapa ema Josías. ¹¹Ema Josías macachichapa ema Jeconías énapa ena maparapenaveana, ena nacarataruanahi námaqueneanahi ena apavasana ticavasanahi te Babilonia.

¹²Te táequenepa eta juca, ema Jeconías macachichapa ema Salatiel. Ema Salatiel macachichapa ema Zorobabel. ¹³Ema Zorobabel macachichapa ema Abiud. Ema Abiud macachichapa ema Eliaquim. Ema Eliaquim macachichapa ema Azor. ¹⁴Ema Azor macachichapa ema Sadoc. Ema Sadoc macachichapa ema Aquim. Ema Aquim macachichapa ema Eliud. ¹⁵Ema Eliud macachichapa ema Eleazar. Ema Eleazar macachichapa ema Matán. Ema Matán macachichapa ema Jacob. ¹⁶Ema Jacob macachichapa ema José, ema suímahi esu María, máenahi ema Jesús, ema ticajare Cristo, ema vicuchapaquenehi.

¹⁷Tacahe, catorcemuriana ena mámariequéqueneanainihi ema Abraham. Ema rey David, émapa náichecuinehi eta natupa. Tacahe, ema rey David, catorcemurianavare ena mámariequéqueneanainihi. Ena nacarataruanahi námaqueneanahi ena apavasana te Babilonia, énapa náichecuinehi eta natupa. Ema Jeconías, catorcemuriana ena mámariequéqueneanainihi. Ema Jesucristo, émapa náichecuinehi eta natupa.

Eta máuchusira ema Jesús

(Lc. 2.1-7)

¹⁸Ani tacahehi eta máuchusirahi ema Jesucristo. Esu maena María, tráuripahi eta suítauchirayarehi ema José. Vuíchahasera nacachanecachahini. Ticajaripahisera ésu, mávajúechirahi ema Espíritu Santo. ¹⁹Ema José, tétavichavahi eta máuriva. Eta tacahe, vahi tisemaimahi. Váhivare mavarahahini máimicatsiriachahini esu María. Mavarahahisera macaepaha eta matratune suyehe ésu. Váhisera mávarahahini náechahini ena achaneana eta tacayemaquenehi. ²⁰Ema Viya máimararacahi eta mapanereruhi. Eta tacahe, tiúcupaicapa ema ángele mametapanahi te mavapure ema José. Ánipa máicha“:

—Tata José, tímitecanuhi numetapanavi eta juca: Vahi picueñamava eta pítauchirayare esu María. Tájina píchavaimahi. Taicha ticajaripahi ésu, mávajúechirahi ema Espíritu Santo. ²¹Tacahe, te máuchucapa ema suchichayare, enacayare eta máijareyare JESÚS. Éma ticatiuchayare ena achaneana tayehe eta naviurevanayarehini taicha eta napecaturana —máichapa ema ángele.

²²(Títauchavapahi tamutu eta juca máechajiriruvanahi ema Viya mayehe ema víarahaini profeta Isaías. ²³Ani tacahehi: “Sutiarihiyare esu amaperu esena témunahiricavaya ticajari. Ema suchichayare, yátupiqueneyare eta émaira Viya, tiúcupauchahaviyare ticatiuchahavipanayare” tacahepa.)

a 1.20: Ema ángele, eta máechajisirahi ema José, manacahi eta nayeherepi náechajisira ena israelítana. Ani macahehi: “Piti José, machicha ema David”.

²⁴Tacahe, te téjamiuchavapa ema José eta macavapureirahi, ichaperinehi eta masuapirahi eta máechajiriruvanahi ema ángele mavaneruhi ema Viya, eta máitachirayarehi esu María. ²⁵Váhisera nánecacahini te jena cájeanahi eta sucajarirahi. Tacahe, suínacapa ema suárachichahi. Nanacapa eta máijarehi JESÚS.

Náejirapana ema amuya ena reye mágoana

2 ¹Eta máuchusinehi ema Jesús te avasare ticajare Belén tayehe eta departamento Judea. Te jena año, ema Aluresi ema tayehihi rey eta Judea. Tásiha, títecanapa te Jerusalén ena reye mágoana tísihanahi te tayerehiquene avasare tinapaica te táuchusine eta sache. ²Nacayasesererupaipahi, ánipa nacahe:

—Víti, tímitecavahi eta vitanusirahi ema amuya máuchurehi rey-yarehi eyehe eti israelítana. Taicha vímahahi eta arairu jarairiqui, vémetearuhi máicutiarahi ema Viya eta máuchusinehi ema amuya rey-yare. Titupihapa eta te juca eyehe. Puiti vivarahahi véjirapanayare éma. ¿Távihapuca mávihahi ema amuya? —nacahepa.

³Te masamairiricapa ema Aluresi, ichaperinehi eta mapaneréqueneháirahi. Vaipa máurisamurehíni. Ena achaneana te tajuhe eta avasare, énerichuvare napaneréquenehahi éna apanavare eta juca téchacarehi.

⁴Tacahe, ema Aluresi máimichuhavacapa namutu ena tuparairucana énapa ena títuruequenehana eta Sagrada Escritura. Mayaserecavacapa:

—¿Távihapuca máuchusihayarehi ema vicuchapaquenehi ticajareyare Cristo? —macahepa.

⁵Éna najicapapa:

—Te Belén te tachacaya eta juca viávasa Jerusalén. Taicha tacahehi eta májurehi ema víyarahaini profetaini Isafas. Máechajicahi éma eta avasare tímícutijiricavahi eta achanénahini. Ánipa macahe: ⁶“Piti avasare Belén, tachichavihi eta Judea, picunachacarepánayare píti. Taicha eta máuchusihayarehi piyehe ema ichapequeneharehi eta maháquenucávayare. Éma, téchapajirimurihayare namutu ena vijaneana israelítana”.

⁷Tacahe, te masamapa ema Aluresi, máichuhavacapa ena mágoana. Mañajichamuripa, taicha mavaraha máechaya tájamuhupuca te tépanavainapa náimahapa eta jarairiqui. ⁸Te máechapa, mavanecavacapa éna te Belén. Máichapa:

—Eyana etanuca ema amuya te Belén. Te étupiacapuca, echava emetacanyare, apaesa nuyana núti apanavare néjirapanayare —máichavacapa.

⁹Tacahe, ena mágoana, eta nasamirahi, tiyananavarepa. Tásiha, náimahavarepa eta jarairiqui náehirupahi. Tiyanapa te namirahu. Étapa te Belén eta tatupihaiyahi, te táinahu eta mávihahi ema amuya. ¹⁰Tétavicava eta náurisamurevahi ena mágoana eta náimairahi eta tatupihairaripa. ¹¹Títecapánavanepa eta te peti mávihahi ema amuya. Náimahapa éma, ésupa esu maena María. Tásiha, tépuyucanapa natsiucapa ema amuya. Navecuhapa eta námavahuanapahi. Nájaracasichapa eta oro, eta incienso étapa eta

tájiyequene perfume. ¹²Te táequenepa eta náejirairahi ema amuya, tichavanayarepa te návasa. Apanapasera eta achene eta nayanihapahi, taicha ticametacasianapa te navapure vaipa nacuetavajica te mávihahi ema Aluresi.

Ema José ésupa esu María náimijunapa ema amuya te Egipto

¹³Tacahe, te táequenepa eta nayanirahi ena mágoana, tiúcupaicapa ema émana ángele mavaneruhi ema Viya, mametapanayarehi ema José te mavapure. Ánipa máicha:

—Pécheputa, José. Piyana piáma ema amuya ésupa esu María tayehe eta Egipto. Pinasiyare ánaqui. Tiámainucava te numetacavivare eta pichavirainapa, taicha ema Aluresi títecayare matanucayare ema amuya, mavarairahi macapacayare —máichapa ema ángele.

¹⁴Tacahesera ema José técheputa. Tétupirícavanavanepa te jena yati. Tiyananapa námapa ema amuya tayehe eta Egipto. ¹⁵Nanasipa ánaqui. Tiámainucava te tépenapa ema Aluresi, ticavanahianavarepa mayehe ema ángele eta nachavirayare. Tamutu eta juca títauchavahi eta juca mametarapi ema Viya eta te Sagrada Escritura, ani macahehi: “Te Egipto nímijunaiyahi ema nuchicha. Te táequenepa, níchuhayarepa éma”.

Ema Aluresi máimicapapajicapa ena amuyanaini te avasare Belén

¹⁶Tacahe, ema Aluresi te masamairiricapa eta nánucuiraripa ena mágoana, tise marinehi eta navayuasirahi. Máimivanerecapa nacapapajicapana namutu ena amuyana ajairana tiávihanahi te Belén énapa ena tiávihanahi te tachacayahana, ena ticayehearipa apina año énapa ena náchusirávana. Máepanaequenhapa eta táuchusihahi eta jarairiqui náimahaquenehi ena mágoana. ¹⁷Tacahe, te Belén eta táitachiravahi eta májuchaquenehi ema víyarahaini profetaini Jeremías. Ani tacahehi: ¹⁸“Tétavicavahi eta najapanuiravahi ena esenana. Ichape eta náiyairahi taicha ena suntaruana nacapapajisirahi ena nachichanaveana. Nájina naratahahini nacamatinacahini taicha eta najapanuiravahi ichape” tacahepa.

¹⁹Tacahe, te jácani año te táequenepa eta máepenirahi ema Aluresi, tiápechavavarepa ema ángele máechajicahi ema José te mavapure ánaqui te Egipto. Ánipa maicha:

²⁰—Pécheputa, José. Piveha ema amuya ésupa esu maena. Piyana pichava te piávasa Israel taicha vaipa táéñamavacare. Tépenaipahi ema tipanereuchainihi ticapacayahini ema amuya —máichapa ema ángele.

²¹Jéhesare, ema José técheputa. Tétupiricavapa, ésupa esu maena ema amuya. Tiyananapa tichavanahi tayehe eta návasa. ²²Tacahe, eta napaisirapahi eta nachavirapa tayehe eta návasa, masamairiricapa ema José eta maviravaipahi aquenuca ema Arquelao, machicha ema Aluresini. Tipicapa ema José machavahini tayehe eta Belén. Tásiha, ema ángele mápechavarepa máechajicahi te mavapure eta matupiruirayarepa te Nazaret te tinapaica Galilea. ²³Te títecapanapa, ánaqui

étapa náejasihahi. Tacahehi eta táitachiravahi eta táechajiriruvanahi eta Sagrada Escritura nájureanahi ena profetanaini eta macaijarerayarehi Nazareno ema Jesús.

**EMA JUAN TÍCACHASIRICARAHÍ TÉPANAVAPA TICAMETARAIRU ETA
MÁECHAJIRIRUVA EMA VIYA NAYEHE ENA VÁMAHICURUHANA**
(*Mr. 1.1-8; Lc. 3.1-9, 15-17; Jn. 1.19-28*)

3 ¹Tacahe, te jácani treinta áñohe, matiarihivare ema achane ticaijare Juan. Éma, máichuhaquenahi ema Viya eta macametarairuirayare, máetupiricavacayare ena achaneana. Tacahe, masuapahi eta matuparahahi. Tiyanapa vámahicuruhapa. Váipa avasarecuruhainahini. Ticametarairupaipa nayehe ena macutiqueneanahi vámahicuruhana, ticavasanahe te tachaui eta Jordán te tinapaicahi eta Judea. ²Ánipa macahehi eta máimituresirahi:

—Ítsivacha eta epanereruana. Éneuchava mayehe ema Viya, taicha márajapainapa ema aquenucayare mavaneruhi ema Viya —máichavacapa.

³Ánaquiaparipahi eta áñoana acane, ema Viya mametacapa ema víyarahaini profeta Isaías eta mapanereruhi, eta mavanerirayare ema Machicha te juca apaquehe, ticatiurahiyarehi eta tímitecayarehi. Énerichuvare matiarihiyareva ema apana achane máichuhaqueneyarehi ema Viya. Macametarairuyarehi, máetupiricavacayare ena achaneana, náinajisirayarehi eta napanereruana tauriqueneana, apaesa táuri eta najacapirayare ema Machicha ema Viya. Émaripa ema Juan, ema máechajisihaquenehi ema Viya, máetupiricavacayare ena achaneana. ⁴Ema Juan, vanairucahi me Viya, profetahi éma. Eta mamuirihahi eta náitsameru tajiyaha eta náitátiquene ticaijare camello. Eta máitijuhe, vácapi jayumepi. Eta maniriji manicasare eta tsacara. Eta matítivera eta mápama. ⁵Tiyananavare nacapayaca ena achaneana ticavasana te Jerusalén, navarairahi nasamararaca eta máechajisihaquene; énapa ena ticavasana te Judea, énapa ena tiávihanahi tayehe eta cajacure Jordán. ⁶Tacahe, eta nametauresiravaipa, navarairahivare náinajica eta napecaturana, ema Juan máicachasicavacapaipa te cajacure Jordán.

⁷Énaripa ena fariséoana énapa ena saducéoana nayanauchahivare ema Juan. Vahi náeneuchavahini, navarahahisera ticaicachasiana. Tacahe, ema Juan máichavacapa:

—¿Tájaha tacayema eta epauchiranuhi, eti tachichanaveanatataji eta quichare? Esamairiricahipuca eta járajapairayarepa eta táinheiqueneyare ecuñaraqui. Evarahahipuca iúchucuhayare. ⁸Tiuri puiti, te evarahapuca eta iúchucuha, yátupina tátupiruva eta epanereruana. Ímrecava eta ínajisiraya eta epecaturana. ⁹Váhivare ecucajamurava eta mámariequeneháirahehi ema viáchucaini Abraham. Taicha tayanapane mámariepuca éma, váhisera iúchucuhaimahi te vahi ecuitsivacha eta epanereruana. Ema Viya, tájina máemaitucaimahi éma. Te mávarahapuca, vahi máejecarachaimahi máepiyaca achaneanaina eta juca mari, mavarairainahi yátupina ena mámariequeneanaina ema Abraham. ¹⁰Ecauneuchava, taicha tiánehipa eta táitecapauchirahaviyare eta ecuñaraqui nayehe ena achaneana

máitucarahanahi téneuchavana, váhivare náitsivachahini eta napanereruana. Tímicutijirícavaipa te máechucayarepa ema achane eta yucuqui máhíreana. Tícaechuyarehi tamutu eta tapareana. Tíjuyarehi. ¹¹Yátupi níti nícachasicahéhi te une, te éneuchava mayehe ema Viya. Ávanepaipahisera mácani ema yátupiquene Cristo. Te yátupina ecasiñava mayehe, tícachasicahéyareva; tíjaracahéyareva ema Espíritu Santo. Téhesera vahi ecucasiñavapuca mayehe, tícuñacahéyare tayehe eta tájjurequene yucu. Éma, ichapequenehi nuyehé níti. Váiparinehi nácutinasimahi eta máitupajijiasiravahi. Váiparinehivare nácaemuñavaimahi macamusuranuhini níti páuresami. ¹²Puítí éma márjapainapa tinerejiricainapa nácani yátupiqueneana téhicana. Máunacainapa éna. Ticutinapa mácani achane te tíacatayajirica eta arusu. Máunacainapa. Tásiha, máquijicapa eta tapiraquiji. Máijuchayarepa te yucu. Eta nacaheyare ena máurirahanahi, tíjuanáinapa te yucu, máitvacacayarehi eta namuruira —máichavacapa ema Juan.

Eta macaicachasirahi ema Jesús

(Mr. 1.9-11; Lc. 3.21-22)

¹³Tacahe, títecapavarepa ema Jesús te cajacure Jordán te mávihahi ema Juan. Éma, másihapahi te tinapaica eta Galilea. Mavarahahi tícaicacasiyare mayehe ema Juan. ¹⁴Émasera ema Juan, vahi mávarahahini máicachasicahini. Ánipa macahe:

—Tata Jesús, nítira táuricahi nítivaina pícachasicanu. Nusapihapa níti picaijuhenuhi eta nícachasicaviya —máichapa.

¹⁵Émasera ema Jesús majicapapa:

—Tájjinachucha táichava. Ticamunucarehi nítauchayare eta mavarahaquenehi ema Nucaiyaquene —máichapa.

Tásiha, ema Juan tísapavapa. ¹⁶Te tamutupa eta macaicachasirahi ema Jesús, tíucupaicapa tayehe eta une. Tásiha, tíjahúchavapa téjiaca eta anuma. Máimahapa ema Espíritu Santo tíucupaicapaipahi, mavasimahi paipa eta paloma. Tavenesicapa ema Jesús. ¹⁷Tacahe, tíáramicarepa eta mahu ema Viya tásihaquenehi te anuma, ánipa macahe:

—Ema maca ema yátupiquenehi nuchicha némunaruquenehi. Tétaví-cavahi eta núrísamurevahi máicha —macahepa.

Ema Váinaraji Satanás mavaraha macaitsamaraji ema Jesús

(Mr. 1.12-13; Lc. 4.1-13)

4 ¹Tacahe, ema Espíritu Santo enurujipa máimitucaipahi ema Jesús eta mayaniraya te mávapahi apaquehe. Ánaqui macuchapayarehi eta máitsamarajiyare ema Váinaraji. ²Tájina manicahini ema Jesús te jena cuarentaquenehi sache, cuarentavare yati eta mayerevahi. Ichapepa eta máecuavahi. ³Tásiha, ema Váinaraji témeñahavapa mayehe. Mavarahapa macaetemayarehi. Ánipa máicha:

—¿Pécuhapa píti? Tacahe, pivaneca eta juca mari táepiyacava pan, taicha píti machichavihi ema Viya, ¿masi? —máichapa.

⁴ Ema Jesús majicapapa:

—Váhipuca pecha eta táechajiriruvahi eta Sagrada Escritura, ani tacahehi: “Vahi tacarichuimahi eta tinicacare ticaitarecayare ena achaneana. Tacachaneyarehi eta máechajiriruvana ema Viya. Jéhevare, éta ticaitarecarahiyare” macahepa.

⁵ Tásiha, ema Váinaraji mámavarepa tayehe eta tacapicahuquene avasare Jerusalén. Máimiapanapa te táinahu eta Templo. ⁶ Tásiha, máichapa:

—Te yátupina machichavina ema Viya, písapavayare pémirica te apaquehe. Tájina píchavaimahi eta pémirisirayare. Pécharichuhi eta táechajiriruva eta Sagrada Escritura, ani tacahe: “Ema Viya mavanecapa ena mayeheana ángeleana téchapajiricaviana. Tiámavianayare te navahuana, apaesa vahi picucayutetu eta máriana eta te pipaisirayare” tacahepa. Tásiha, németeaca tijaneacavianayare puiti, vahi náisapaimahi picajara te pémirica —máichapa ema Váinaraji.

⁷ Tacahe, ema Jesús majicapavarepa:

—Énerichuvare ani tacahe eta Sagrada Escritura: “Vahi picaitsamara-jimahi ema Viya, taicha Piáquenuhi éma” —máichapa.

⁸ Tacahe, ema Váinaraji mámavarepa te táinahu eta anuquehe mari cerro. Máimechapa tamutu eta ichapequeneana avasareana te juca apaquehe ticutirinehi tacachacayajiricacahini taicha eta máitupajijia-siravahicacha ema Váinaraji. Máimechavarepa eta ichapequeneana náimahaqueneana ena achaneana. ⁹ Tacahe, máichapa:

—Núti njaracaviyare tamutu eta juca avasareana. Pftina náquenuvina ena távacuanahi eta avasareana. Pépuyucanumasera te numirahu. Pitsiucanu apaesa njaracavisarepa tamutu —máichapa ema Vainaraji.

¹⁰ Émasera ema Jesús majicapapa:

—Pévuisihatataji piti Satanás te juca numirahu. Váhipuca pecha eta táechajiriruvahi eta Sagrada Escritura. Ani tacahehi: “Macarichu ema Viya vépuyumirauchayare. Macarichuvare vicaemataneacayare” tacahepa. Váhiquene táurica nucaemataneacavihini —máichapa ema Jesús.

¹¹ Tacahe, ema Váinaraji térajicavapa. Majunijicapa ema Jesús. Tásiha, tiúcupaicanapa ena ángeleana, náechapajiricapa ema Jesús.

Ema Jesús tépanavapa ticametarairu

(Mr. 1.14-15; Lc. 4.14-15)

¹² Tacahe, te jena sácheana, nacaratacapa ema Juan. Námapa te jácani tayerehiquene. Tacahe, ema Jesús, eta masamairirisirapa eta macaera-tairahi te cárcel ema macheji Juan, tiyanapa tichava te mávasa Nazaret te Galilea. ¹³⁻¹⁷ Váipasera mánasihini te majurusinehi. Tiyanapa tayehe eta avasare Caperaum. Éta máejasihahi. Eta juca avasare távihahi te

tachausi eta cáquiure Galilea. Eta macametarairuirahi, tamutuhi mapaica eta tinapaica eta provincia Galilea^b

—Éneuchava mayehe ema Viya. Ítsivacha eta epanereruana, taicha tiánehi eta sáchehare tímerecavaya eyehe ema ticatiuchaheyare. Aquenucayare mavaneruhi ema Viya, téchaheyare éma —máichavacapa.

Eta juca títauchavahi eta májureanahi ema víyarahaini profeta Isaías, ani tacahehi: “Tiúricacareanainapa ena achaneana cávasanahi te tachausi eta cáquiure Galilea tayehe eta provincia Zabalón étapa eta Neftalí, namutu támairiaca ena ticavasana te apachara eta Jordán. Éna, tiyerehi eta nacatajivairanahi, tacuti eta tavayureva eta tamapicuva. Puftisera máitecapauchavacarihiri ema timícauchamurihi. Ticatiuchavacayarehi tayehe eta nacatajivairahi. Éma, tétumechavacahivare eta mamícauchiravacahi” tacahepa.

Ema Jesús máichuha ena cuátroqueneana ténicarahiana, máimitureanayare
(*Mr. 1.16-20; Lc. 5.1-11*)

¹⁸Tacahe, eta mapaisirapahi ema Jesús te tachausi eta cáquiure Galilea, máimahavacapa ena apinana ajairana, ema ticaijarehi Simón Pedro émapa ema maparape Andrés. Eta náematanerepi ena nani, ténicarahanahi. Náquijirecahi eta nayehe tarrafa. ¹⁹Tacahe, ema Jesús máichuhavacapa:

—Yare, éhicanu. Núti nívaracaheyare eta apana ématanerepiyare. Éti ítucavaparacahi eta jímana; tacaheyare eta ítusiravayareva ena achaneana, machaneranayare ema Viya —máichavacapa.

²⁰Enevanepa náinajicapa éna eta náenisirahi. Tiyananapa náehicapa ema Jesús.

²¹Ánaquipanavarepa máimahavarepa ema Jesús ena apinana ticaparepecácanavare: ema Jacobo émapa ema Juan. Téjacanahi te napacure. Matiarihihivare ema naiya Zebedeo. Náititijiricahi eta nayehe tarrafa. Ema Jesús máichuhavarepa. ²²Enurujipa náehicavare. Nanaquicavarepa eta napacure, émapa ema naiya. Najunijicavarepa.

Ema Jesús máimitucavacapa ena camuriqueneana achaneana
(*Lc. 6.17-19*)

²³Eta mapaisirahi ema Jesús tayehe eta avasareana te Galilea, máimitucavacapahi ena achaneana te sávarumuhuana tayehe eta náurujisirarevana. Mavanecapa eta náeneuchiravaina taicha tiánehipa eta sáchehare tímerecavayare ema ticatiuchayare, ema aquenucayare mavaneruhi ema Viya.

b 4.13 Ema profeta Isaías, ánvare macahehi eta máechajisihairahi: “...étaripa eta provincia táviha náitecapihahi ena apavasanana”. (Acane eta juca apaquehe, apina eta apana tájareanaini: eta Zabalón étapa Neftalí.) Eta máimitusiravacahi ena achaneana, ánpa maicha ema Jesús:

Énerichuvare ema Jesús macanaracapahivare tamutu eta apanapanequeneanahi jumareana eta najumanapahi ena achaneana. ²⁴Tacahe, nasamairiricapa ena achaneana ticavasanahi eta tasimutuqueneana avasareana te tinapaica eta Siria. Tásiha, námavacapaipa ena nacajumaqueneana, apanapanenejiquenehi eta najumana, nacatiruhavanahi. Énaripa ena návaháruanahi ena éreanana, ena tirapapasiana, énapa ena muracaquihana. Namutu ena nani, macanaracavacapai ema Jesús. ²⁵Tacahe, camuriana ena achaneana téhicanahi éma. Éna, tiásihana te Galilea, te Judea, te Jerusalén, te avasareana tinapaica eta Decápolis, étapa te apachara eta Jordán.

Ema Jesús máimitucahi nayehe ena ticunachacareanahi me Viya
(Lc. 6.20-23)

5 ¹Tacahe, eta máimairavacahi ema Jesús ena camuriqueneana achaneana, tiápanapa tayehe eta anuquehepahi apaquehe taicha tiúripanahi eta nasamararasirayarehi ena achaneana. Téjacaripa éma, énapa ena máimitureana nachayacaipahi. ²Ani tacahehi eta máimiturapianahi:

³—Ena náimatíhi eta tacamunuqueneanahi eta náchanevana, tétaví-cavahi eta náuricacarevaya taicha máejerare eta najacapirayare eta máechajiriruva ema Viya, machaneranayarehi.

⁴Ena nani tijapanujiricavanahi, tétavícvahi eta náuricacareva taicha émaripa ema Viya macurisamurechavacayare.

⁵Ena nani tisuapajirahianahi me Viya, mánsuanahi mayehe, tétavícvahi eta náuricacareva taicha máijararuanayare eta arairu apaquehe náicuchihi me Viya.

⁶Ena nani, ichape eta najamurachirahi eta náítaresirahi eta matapiravacare te mamirahu ema Viya, tétavícvahi eta náuricacarevaya taicha máijaracayare éma eta navarahaquenehi.

⁷Ena nani tijapanurahianahi nayehe ena apamuriana achaneana, tétavícvahi eta náuricacarevaya; taicha ema Viya, éma apanava majapanuvacayare éna.

⁸Ena nani vahi náisapajirícvahíni tahapapicahini eta náehisirahi ema Viya, tétavícvahi eta náuricacarevaya; taicha éna, títecapanainapa te mamirahu ema Viya, náimarracainapa éma.

⁹Ena nani ticonsejarahianahi nayeheana ena achaneana, nacaepahairahi eta semanereana, tétavícvahi eta náuricacarevaya éna; taicha máimereuchainapa ema Viya eta machichairavacahi éma.

¹⁰Ena nani ticatajivanahi eta nacatianacasivahi nayehe ena achaneana te juca apaquehe táichavenehi eta táurivahi eta náítaresirahi, tétavícvahi eta náuricacarevaya; taicha éna aquenucarahanaya majupahanayare ema Viya.

¹¹⁻¹²Eti nuchaneranahi, járajapainapa eta sache eta nacatianasiraheya ena achaneana táichavenehi eta éhisiranuhi. Tipanararachaheanainapa, tépiyaequenehaheanainavarepa. Váhisera ecuarami eta juca. Ene nacahehi eta nacatajivairahi ena profetanaini, ena náinapureanahi machaneranahi ema Viya. Eta tacahe, te nacatianacahepuca, ¡ecurisamurechavachucha,

evapinavachucha! ¡Tétavicavahi eta iúricacareva taicha ejacapayare eta ícuchiya te anuma, taicha ichape eta macunachirahehi ema Vía!

Emá Jesús tímitucahavi eta vicamunucareravayarehi tacutihi eta tacamunucarevahi eta icheve, étapa eta tijarahi

(Mr. 9.50; Lc. 14.34-35)

¹³Eti ímiyanavayare eta ecamunucareravahi nayehé ena achaneana, tacutihi eta tacamunucarevahi eta icheve. Vahi tacuepaha eta ecamunucareva. Vahi ecucuti eta tajachira eta icheve, taicha tájina eta táichevainahíni. Tásiha, nájinapa ticamunuimahi. Náepuruinapa namutu.

¹⁴Tacutiqúene éti ecutihi eta tijarahi. Éti, namicahuyarehi namutu ena achaneana eta ímitusiravacaya, apaesa náinajica eta náehisirahi eta tauriqueneana. Ímereuchayarehivare eta iúriya, ecutiya eta avasare tiáviyahí te tajirumane eta anuquehe mari. ¹⁵Tacutiqúene, vahi ecucuti nácani súnsuana tiyustacanahi jácani lámpara, tásiha nanacapapucaini te tajuhe eta cajune, nayumurusihahini. Nanacayarehisera te anuquehe apaesa náimairircasarepa namutu ena tiávihanahi te peti, tamicaureanayarehi. ¹⁶Ene ecaheyare éti, ímerecayare eta ejaraivayare nayehé ena achaneana apaesa eta náimairinahí eta táuriqueneana íchaqueneanayare; tásiha nacunachainapa ema Tata Vicaiyaquene tiáviyahí te anuma.

Emá Jesús tímitucahavi tayehé eta tasuapacarevahi eta Sagrada Escritura

¹⁷Vahi étaina tímitecanuhi núti nucaepahahini eta mavanairipiana ema víyahahini Moisés, étaripa eta náimiturapianaini ena profetanaini. Eta tímitecanuhi núti, níminecapaqueñahehí te anuma. ¹⁸Nutupiriva numetacahe: Títauchavaya tamutu eta máechajiriruvana ema Tata. Tímiyanava eta tasuapacareirahi nayehé ena achaneana tamutu eta Sagrada Escritura. Tájina ticaepahaimahi, tayanapane táitavapuca eta anuma étapuca eta apaquehe. ¹⁹Eta tacahe, nácani tépuruanayare eta tavanairipianahi eta Sagrada Escritura, jácani ánichichaquenehi, vahi tisiapanaimahi te anuma. Tavetijipa te náimitucapuca ena apamuriana eta náepuruiraya. Nácanisera tisuapanayarehi, tímiturecanahivare eta juca nayehé ena apamuriana achaneana eta náehisirahina; éna, ichapeyare eta nacunachacarevayare eta nasiapiraipa te anuma. ²⁰Táicha te evaraha ítujicava esiapa te anuma, tacamunuhi tiápajucavaya eta táurivahi eta eyeherepiana éti, ecachuricayare eta nayeherepianahi ena escribánoana, énapa ena fariséoana.

Emá Jesús tímitucahavi vahi tacunasi te visamure eta vismaneña

(Lc. 12.57-59)

²¹Eti écharichucha eta nayeherepiana ena íachucanaveanaini ani tacahe: “Vahi ecucapaca mácani piparaepiya; taicha mácani ticaparecahi, ticaicuñayarehi”. ²²Nútisera numetacahe eta apana: Mácani tisemahi mayehé ema maparape, énerichuvare ticaicuñayare. Mácani tíumehahi ema maparape, ticayaserehiyare

te namirahu nácani tuparairucanahi tayehe eta avasare. Tacutiquene mácani ticaecahihi ema maparape, mávacuhaipahi eta ecuñaraqui tayehe eta infierno.

²³Eta tacahe, te piámaphi eta piámavahu te mamirahu ema Viya, tásiha, péchapanainapapuca eta pitapiravahi mayehe ema piparape. ²⁴Vuíchaha picuiyarucaha eta piámavahu. Tativanumayare piyaseapanaya eta perdón ema piparape. Pétupiricanumayare tativa eta píchavaquenevahi mayehe éma. Táuricasarepa pichava píyaracuhapanainapa eta piámavahu te mamirahu ema Viya.

²⁵Tacutiquene te matiarihyarepuca mavaraha mametauchavi te namirahu ena tuparairucana, vahi picucuchapa mametauchavi. Tativayare pétupirica eta píchavaquenevahi mayehe, mapurare vuíchaha picaeratahini mayehe ema juez tayehe eta cárcel. ²⁶Taicha te náimisiapavipa tayehe eta cárcel, ticajeraequenénapa eta piúchusiraya.

Ena Jesús tímitucahavi vicuneuchavaya eta jácani táimiaquipaicahavi tayehe eta pecatu

²⁷Énerichuvare écharichuhi éti eta náimiturapihi ena iáchucanaveanaini: “Vahi ecuveha esu apana esena”. ²⁸Puítisera nútí numetacahe eta apana: Mácani majamurachahi esu apana esena, ticapecaturaipahi te masamure taicha eta majamurachirahi. ²⁹Eta tacahe, eta iúquiha váure, te tavarahapuca tímiaquipaicahave tayehe eta pecatu, tavarairahi táimahayare eta tauriqueneana tájiparacana, tiúripa evecuhaulquichava iáquijicaya. Taicha tiúripanahi táejiacava ánichichaina te iáquehe, váhisera tacuimicuñacahe eta te yucu infierno, tamutupahi eta iáquehe. ³⁰Étaripa eta evahu váure, te tavarahapuca tímiaquipaicahayare tayehe eta pecatu, tapamisirahénapapuca íchayare eta tauriqueneana, tiúripa eyuchatica iáquijica. Taicha tiúripanahi táejiacava eta evahu, váhisera tacuimicasiapahe támutu eta iáquehe tayehe eta yucu infierno.

Ena Jesús manacahi eta máimiturapi nayehe ena tñajicacana (Mt. 19.9; Mr. 10.11-12; Lc. 16.18)

³¹Énerichuvare ena viáchucanaveanaini náisapahi eta máejerare eta máinajisira mácani achane esu mayena. Ani nacahehi: “Mácani tñajicahi esu mayena, máemepiyarecahi eta ajumeruca táechajisihayarehi eta máinajisiraya esu mayena”. ³²Nútisera numetacahe eta apana: Mácani achane, te máinajicapuca esu mayena, ticapecaturaipahi me Viya. (Váhinénipuca sucaecahihini mayehe ema apana achane.) Énerichuvare te tiápechavahipuca ticaima ésu, tamuriacahi ésu eta maviurevahi ema suima. Tásiha, mácani arairuhi suima, émapa tamuriacahi eta máejecapiravahi taicha eta mavirahi esu esena sucaimaquenehi.

Ena Jesús tímitucahavi eta vahi vijirachaimahi

³³Énerichuvare esamairiricavare eta náimitucasivahi ena iáchucanaveanaini: “Machu vahi ecuitaucha jácani ejurachirahipuca. Yátupinasera eta ítauchiraina tamutu eta íjarasiravahi me Viáquenu” nacahepa.

³⁴Nútisera numetacahe éti: Vahi táuricahini íchahini eta juramento. Vaipa échajisihahini eta anuma taicha éta, mávacurehi ema Viya. ³⁵Váipavare échajisihahini eta apaquehe taicha éta, macaematanéyahi éma. Váipavare échajisihahini eta Jerusalén, taicha éta, mávacureyarehi ema yátupiquenehi Rey, mavaneruyare ema Viya. ³⁶Váipavare échajisihahini eta ejurachirahi te echuti, taicha vahi áratahaimahi ehapamaichahini, ítsivachirahini eta táimahi, tijapupuca, tiquisapuca. ³⁷Numetacahe: Te tatiarihipuca eta íjarasiravayare, átupiruva ácahe: “Tiuri”. Te váhipuca evarahahi, átupiruva: “Vahi” ácahe. Te émunahacavapuca ejuracha, ema Váinaraji títurucatheripa.

Ena Jesús tímitucahavi eta vahi vicusema ne nácani ticaetemajiricahaviana
(Lc. 6.29-30)

³⁸Énerichuvare esamairiricahi eta acane: “Mácani achane téhararecahi mapuchuquichahi ema apana achane, énerichuvare éma napuchuquichayareva ena tuparairucana. Te macavetuquiahechahipuca, énerichuvare nacavetuquiahechayareva ena tuparairucana”. ³⁹Nútisera numetacahe: Vahi ecujicapa te masema mácani achane váinarajihí. Tiúripána, te náchahepuca nácani te emira, íjaracayare eta apachacaya eta emira. ⁴⁰Tacutiquene, te natiarihipuca ena timetauchaheana, navaraha naverejicahe eta ecamisa, vahi ecusema. Váhivare ecujicapairihí. Íjaracavare eta apana eta epacuha. ⁴¹Ísapayare te nácani navanecahepuca eta enaracureca eta tijitacare. Te navaraha iámina étanaina kilómetro, evapinava eta eservichiravacaina. Vahi ecobrachavacaimahi. ⁴²Mácaniripa tájahapuca mayaseacahe, íjaracayare. Vahi ecueñamiha mácani ticapucahe eta ecayehequeneana.

Ena Jesús tímitucahavi eta vémunasirayare nácani ticitianacahaviana
(Lc. 6.27-28, 32-36)

⁴³Énerichuvare esamairiricahi eta acane eta námitucasivahi ena iáchucanaveanani: “Émunasirahi nácani témunacaheanahi. Tásiha, ecatichayarepa nácani ticitianacaheanahi”. ⁴⁴Nútisera numetacahe: Émunacayareva nácani ticitianacaheanahi. Eyaseaca ema Viya eta nayujarahuina nácani téchajicanahi eyehe. Ímereca eta iúriava nayehe nácani ticatichaheanahi. Eyujaraucha nácani tiúmehaheanahi ticaetemajiricaheanahi. ⁴⁵Te itaucha eta juca, éta tímereuchaheyare eta machichahéirahi ema Vicaiyaquene te anuma. Taicha éma nájina manerejiruina, namutu máemunacavaca: ena achaneana váinarajiana, énapa ena tiúriana. Éma, tíjaracahavi vimutu eta sache vimícahuhi, étape eta tiquiva. ⁴⁶Éti, tájina ecunachacarevaina eta me Viya, te nacarichuhi émunaca nácani témunacaheanahi éti. Apanasica ena tisipecaturarahiana náichahi eta juca. ⁴⁷Tacutiquene, tájinavare ecunachacarevaina eta me Viya, te iúriyare nacarichuhi ena eparapenevanahi. Apanasica ena máimatirahanahi ema Viya tiúrianahi eta nayehe ena naparapenevana. Étisera tatuparacahe ecachuricayare eta iúriava. ⁴⁸Tétavicavasareya eta

iúri va nayehe namutu. Vahi enerejicaimahi ena achaneana. Váhivare eyavainaimahi eta iúri va. Ecutiyare ema Vicaiyaquene te anuma eta máurivahi.

**Ena Jesús tímitucahavi eta vahi vicusiñavavaicapa
eta víchira eta táuriqueneana**

6 ¹Eta ecajirayare ena páureana, échapavayare. Ema Tata Vicaiyaquene, tájina ticunachahemahi te evarahapuca náimaha ena achaneana eta ecajirahi, evarairahi ticunachaheanayare. Tájinavare máitsirijicavahini éma eta eyehe. ²Eta tacahe, te ímicatacayarepuca nácani ticamunuvanahi, vahi ecumetajirica. Vahi ecucuti ena apimirana timetajiricanapa te víurujisirarevana, téhepa te anecapahiana. Eta juca náichahi, navarairahi ticunachacareanayarehi nayehe ena achaneana. Nútisera numetacahe: Ena nani ticaheanahi, tájina nacunachacarevaimahi me Viya. ³Te jácani píjaraca nácani ticamunuvanahi piyehe, vahi picumetajirica. Váhivare picumetaca nácani pémunacasareana. ⁴Piñajichayare eta píjarasirayare nácani píjaracasiruyare. Tacahe, ema Tata Vicaiyaquene te anuma máimararacahi tamutu. Jácani píchaqueneana tayumurevana, éma títsirijiequenehayare, tíjaracaviyare eta pícutihi.

**Ena Jesús tímitucahavi eta viyujarasirayare
(Lc. 11.2-4)**

⁵Te eyujaracahi, vahi ecucuti ena apimirana tiyujaracana te víurujisirarevana, téhepuca te anecapahiana. Titupihanahi éna eta nayujarasirahi, navarairahi náimararacayarehi ena achaneana. Nútisera numetacahe: Tájinachucha nacunachacarevaimahi me Viya. ⁶Étisera ani tacaheyare te eyujaraca. Esiapayare te eyehe cuarto, ératacayare eta tapaja. Eñajichavayare eta échajisirayare ema Tata Vicaiyaquene. Éma, tímararacahavihi; masamayarehi eta piyujaracasa.

⁷Tacuti quene, váhivare ecuapepirica eta ecayemaqueneanayare. Vaipa tácomesahini eápepiricahini eta eyujarasirahi. Vahi ecucuti ena máimati-
rahanahi ema Viya. Tiúpiemanapa eta nayujarasirahi, náimijachaipa tisamacareanahi mayehe ema Viya. ⁸Vahi ecucuti éna, taicha ema Viya máimati-
ripahi éma jácani vivarahaquenehi viyaseaca. ⁹Éti, ani tacaheya eta eyujarauchiravaina: Tata Vicaiyaquene, piti piáviha te anuma, vipicauchahi yátupi eta píjare. ¹⁰Vivaraha ichapeina eta tasuapacarevaina eta pivana-
iripiana nayehe namutu ena achaneana ani te apaquehe, tacuti eta nasuapiravihi ena ángeleana te anuma. ¹¹Pájapanuhavi píjaracahavi puiti jena sache eta vicamu-
nirava eta vinicaqueneana. ¹²Pájapanuhavi piperdonachahavi eta viviurevana piyehe, tacuti eta viperdonachira víti ena ticaviurevana viyehe. ¹³Vahi picuisa-
pahavi eta vicha eta tauriquene. Picatiuchahavivare mayehe ema Váinaraji. Taicha píti yátupiquenevihi Viáquenuvihi. Nájina pácuti eta pítipajijiasiravahi. Máichecuaraquire eta pijaraivahi. Amén.

¹⁴Taicha te yátupihí eta eperdonachirahi nácani ticaviurevanahi eyehe, ema Tata Vicaiyaquene te anuma tiperdonachaheyare éti apanava. ¹⁵Téhesera te vahi eperdonachahi ena ticaviurevanahi eyehe, ema Tata Vicaiyaquene váhivare tiperdonachahémahi eta éjcapiravanahi éti.

Emá Jesús tímitucahavi tayehe eta ayuna

¹⁶Tacutiquene, te ayunahepuca, vahi ecájapanuramiraimahi te namirahu ena achaneana. Vahi ecucuti ena apimirana ena tímicae-cherachavanahi eta ayunairanahi. Núti numetacahe: Tájinachucha nacunachacarevaimahi me Viya. Éma, váhivare títsirijicavaimahi eta nayehe. ¹⁷Étiserá, te ayunahepuca, ímíyanava eta esípauquichiravaya, etatasicavavare, apaesa nacuija nacuimatiacahe eta ayunairahehi. ¹⁸Emá Tata Vicaiyaquene tímararacahehi tamutu eta esamureana. Tisamacareyarehi eta eyasearúhi.

Emá Jesús tímitucahavi eta vahi vicuisapava vicasamure eta vímahaqueneanahi
(Lc. 12.33-34; 11.34-36)

¹⁹Váhivare tacuavasamurerecahe eta ímahaqueneana te juca apaquehe. Eta juca ticamítiequenehacareana taicha eta tajararesira eta cachusiri, étapa eta táichasivayare. Natiarihivare ena tíámeyechaheanayare. ²⁰Epanerechaserá eta ecaimahaqueneraya te anuma. Ánaqui jararihi eta táitsivayare eta íchirahi eta táuriqueneana te juca apaquehe. Ánaqui, tájina cachusirina, nájinavare tíámerahina tayehe. Tájina témitia-caimahi. ²¹Éti, te ecasamurepuca eta ímahaqueneanahi te juca apaquehe, evarahahi enasiyare te juca. Vahi ávarahahini ejunijicahini eta ímahaqueneana. Téhesera te ecasamurehichapuca eta ícuchiana te anuma, ánaqui evarahayare eyanavaneyare.

²²⁻²³Tacutiquene, ecuneuchava, machu tacuetaviuchava eta ejamurachira eta ímahaqueneana. Ecaratacava, vahi ecuisapa tahapasamurechahe eta ecaimahaquenerahi. Taicha te tahapasamureruhepupuca eta ímahaquene, tétavicavahi eta tamapicuvahi eta te iáchanevana. Téhesera esuapa eta nímiturapiana, tétavicavahi eta tamicauchiraya eta iáchanevana, tímijunijicayare eta emaurivahi, étapa eta ejamurachiravahi eta ímahaqueneana. Eta tacahe, machu ísapava tayanariana eta timapicu eta te iáchanevanasami. ¡Páurehesami éti te ísapavapuca tanasipa!

²⁴Tacutiquene éti, eta ítaresirahi, vahi táuricahini apinanainahini ena iáquenuana. Taicha émunacapanayarehi ema émana, tisuapacarepanayarehivare; tásiha ema apana, apaesarineya eta émunasiraya, váipainapa tisuapacaremahi éma. Ene tacahehi eta juca ímahaqueneana, vahi ecuisapa tahapasamurechahe eta plata, machu tahapapirica eta émunasirahi ema Viya, étapa eta ecaemataneasirahi éma.

**Emá Jesús tímitucahavi eta majaneasirahavihi emá Viya viti
machichanaveana
(Lc. 12.22-31)**

25-26 Étasera nuvaraha yátupina eta ecasiñavairaina mayehe emá Tata Vicaiyaquene. Vahi ecucañamaracavaicha tayehe eta enicaquenerepi étapa eta emuiriharapi puiti juca ítaresiraichaha. Eta enicaquenerepi, étapa eta emuiriharapi, tájina táeñamavacarevahini. Ímararacarichuhi eta cáyureana. Vahi táevacahini, váhivare táechatijiricahini, táunacahipucaini eta tanicaqueneyare. Émasera emá Tata Vicaiyaquene máechapajiricahi, májjarasirahi tamutu eta tanicaquenerepihana. Evetijipa éti, íapajupanavahi eta éñamacarévahi me Viya tayehe eta cáyureana. 27 Tájina táuricahíni eta éñamiravahi eta júcana. Éti, nájina tiratahaimahi étijivainahini ecajúrucavahini, tayanapane tahapasamurechahehipuca.

28 Tacahe, ¿tájaha tacayema tihapasamurerecahehi eta emuiriharapi? Ímararacarichuhi eta tajurusirahi eta flúreana, vahi tacañamaracavahini tacaematanehini, tájijurecahipucaini. 29 Táitsivahisera, te tépunchapa, tétavica-vahi táurinavahi eta taflurene. Nájina tácuti eta nacamuirihaira eta táurinava, émaripa emá víyahaini rey Salomón eta tajananusira eta macamuirihairahi. 30 Apanasichahi, emá Viya májjaracahi eta táurinavahi, ánipirichuhinéni eta táítaresirahi. Evetijipa éti eta máechapajirisirahehi, májjarasiraheyarehi eta emuiriharapi eti achaneana. ¿Tájaha tacayema vahi ácasiñavahíni eta mayehe? 31 Eta tacahe, vahi ecucañamaracavaicha tayehe eta enicaquenerepihana étaripa te echuririacapuca eta une érayare, váhivare eta emuiriharapi. 32 Ena achaneana vahi náimatihini emá Viya, ichapemurihi eta tacañamarasiravacahi eta júcana. Vahi nácasíñavahini mayehe emá Viya, nacuchapahipucahini eta májjararuyarehi éma. Étísera, écharine eta mararirahira emá Ecáyaquene te anuma. Máimatihí éma tamutu eta ecamunuqueneana. 33 Tásihasera éti, tativyare íjaracava ecaemataneacaya emá Viya, ecasamureirahi eta ítauchirayare tamutu eta mavarahaqueneana. Tihapasamurechaheyarehivare eta tátupiruvairaya eta ítaresira, ecurisamurechirayare éma. Máimaharinepa éma. Tíjaracaheyare tamutu eta juca ecamunuqueneana. 34 Eta tacahe, ácasíñava mayehe éma. Vahi tacuimipanerechahe eta íchararacavayare achichu. Puiti ecuchapaipa eta máimicatasiraheyare. Ímíyanava eta ecuchapirayare eta máimicatasiraheya.

**Emá Jesús tímitucahavi eta vahi vicunemahi eta nájecapiravana ena
apamuriana achaneana; vicuneuchavasera víti
(Lc. 6.37-38, 41-42)**

7 1 Vahi ecunemahi eta nájecapiravana ena apamuriana achaneana, váhivare ecucaecahivaca, machu étaina táimicuñacahe me Viya. 2 Te ecunerahipuca nayehe ena apamuriana achaneana, ecaheyare éti eta macunerahéna emá Viya tayehe tamutu eta éjecapirávanahi éti.

³Piti ajaira, pítipa piti esena, vahi táurica eta picunerahi eta ánichichaqueneana náejecapiravanahi éna. Tituparacavi pítijivaina picuneuchava eta táichapeva eta péjecapirava. ⁴⁻⁵Vahi tatuparacavimahi pétupirica eta jácani náejecapiravahi ichipichuana ena piparaepiyana. Tájina piviyahini eta piconsejachihamahi. Ichapesera eta tatuparasiravihi pétupirica eta péjecapiravanahi píti. Tapaenumava pétupirica eta píchavaquenévani, táuricapaini piconsejacha ema piparaepiya tayehe eta máichavaquenévahi.

Ena ticaecahirahiana, vahi vicuijaraca jácani téñamacareana

⁶Vahi ecuimituca eta máechajiriruvana ema Viya nácani achaneana ticaecahirahiana, taicha váiparinehi náuricaimahi. Machu étaina táemehahe. Váhivare ecuijaraca jácani téñamacareana, machu nácatayajica.

Vahi vicuyacuji eta viyaseasiraina ema Tata Vicaiyaquene

(Lc. 11.9-13; 6.31)

⁷⁻⁸Ánivare tacahe eta máechajiriruva ema Jesús:

—Numetacahe: Échajica ema Tata Vicaiyaquene. Eyaseacayare eta ecamunuqueneana. Éma, tijapanurahi. Tisamaheyare, tjaracaheyareva. Vahi ecuyacuji eta eyaseasiraina. Énerichuvare, te tatiarihinapupuca eta jácani íchiraya ichapehi eta tacajeravayarehi, eyaseacayare májaracaheni eta ítupajijiasiravaya. Éma, tjaracaheyare. Te jararihipuca eta táichejimiráuchahe, éma macaevuisinaheyarehi.

⁹Eta juca tímicutijiricavahi te natiarihipuca ena echichanaveanahi éti, te tiyaseacaheanapuca eta pan nanicayare, váiparinehi táuricaimahi jjaracahini éti eta márijahi. Tímicutijiricava evijaruinahini ena echichanaveana. ¹⁰Étaripa te tiyaseacaheanapuca eta jima, váhivare táuricaimahi jjaracaimahi eta quichare. ¹¹Etiarihi éti vahi ecajirahihini nayehe ena achaneana. Íurihisera nayehe ena echichanaveana. Mavetijicha ema Tata Ecaiyaquene tiávihihi te anuma. Éma, vahi ticavijaruhemahi eta eyaseserepi. Tjaracaheyarehi tamutu eta táuriqueneana eyasearuanayarehi.

¹²Evaraha eta náurivaina ena achaneana eta eyehe, ¿masi? Tásiha, táuricahi eta íchiraya eta iúriya nayehe. Taicha eta tacahehi eta táimiturapi eta Sagrada Escritura eta eyehe.

Jararihi eta apina achene

(Lc. 13.24)

¹³⁻¹⁴Esamanuchaha. Jararihi eta apina achene. Eta ichape achene, vahi tácájera eta náehisira ena achaneana. Camurianapana ena téhicana eta ticaijuhe tayehe eta ecuñaraqui. Étasera eta achene ánicuchicharichu, ticaijuhe tayehe eta vítaresirayare, tájina ecuñaraquna. Váhisera camurianaina ena téhicana éta. Éti epamicava esiapa tayehe eta achene ánicuchicharichu.

Emá Jesús máimicutichahi ena achaneana tépiyahirahiana, nacuti eta yucuqui máurinisiráha eta tahi

(Lc. 6.43-44)

¹⁵Échapavayare tayehe eta náimiturapiana ena tépiyahirahiana tímijachavana machanerana emá Viya. Tépiyacávánapahi tíuriana tacutihi eta tamansuva eta uvesa. Téhesera te nasamureana, tétavicavahi eta navainarajiva, nacutihi eta ichini. ¹⁶Ímaticacavachisera éna táichavene eta náichaqueneana. Nacutihi eta yucuquiana. Eta yucuqui, tímaticarehi eta táhi. Étaripa eta sitavere, váiparinehi tíuchucaimahi eta tacahihini narasahinahipucaini. Tásiha, eta ijicaqui váiparinehivare tacahimahi eta táhi cachicheruhinahipucaini. ¹⁷Tacutiquene, tímaticarehi eta táhi eta yucuqui tíurínisi. Tímaticarevare eta táhi eta máurinisiráhana. ¹⁸Eta yucuqui tíurínisihi eta táhi, vahi témunahiricavaimahi vahi tacurínisihini eta táhi. Étaripa eta máurinisiráhana, váhivare témunahiricavaimahi táurínisihini eta táhi. ¹⁹Tamutu eta yucuquiana máurinisiráhana ticaechuyarehi, tíjuyarepa te yucu. ²⁰Eta tacahe, ímativacayare ena tépiyahirahiana táichavene eta náichaqueneana tamauriqueneana.

Vahi námutuimahi títujicavana tisiapanaimahi te anuma

(Lc. 13.25-27)

²¹Nararihnapa ena achaneana tépiyacavana nuchanerana. Váhisera títujicavanaimahi tisiapana tayehe eta mávasa emá Viya. Tayanapane náichanuinapapuca “Tata Viáquenu”, vahi tisiapanaimahi. Taicha vahi yátupinahini eta nacaemataneasirahi emá Tata Nucaiyaquene te anuma. ²²Te táitecapapa eta juicio, camurianayare ena tíchanuanayare: “Tata Viáquenu, víti véchajisihaparacahi eta píjare. Vipiaracavihi te píjare eta viáquijsirahi ena váinarajiana, téhevare te píjare vímerecohi eta tiáramicareana” náichanuinapapuca. ²³Nútisera nujicapainapa: “Éti vahi nuchanerahéna. Nímatiserá núti eta íchaqueneanahi tamauriqueneana. Évuisiha te numirahu” níchainapa éna.

Emá Jesús máimicuticha ena tisuapajirahiana énapa ena masuapajirairahana

(Lc. 6.47-49; Mr. 1.22)

²⁴Nácani tisuapanuanahi náitauchahivare eta juca nuvanairipianahi, téchemarahianahi táicha. Nacutiyahehi mácani títucahi tépiyareca peti, manacayarehi eta túmeana yucuqui emuruquiana. ²⁵Jéhesare, te járajapapa eta muraca técatícava, tiámaquiha tiquiva, tisiapapa eta une, váipasera tacayayacahini eta peti, taicha tíusiapiravacahi. ²⁶Nararihivare ena tépiyacavanahi tisuapanuana, váhisera náitauchahini eta juca nuvanairipiana. Éna nacutihi emá máitucaraha tépiyareca peti. Vahi manacaimahi eta túmeana yucuqui, váhivare táusiapiravacahini máicha. ²⁷Te járajapapa eta muraca técatícava, tiámaquiha tiquiva,

tisiamapa eta une, tacajimuyapaicapa eta apaquehe. Tiáquipaicavapa eta peti, tamutusamipa témitiequeneha —máichavacapa ema Jesús.

²⁸Te títapiricapa ema Jesús eta máimitusiravacahi ena achaneana, ichaperinehi eta náramirahi eta máimiturapiana. ²⁹Vahi nasamasarénahini. Tétavicavahi eta máitusirahi mayunapaicahi tamutu. Tétavicavahivare eta tasuapacarevahi eta máimiturapiana.

Emá Jesús macanaraca ema émana achane leproso

(Mr. 1.40-45; Lc. 5.12-16)

8 ¹Te tiúcupaicapa ema Jesús tayehe eta cerro te mávinehi, camuriana éna achaneana téhicanapahi. ²Tacahe, macahepaipa ema émana achane leproso. Témeñahavapa mayehe ema Jesús. Tépuycapa te mamirahu. Tásiha, máichapa:

—Tata, nucasiñavahi eta piyehe, picanaracanupaini.

³Tacahe, ema Jesús majicapapa:

—Nubaraha nucanaracavi. Tájinapa píchiravaina puiti —máichapa.

Máemamahacapa. Tásiha, enevanepa tinaracahi ema macajumaquenénihi eta máechajisirahi ema Jesús. ⁴Tásiha, ema Jesús máichapa:

—Pímaha, nacuija picumetaca eta nútirahi nucanaracavihi. Piyana-vanesera pímercava nayehe ena tuparairucana, apaesa náimamacavi. Énainapa timetajiricanainapa eta yátupirahi pinaraca, pipachihairapa. Piyamayareva me Viya. Picamavahuyarepahi eta pihasalupayachirayare taicha eta macanarasiravihi —máichapa ema Jesús.

Emá Jesús macanaraca ema mamusura ema capitán romano

(Lc. 7.1-10)

⁵Tacahe, ema Jesús títecapapa tayehe eta Capernaúm. Matiarihini ema achane apavasana. Comandantehi éma nayehe ena suntaruana romanoana. Capitán eta mávacure. Tiyanapa mapauchapa ema Jesús. ⁶Mayaserecapa, ániapa máicha:

—Tata, mararihi puiti te nupena ema amaperu numusura ticajumahi eta áire. Tétavicavahi tacativa masama. Pájapanupaini, picanarasinanupaini éma —máichapa.

⁷Emá Jesús, majicapapa:

—Tiuri, nuyanayare nucanarapanayare —máichapa.

⁸Tásiha, ema capitán majicapapa:

—Tata, vahi picucaëñamacava eta pítesiraina eta nuyehe, taicha vahi táuricahini pisiapahini te nupenasami. Németeaca taratarichu picavanairipi eta picanarasiraya ema numusura. ⁹Taicha núti nusuapahi te tivanecanuana ena anuquehepananahi eta nuyehe. Nútiripa nusuapacarehivare nayehe ena nusuntaruranahi. Te nuvanecavaca, téhevare níchuhavacapuca, tisuapanuanahi. Te nuvanecapuca ema nuvaneru, enurujipta tisuapanuvane —máichapa.

¹⁰Te masamapa ema Jesús eta juca, ichaperinehi márami eta yátupirahi macasiñavairahi eta mayehe. Máichavacapa ena téhicanapahi:

—Nutupiruva numetacahe: Nájina nímaha émanaina vijaneana israelíta mácutihini ema maca achane apavasana eta macasiñavairahi eta nuyehe. ¹¹Numetacahe puiti: Járjapainapa eta sache, náitecapiraya ena camuri-queneana achaneana apavasanana tíasihanayare te tamutu avasareana te juca apaquehe. Tisiapanayare eta mávasa ema Tata, te mávihahi ema víachucaini Abraham, ema Isaac, émapa ema Jacob. Tétavicavainapa eta náurisamurevaya. ¹²Tacahe, tamapuruji eta náimatiequenehairahi ena vijaneanana israelítana eta máechajiriruva ema Tata, váhisera nácasíñavahini eta nuyehe. Eta tiviuchavacayarehi tayehe eta nacaicuñaiyaya eta te tamapicuquene te távihahi eta tájjurequenehi yucu. Ticapitiquiahechavanainapa eta tacativayare nasama. Tíyahanainapa —máichapa.

¹³Tásiha, ema Jesús máichapa ema capitán:

—Piyana pichava te pipena. Tinaracaripa ema pimusura, taicha eta picasiñavairahi eta nuyehe —máichapa.

Tacahe, ema amaperu ticajumahi tinaracaripahi te jena hora eta náechajirisiravahi éna.

Ema Jesús macanaraca esu máimase ema Pedro

(Mr. 1.29-31; Lc. 4.38-39)

¹⁴Ema Jesús tiyanavarepa te mapena ema Pedro. Máimahapa esu máimase ema Pedro, ticajumahi eta muraca fiebre. Mapauchapa tayehe eta suívesihahi. ¹⁵Máemamahacapa, enevanepa táetaviacahi eta fiebre. Tinaracapa. Enurujipa téchepuca. Tásiha, tépanavapa ésu eta suítátirahi ema Jesús.

Camuriana ena macanararuanapahi ema Jesús

(Mr. 1.32-34; Lc. 4.40-41)

¹⁶Te yátipa, títeparácanapaichucha ena achaneana. Námavacapaipa ena nacajumaqueneana, énapa ena návaháruana ena éreanana. Tacarichu te máechajiriruvachucha ema Jesús, macuchuchujicavacapaipa ena éreanana tiávahácanahi ena nacajumaqueneanahi. Macanaracavacapa ena apamuriana tisamanahi eta apana jumareana. ¹⁷Eta juca títauchavapahi eta táechajisihairahi eta májurehi ema víyarahaini profeta Isaías, ani tacahehi: “Masaminahavihivare eta vijumana eta macanarasirahavihi”.

Tituparacahavi vahi véñamavaimahi eta víjarasiravahi véhica ema Jesús

(Lc. 9.57-62)

¹⁸Te máimahapa ema Jesús ena camuriqueneana achaneana nachayacahi, macavanairipipa ena máimitureana natsecava eta nánuesirayarehi te apachara cáquiure. ¹⁹Tacahe, ema émana escribáno témeñahavapa mayehe ema Jesús. Máichapa:

—Tata máestro, núti apana nuvaraha néhicavi te jácani pivarahaque-neyare piámianu —máichapa.

²⁰Ema Jesús, ánipa tacahehi eta majicapirahi:

—Tamutu eta sárareana ticapenavaca. Énerichuvare eta cáyureana tamacajipachuvare. Nútisera nuti Manerejirunuhi ema Viya, tájina nuviya nusiapihahini —máichapa.

²¹Te apanavarepa sache, ema émana máimiture máichavarepa:

—Tata, nuyaseacavi písapanuhini nuchava te nupena. Nucuchapanu-mayarehini eta máepeniraya ema ticachichanu, nécaranumaya. Tásiha, nucapayacavipa néhicaviya —macahepa.

²²Ema Jesús majicapapa:

—Péhicanuchucha. Pésamirica náecaracacaichaha ena máecharaireana. Tájina tájaracavimahi eta juca tihapasamurerecavihi —máichapa.

Ema Jesús macaesamirica eta táepacusirahi eta une étapa eta técticava

(Mr. 4.35-41; Lc. 8.22-25)

²³Te títapiricapa ema Jesús, tiávacuhapa te pacure. Énapa ena máimitureana, náhicapaipa éma. ²⁴Te itupiercanapa, járajapapa eta muraca técticava. Ichapevaca eta táepacuruhana. Tisiapapaipahi eta une tayehe eta pacure. Ema Jesús, tímacapaichucha éma. ²⁵Tacahe, ena máimitureana tipiararecanapa eta napisirahi. Nacajamicapa éma. Ánipa náicha:

—Tata maestro, picatiuchahavi. Véricainapa —náichapa.

²⁶Ema majicapavacapa:

—¿Tájaha tacayema epica? ¿Vahi ácasiñavapahini eta nutiarihirapahi eta eyehe? —macahepa.

Tásiha, téchepucapa. Macamatnacapa eta técticava étapa eta une. Enevanepa tésamiricavahi eta táepacusirahi. Tájina táichiravainahini.

²⁷Ena máimitureana ichaperinehi nárami. Ánipa nacahe:

—¡Tétavicavahi eta máitupajijiasiravahi! ¡Jéhesare, yátupiquene eta émairahi machichahi ema Viya! ¡Taicha tamutu tasuapahi, macamatnacahi eta técticava étapa eta une eta táepacusirahi! —nacahepa.

Ena apinana ajairana návaháruana ena ichapemuriqueneana éreanana

(Mr. 5.1-20; Lc. 8.26-39)

²⁸Te títecapapa ema Jesús te apachara eta cáquiure te apaquehe Gadara, tiúchujicanapa te ecarí ena apinana ajairana, návaháruanahi ena éreanana. Tétavicava eta náinehivavacahi. Náehayarehi nácani tiánucuhapahi. Tacahe, napauchapa ema Jesús. ²⁹Tipiararecanapa, ánipa nacahe:

—¿Tájaha picha píteca pipauchahavi piti Jesús, Machichaquenevivihi ema Viya? ¿Pivarahapa picaetemajiricahaviyare víti? ¡Pájapanuhavi, vuíchaha picuvanecahavi tayehe eta vicaicuñaiyayare! —nacahepa.

³⁰Tásiha, tatiarihihivare nacachacayahi eta camuriqueneana cúchiana tinihicanahi. ³¹Ena éreanana nayaseacapa ema Jesús. Ánipa náicha:

—Te piáquijicahaviyarepuca, picatajicahavi. Písapahavi visiapahacavaca eta jena cúchiana —náichapa.

³²Tacahe, ema Jesús máisapapa:

—Tiuri, eyana esiapahacavaca —máichapa.

Tacahe, tiúchucanapa ena éreanana nayehe ena návaháruanainihi. Tiárame-murihanainehi eta cúchiana. Tijunaparacanapa témiririjicanapa te tachausi eta cáquiere. Téririjicanapa. ³³Ena tijanearecanainihi eta cúchiana tiyananapa tijunana tayehe eta avasare. Timetajiricanapa eta náimairahi, étapa eta nanarasirahi ena návaháruanahi ena éreanana. ³⁴Tacahe, tiyananapa ena achaneana te mávihahi ema Jesús, náimahapanahi. Te náimahapa éma, nayasecapa vahi macuitectapahini te návasa, machavahini te másinehi.

Ena Jesús macanaraca ema émana achane macajumaquene eta muracaquiha
(*Mr. 2. 1-12; Lc. 5.17-26*)

9 ¹Tacahe, ema Jesús tichavapa tiávacuhavarepa te pacure. Tichavapa tayehe te mávasahi Capernaum. ²Ánaqui náimipauchavarepa ema achane macajumaquene eta muracaquiha. Ema tívecahi te mayehe camilla. Te máimahapa ema Jesús eta nacasiñavairahi eta mayehe, máechajicapa ema macajumaquene. Ánipa máicha:

—¡Pétumechava, nuchicha! Nucaepahainavipa eta pipecaturanaini —máichapa.

³Natiarihi ena escribánoana. Eta nasamirahi ema Jesús, ánipa nacahe te nasamure: “Ema maca tépiyacava tímijachavahi Viya eta macaepahairahiji eta pecatuana. ¡Tétavicava eta matapirava!” ⁴Émasera ema Jesús máimatihí eta napanereruanahi. Máichavacapa:

—¿Tájaha tacayema eta éjecapirava nuyehe te epanereruanahi? Núti tájina nutapiravaina eta níchirahi eta juca. ⁵Núti, eta nucaepahairahi eta mapecaturana ema maca, tacutihí eta máejerererahi eta nuncanarasirahi eta máquehe. ⁶Tiúrisera puiti, nuti Manerejirunuhi ema Viya, nímereuchavainapa eta nuratahairahi nucaepaha eta pecatuana te juca apaquehe. Ímararacanu —tacahe, máichapa ema macajumaquene—. Puiti, nuchicha, nuvanecavi péchepuca. Piveha eta jara piyereruva. Piyana te pipena —máichapa.

⁷Enevanerinehi téchepuca ema macajumaquenéni. Tiyanapa te mapena. ⁸Ichaperinehi eta náramirahi namutu ena achaneana natiarihiqueneanahi. Tétavicavarinehi eta nacunachirahi ema Viya taicha eta máitupajijiasirava ema Jesús eta máijarasirahi ema Maiya.

Ena Jesús máichuha ema achane ticajare Mateo, mayehyare apóstole
(*Mr. 2.13-17; Lc. 5.27-32*)

⁹Te apanapa sache, nuti Mateo néjacahi eta te nucobraresirare eta impuesto. Tacahe, tiánucuhapaipa ema Jesús. Te tímahanupa, tíchuhanupa.

—Yare, péhicanu —máichanupa.

Enevanepa, néchepucahi. Néhicapa éma.

¹⁰Tacahe, námapa éma te nupena, énapa ena máimitureana. Níchuha-vacapa ena nuchamuriana ticobrarerahianahi eta impuesto énapa ena apamuriana tisipecaturana. Nénicavacayarehi éna. Macachanemuri-hivare ema Jesús eta vinisirahi. ¹¹Títecapanavarepa ena fariséoana. Eta náimairahi namutu ena némunarqueneana, eta vicachanerahi ema Jesús, ticaecahirecanapa. Ánipa nacahe nayehe ena máimitureana ema Jesús:

—¿Tájaha tacayema tísapava ema eyehe maestro macachanevaca eta manisirahi ena nánitatajiana ticobrarerahiana eta impuesto? ¡Ticapeca-turarahiana éna! —nacahepa.

¹²Te masamairiricapa ema Jesús eta náechajiriruvana, máichavacapa:

—Ena majumareanahi vahi nácamunuimahi ema médico. Nacarichu ena ticajumanahi nacamunuyarehi ema médico. ¹³Nútiripa vahi étaina tímite-canuhi nutanucayarehi nácani matapiravareanahi. Nutanucapahi núti ena tisipecaturana, apaesa náeneuchava, náinajica eta napecaturana. Tásiha éti, eyana ecaravahu eta máechajiriruvanahi ema Viya. Ánipa macahe: “Núti nuvaraha yátupinaini eta ejapanuraivainahini. Taicha te vahi, tamapurujiyare eta ecamavahuirahi eta nuyehe” macahepa ema Viya.

Nayaserecapa ema Jesús tayehe eta ayuna

(Mr. 2.18-22; Lc. 5.33-39)

¹⁴Títecapanapa ena máimitureana ema Juan Tíchasiricarahi, nayase-recapa ema Jesús tayehe eta ayuna. Ánipa naicha:

—¿Tájaha tacayema vahi nahayunacha ena pímitureana, vahi nácutihavihini viti máimitureana ema Juan, énapa ena fariséoana?

¹⁵Ema Jesús majicapavacapa:

—Nímicutichinahe puiti. Vahi táuricaimahi ticatisamurevana nácani ticaichuhacasianahi tinicanahi nayehe ena araimana. Tiúrisamureanayarehi taicha matiarhihi ema arayena. Téhesera te tépenapuca éma, jéhesare ticatisamurevanayarehi. Tacutiquene, vuíchaha táuricaimahi eta ayunanainahini ena nímitureana. Járापainapasera eta sáchezare, ticave-rejicasianayare taicha ticaratacanuanainapa ena ticapacuanaya núti.

¹⁶⁻¹⁷Esamanuchaha. Eta juca eta nímiturapiana, amairiha arairu. Mavaraha ema Viya arairuyare eta eyeherepianayare eti achaneana. Vahi ticiticacaimahi eta nayeherepiana ena achaneana. Eta ítusira éti eta nímiturapiana, tavaraha ínajica eta ichasi eyeherepiana tamauriqueneanahi —máichavacapa ema Jesús.

Ena Jesús macanaraca esu machicha ema Jairo, ésupa esu apana esena sucajumaquenehivare

(Mr. 5.21-43; Lc. 8.40-56)

¹⁸Téchajiricavaichahahi ema Jesús nayehe ena achaneana, títeca-panechavare ema émana achane ticajare Jairo. Tuparairucahi éma. Matupirupa tépuyucapa te mamirahu ema Jesús. Ánipa macahe:

—Tátachicha, surarihi esu nuchicha. Puítirichaha tépenahi. Téhesera te piyana, pinacaini eta pivahu, suchavahini suítarecahini —máichapa.

¹⁹Tásiha masuapapa ema Jesús. Tiyanapa te mapena ema Jairo, vimutupaichu viti máimitureana. ²⁰Tásiha, sutiarihihivare esu ésuna esena sucajumaquene.

Doce añoripahi eta sucatajivairahi, táichirahi eta suítine. Témeñahavapa te maquecu ema Jesús. Suémamacapa eta tacheyarapi tamatsianahi eta mamuiriha. ²¹Taicha te supanereru ésu, sucahehi: “Taratarichu jácani te némamaca eta ñimuiriha, éta ticanaracanuyare” sucahepa. ²²Émasera ema Jesús masamarichucha eta suémamajiasirahi, macacutiarahi eta macanarare-sirahi. Téquerucavapa. Máimahapa eta supisirahi esu esena. Tásiha, máichapa:

—Vaipa picupica, nuchicha. Pinaracapa puiti táichavenehi eta picasi-ñairanuhi —máichapa.

Tacahe, tinaracapa esu esena. Vaipa tápechahini eta sujumainihi.

²³Tiyanavarepa ema Jesús. Títecapapa tayehe eta mapena ema Jairo. Máimahainehi ena músicoana. Tiúrianaipahi eta námirayarehi te ecari esu suépenaquene. Énapa ena achaneana, tijajamurianaripahi eta náiyairahi. ²⁴Tásiha, ema Jesús máichavacapa:

—Íuchucachaha te aneca. Váhinéni suépenahini esu suca amaperu. Tímacarichucha ésu —máichavacapa.

Énaserá nacaecahirichucha éma, técavanapa. ²⁵Te tiúchucanapa ena achaneana, tisiapapa ema Jesús te suávihahi esu suépenaquene. Macaratavauchapa ésu. Macaehepucapa. Tichavapa títarecahi ésu. ²⁶Te nasamairicapá ena ticavasanahi eta te Capernaum, náraminehi namutu. Nacatsatsaicapa timetajiricanapa.

Ena Jesús macanaraca ena apinana púchuquiána

²⁷Tiuri, tichavayarepa ema Jesús te mapena. Eta mapasirahi te calle, náhicapaipa ena apinana púchuquiána. Tipiaracanapaipahi te máequene.

—¡Tátachicha Jesús, pájapanuhavi picanaracahavi. Vicasiñavi piti yátupiquenévihi Cristo! —náichapa.

²⁸Váhisera masuapavanehini éma. Te tisiapapa ema Jesús te mapena, ena púchuquiána tisiapanavarepa. Témeñahavanapa eta mayehe. Tásiha, éma mayaserecavacapa. Ánipa máichavaca:

—¿Yátupipuca ecasiñanuhi eta nucanarasiraheyare? —macahepa.

Ena najicapapa:

—Yátupi, tata.

²⁹Tacahe, ema Jesús máemamacapa eta náuquihana. Tásiha, máichavacapa:

—Tiúri, eta ecasiñairanuhi, enaracayare —máichavacapa.

³⁰Jéhesare, enevanepa tinaracanahi. Tímairiricanapa. Tásiha, muracapa eta matuparasira vahi nacumetajirica eta macanarasiravacahi éma. ³¹Váhisera nácahehini éna. Étarichuhi te tiúchucanapa, timetajiricanapa eta macanarasiravacahi. Tásiha, náechapa namutu te tachacayarahanahi eta avasare eta juca máichaquenehi ema Jesús.

Emá Jesús macanaraca ema achane upa, macaechajicahi

³²Te viúchucavarepa, nacahepaipavare ena achaneana. Námapahi ema achane. Úpahi éma, taicha mávaháruhi ema éreana. ³³Tacahe, ema Jesús máquijicapa ema éreana, ema tiávahácainihi. Tásiha, ema achane tinaracapa. Téchajicapa. Ichaperinehivare eta náramirahi ena achaneana eta náimairahi. Ánipa nacahe:

—¡Tétavicava eta máitupajijiasirava ema Jesús! Te viávasa Israel, nájina tiratahaina tíchaina tácutihini eta juca vímahaquenehi —nacahepa.

³⁴Nararihivare ena fariséoana. Ánipa nacahehi:

—Ema maca Jesús, vémeteaca majupahahi ema Satanás, ema náquenu-murihi ena éreanana. Máijararuhi jácani eta máitupajijiasiravahi eta macachusiravacahi éna —nacahepa.

Emá Jesús majapanuvaca ena achaneana

³⁵Emá Jesús tamutuhi mapaica eta avasareana étapa eta ánichichaqueneana avasarechichana. Tímiturecapahi tayehe te jácani máitecapihapahi te náurujisirarevana. Ticametarairupahi eta máechajiriruva ema Viya eta náuchucuirayare ena ticasíñanahi éma, machaneranayarehi éna. Ticanararecapahivare ena ticatajivanahi ticacatiruhanahi. ³⁶Camuriana ena achaneana títanajirícavanahi. Taicha ticatajivanahi éna, nájina nácasíñahini. Nacutihi eta uvesa te nájina tijaneacaina. Eta máimairavacahi ema Jesús, ichape eta majapanuiravacahi. ³⁷Tacahe, ema Jesús máichahavipa viti máimitureana:

—Tétavicavapa eta vicamunuirava ena tímícatatahavianaya tayehe eta juca vématanerepihi. ³⁸Eyaseacayaresera ema Tata Vicaiyaquene, máijaracahavi ena tímícatatahavianayare. Eta juca tímícutijiricavahi mácani achane eta macamunuiravahi ena tímícatatacavanaya te máechatijicaya eta maharusura —máichahavipa.

Ena dócequeneana apostóleana manerejiruanahi ema Jesús

(Mr. 3.13-19; Lc. 6.12-16)

10 ¹Tacahe, ema Jesús tíchuhahavipa viti dócequeneana, mayeheanayare apóstole. Tíjaracahavipa eta vítupajijiasiravayare viratahairayarehi vicuchucavaca ena éreanana, vicanarasirayareva ena nacajumaqueneana étapa eta nacatiruhavana.

2-4Eta juca vjareana viti apóstoleana^c: Ema tínapuca ema Simón Pedro, émapa ema maparapeichu Andrés, ema Jacobo ema maparapeichu Juan, ema Felipe, ema Bartolomé, ema Tomás, nútupa Mateo, ema apana Jacobo, ema Lebeo, ema apana Simón, émapa ema Júlasí Iscariote (ema tijararecahi ema Jesús).

**Ema Jesús mavanecavacapa ena dócequeneana apóstoleana
napaicayare tamutu avasareana, ticametarairuanayarepahi
(Mr. 6.7-13; Lc. 9.1-6)**

5Tacahe, ema Jesús tévatacavipa viti dócequeneana apóstoleana vicametarairuyarehi. Ánupa máichahavi:

—Vahi ecuyana tayehe eta návasana ena apavasajuecuana. Váhivare ecuyana nayehe ena samaritanoana. 6Eyanayaresera tayehe eta avasareana návasanahi ena vijaneanana israelítana. Taicha éna nacutihi eta uvesana máquenureana. 7Eyana ecametarairuyare nayehe. Emetacayare eta nútija-pairainapa nuti Náquenuyare, nuti nucuchucuhavacayare éna, taicha mavanerunuhi nútí ema Viya. 8Ecanaracavacayarepahi ena leprósoana énapa nácani ticatajivanahi taicha eta apana jumare. Ecaechepucayareva ena nápenaqueneana. Ecuchucayareva ena éreanana. Éti, vahi evachareruinahi eta juca ítupajijiasiravahi, váhivare ecobrachimahi nácani ecanararuanayare.

9Váhivare íamaimahi eta oro, eta plata, eta reale. Tacuija iama eta enirurucuha te alforja. 10Étanarichuvare emuiriha, éta íamayare. Étapa eta éparupeva, étaripa eta eyupairiquiana. Ema ticaematanerahi, tatuparacahi náenicayarepahi te jácani macaemataneyapahi. Ene ecaheya éti, títátíheanayare ena tijacapanaya eta ecametarairuirayarepahi.

11Te ítecapaucha jácani avasare, etanucayare ema achane tiuri, témunarahi. Enasiyare mayehe. Tiámmainucava te táitecapa eta iúchusirayareva tayehe eta avasare, epaenumavaya ejunijica eta ítecapihahi. 12Te esiapayarepa tayehe eta peti, eyaseacayare ema Viya eta náuricacarevaina ena achaneana ticapenana eta peti. 13Te tiúrianahi ena achaneana ticapenanahi eta peti, ímiyanava eyaseuchayare eta náuricacarevaina. Téhesera te vahi nacuri, váhi eyaseuchaimahi. 14Étaripa te váhipuca nacujacapahe te jácani avasare, étapa te jácani peti ítecapihayare, váhivare nacubaraha nacusamahe, iúchucavaneyareva. Étatapevachavanúmayaréséra eta máteji te ívapeana. Táicutiarayare eta máicuñasirayare ema Viya taicha eta namavarairahi najacapahehíni. 15Nutupiruva numetacahe, te táitecapa eta

c Mt. 10.2 Ena nani apinana ajairana ema Jacobo émapa ema Juan, napaapecacahi, machichanaveanahi ema Zebedeo. Ema Mateo, eta máematanerepiníhi, ticobrareca eta impuesto. Ema apana Jacobo, machichahi ema Alfeo. Ema Lebeo, mapapíhi eta máijare. Ticaijarehivare Tadeo étapa eta Judas. (Te pívaraha pecha, pítanuca te Marcos 3.16-19 étapa te Lucas 6.14-16.) Ema apana Simón, tímaticarehi éma, nachamurinihi ena revolucionárioana ticaijareanahi “cananístana”. Navaraha náquijica ena extranjerioana romanoana.

juicio, tiápajucavainapa eta náicuñayare. Tacachuricayare eta nacaicuñairayare ena achaneana váinarajiqueneana ticvasanaini te Sodoma étapa eta Gomorra.

Nacatianacainapa ena téhicanapahi ema Jesús

(Lc. 12.2-7)

¹⁶Esamanuchaha. Núti nuvanecahehi éti eyana epaica. Nararihisera ena achaneana váinarajiqueneanahi étupiaruanayare. Éna nacutihi eta sárare táíñehiqueneánahi. Étiserá ecutiya-re eta uvesa eta tamansuvahi. Ítucayare eta ecaichepaisarayare eta navainarajivana. Váhisera ecujicapachava te návarahapuca náehahe. ¹⁷Échapava, taicha nararihiyare ena achaneana ticatianacaheanayare táichavenehi eta éhisiranuhi. Ticaratacaheanainapa, écayaserehinapa nayehe ena juéseana. Tésta-caheanainavarepa eta te náurujisirarevana. ¹⁸Tásiha, etiarhiyare éti tíamaheanaya te namirahu ena aquenucana, téhevare te namirahu ena Presidenteana gobiernonahi, ecaviurevayare táichavenehi eta éhisiranuhi. Esapihasera éti, ecamapuravainapa échajisianuyare te namirahu éna, apaesa náimatiyare namutu ena achaneana te avasareana eta nímiturapiana. ¹⁹Tacahe, te jácani námahepupuca te namirahu ena aquenucana, vahi ecueñamava tayehe eta jácani échajiuchiravayare, ecatiuchiravayare. Échajicayare eta échajiriruvana máijjararuheyare ema Espíritu Santo te jena sache. ²⁰Taicha máimahaheinepa, tímitucaheyare eta échajisiraya. Vahi étijivaimahi eta échajisiraya.

²¹Natiarihiyareva nácani achaneana tíjararecanaya ena naparapequeneana, navarairahi náimicapaca táichavenénahi eta náehisiranuhi núti. Natiarihiyareva ena nácani náiyana, navarahayareva náijjarareca ena nachichanaveana táichavenehi eta náehisiranuhi núti. Natiarihiyareva nácani nachichanaveana nacanarainapa ena náiyana, náimicapacainapa táichavenehi eta náehisiranuhi núti. ²²Namutuyaréni ena achaneana ticatianacaheanayare táichavenénahi eta éhisiranuhi núti. Téhesera ecamichahi tamutu, ímiyanavahi eta éhisiranuhi te táitavapa tamutu, nucuchucuhaheyare núti. ²³Te napanajicahepuca te jácani avasare iáivihahi, táichavenehi eta ecametarairuirahi, ejunayare tayehe eta apana avasare. Jéhesare, nuti Manerejirunuhi ema Viya, nútijapavanénapa. Vuíchaha ecuitahi epaica eta avasareana ne vijaneanana israelítana.

²⁴Éti nímitureana, ticatianacaheanaya ena achaneana. Vahi epicauchacarémahi nayehe, táichavenehi éhisiranuhi núti. Ticatianacaheyaresera tacuti eta nacatianasiranuhi núti. ²⁵Tíjarechaheanayare váinarajihe, máurishihepuca, tacuti eta náumehairanuhi núti. Étiserá, evapinavaya eta ecutiranuyare eta nacatianasiranuhi nuti iáquenu, núti eyehenuhi maestro.

²⁶Váhisera ecupicavaca ena ticatianacaheana. Ema Viya tímararacaheya. Ticunachaheya eta ecamichirahi, evehainapa eta ícuchihi. ²⁷Tásiha, étumechava eta ecametarairuiraya tamutu eta nímiturapiana te tamutu avasareana. Jácani néchajiriruvanahi te timapicu, éti ecuchujicayarehi te tijarahi, emicauchiravacaya ena achaneana. Étaripa eta nujajairuhehi te vicarichuhi, epiaracainapa

te calle. ²⁸Vahi ecupica nácani nacapacapuca eta iáquehe, tacarichuchucha náituruequenehayare. Váhisera naratahaimahi nacamitiequeneha eta iáchaneva. Macarichu ema Viya epicayare, taicha éma máituruequenehahi tamutu. Maratahahi macamitiequeneha eta iáchanevana tayehe eta táínehiquene infierno, te ecaínajiruva táichavenehi eta episirapuca eta nacapasiraheyare.

²⁹Nímicutichinahe eta cáyurechicha. Éti ímijachapapuca vahi tasivachahini éta. Téñamacareanahisera me Viya. Éma, téchavacahi eta táitaresirahi, étapa eta táepenirahi. ³⁰Evetijipa éti, éñamacarepanahi me Viya. Éma, tímatisa eta tatupa eta echutimacana. Téchahehivare éma tamutu eta ítaresirana. ³¹Eta tacahe, vahi ecueñamavahi éti tayehe eta ítaresirana, taicha tétavicavahi eta emunavahi mayehe.

Vímereuchavayare eta véhisira ema Jesús

(Lc. 12.8-9)

³²Tímiyanava ema Jesús tímitucahavi. Ánivare macahe:

—Namutu ena tímereuchavanahi eta náehisiranuhi te namirahu ena achaneana, núti apanavare nímereuchavaya eta nuchanerairavacahi éna mayehe ema Tata Nucaiyaquene, ema tiávihihi te anuma. ³³Nácansera vahi návarahahini tímereuchavanahi eta náehisiranuhi, núti apanava nímereuchaya eta vahi nuchanerainahini éna, te mamirahu ema Tata Nucaiyaquene.

Ena achaneana náepuruvacainapa nácani téhicanayare ema Jesús

(Lc. 12.51-53; 14.26-27)

³⁴Éti ímijachaipapuca eta nítésirahi te juca apaquehe, tájina tácyemacarémahí, tíuricacareyarehi nícha. Váhisera ene tacahe. Níchaveneya núti, ena achaneana tépuruheanaya térajicavanaya eyehe. Eta tacahe, nuvaraha échapirica yátupina eta juca éhisiranuhi. ³⁵Taicha puiti juca vicaijuheyare, mácani achane, te natiarihi ena machichanaveana, nacatichayarehi ema naiya táichaveneyarehi eta máehisiranuhi éma. Ésuripa esu naena, nacatianaayareva. Ésupa esu chinenaca, sucatianacayareva esu suímase taicha eta suéhisiranuhivare esu apana. ³⁶Ene nacaheya, nararihiyare ena tachichanaveana eta peti ticatianacana ena náiyana te peti níchavenehi núti.

³⁷Nácansera tínajicavana eta náehisiranuhi táichavenehi eta nacatianasira ena nachichanaveana, váipa tatuparacahini nuchanerainahini. Énaripa nácani tínajicavana eta náehisiranuhi táichavenehi eta nacatianasira ena náiyana, énerichuvare vaipa tatuparacahini nuchanerainahini. ³⁸Énerichuvare nácani apaesarichu eta navarairahi téhicanuanahi, váhivare náijaracavahini táimicapacahini eta náehisiranuhi, vaipa tátuparacahini nuchanerainahini. ³⁹Taicha nácani téñamavanahi eta náitaresira, tiávamirahuana eta náehisiranuhi, énajivayare ticamitiequenehanaya. Énaserá nácani yátupi tjararecavanahi téhicanuana, táimicaparuanaya-repuca eta náehisiranuhi, éna tiúchucuhanayare eta náitaresirayare.

Jararihi eta vícuchihi te anuma*(Mr. 9.41)*

⁴⁰Ema Viya máitsivachayare nácani tiúriana ena najacapiraheyare nasamahe éti. Taicha eta najacapirahehi, ticaecheranahehi eta najacapiranuhivare núti; énerichuvare najacapahivare ema Tata Nucaiyaquene. ⁴¹Énerichuvare nácani tijacapanahi ema profeta nuvaneruhi, énapa ena achaneana tiuri eta náehisiranuhi, máitsivachayare ema Tata, májjarasiravacayare eta náicuchi. ⁴²Énaripa ena témunarahanahi nayehe ena nani ánichichaqueneana téhicanuanahi, nacumpiracha eta une táichavene eta náehisiranuhi; énerichuvare jararihi eta náicuchiquene —máichahavipa ema Jesús.

Ema Juan Tícachasiricarahi mavanecavacapa ena máimitureana*(Lc. 7.18-35)*

11 ¹Te tamutupa eta máimitusirahavihi ema Jesús viti dócequeneana mayeheana apóstole, tiyanavarepa eta te avasareana tayehe eta Galilea. Taicha mavarahahi máimitucayare ena achaneana eta máechajiriruvana ema Viya.

²Tiuri puiti, ema Juan Tícachasiricarahi, mávinehi te cárcel. Ánaqui masamairiricapa eta máichaqueneanahi ema Jesús. Tacahe, máevatacapa ena apinana máimitureana, nayaserepanayarehi ema Jesús. ³Te náitecapauchapa, náichapa:

—Ema viáquenu Juan tivanecahavihi viyaserepanaviyare te yátuphipuca pítiripahipuca Cristo ema vicuchapaquenehi, ¿téheserapuca vímiyanavayarepuca vicuchapa? —náichapa.

⁴⁻⁵Ema Jesús majicapavacapa:

—Nuvaraha ímararacaya eta níchaqueneana puiti. Nucaimai-riricavacaipa ena púchuquiána. Nímipaisiraipa ena masariana. Nucanaracavacaipa ena leprósoana, énapa ena túhuquiñana. Nucaechepusiravacaipavare ena náepenaqueaneanaini. Énerichuvare níchuhahi ena páureana náeneuchavaya apaesa náuchucuha. Tásiha, eyana emetaca ema Juan tamutu. ⁶Vaipa macueñamava ema Juan eta nuyehe. Tétavicavahi eta máuricacarevahi éma, te ticasíñavahi eta nuyehe —máichavacapa.

⁷Tacahe, tichavanapa ena vanairucanahi me Juan. Tásiha, tépanavavarepa téchajica ema Jesús, máechajisihapa ema Juan. Ánipa macahe eta mametasiravacahi ena achaneana:

—Nuvaraha epanereuchayare ema Juan. Te jácani vuíchaha nacaratacahini éma, te eyanapa te mávapahi apaquehe te mávihahi, ¿tájaha eta epanereruana tayehe eta macametarairuirahi? Éti ímijachaipapuca mamapachichijiririvaichucha eta máechajisirahi tacutihi te vímararaca ta taflurena eta acutena te tacayamuririjica eta técticava. ⁸Ímijachaipavarepuca tavayuaruhi éma tiúrinanácavayarehi eta macamuirihairahi. Écharichuhi éti mácani tiúrinanacavahi, píncanillahi eta máítaresira, váiparinehi tíuchucaimahi te sache, váhivare

tiyanaimahi te mávapahiana apaquehe. Manasiqueneyarehi te jácani tiúrina peti. ⁹Nuyaserecahe: ¿Tájaha eta ímijachirahi eta mayehe? ¿Ímatihipuca eta profetairahi éma? Núti numetacahe: Matupiruvahi eta macametarairuirahi ema Juan. Mavaneruhi ema Viya eta yátupiquenehi profetahi éma. Nájina mácutihini ena apamuriana profetana. ¹⁰Ema maca Juan émara máechajisihaquenehi ema Viya eta te Sagrada Escritura, ánipa macahehi: “Nuvanecayare ema tnapumirauchaviyarepahi ema ticametarairuyarepahi, apaesa natsecavapaipa ena achaneana eta najacapiraviyare” tacahepa eta Sagrada Escritura. ¹¹Núti nutupiruva numetacahe: Ema maca Juan, nájina mácuti nayehe ena achaneana. Tétavicavahi eta macunachacarevahi. Tiápajupanavahisera eta nacunachacarevahi nácani nuchaneranaya, apasachichapucaini eta nacaicutiarairahi eta mapanereruana ema Tata.

¹²Ema Juan tépanavapa eta máimitusirahi ena achaneana tacamunuirahi eta náneuchirava me Viya. Nararihisera ena vahi náuricahini nasamararacahini. Étapa tímicitichahi témecatájivachahi éma. Puíticha tanasihi ticatichanuana núti apanava, témecatájivachanuanyare. ¹³Ema víyarahaini Moisés téchajisihanuhi eta te májurehi. Énaripa ena víyarahaini profetana náechajisihahi eta ntesirayarehi nuti Manerejirunuhi ema Viya. ¹⁴Puiti numetacahe: Ema Juan émaripahi ema profeta máiteruyarehi mavasiyarehi ema víyarahaini Elías, eta máinapumirauchiranuyare. ¹⁵Te evarahapuca ecaicutiara, tavaraha eta epanerechinavaya.

¹⁶⁻¹⁷Etiarihihisera eti achaneana puiti juca sácheana, eta emasuapajiraivahi, nímicutichahesa ena amaperuana tiútseruanahi. Apapipijichucha eta nacayemaqueneanapahi. Ema apana macahepauca: “Vépiyacaya eta piéstachicha”. Énaserá ena apamuriana vahi náisapavahini. Tásiha, ema apana macahepauca: “Vépiyacaya eta ecari”. Váhivaresera náisapavahini. ¹⁸Ema Juan, te tímerecavapa, muraca eta máimiturapianahi. Eta manicasareana, vahi tácutihini eta nanicasareana ena achaneana. Nararihisera te emuri ena tépiyaequenehanahi éma. Náimijachahi mávaháruhi ema éreana. ¹⁹Nuti Manerejirunuhi ema Viya, eta nítecapauchirahepa, nucachanehepaipa eti achaneana eta enisirahi. Etiarihihivare eti épiyaequenehanuhi: “Ímaha ema maca, cánisiuquitataji, cávaháras. Macachanevacapaipa ena achaneana tisipecaturarahianahi” ecahehi. Eti épiyacavapa épururahi, ticutirinehi yátupinahini échemarahihini. Tétavicavahisera eta éjecapiravahi taicha eta emasuapajiraivahi. Te yátupihihini échemarahi, ímatinuhini eta nucavanahirahi eta me Tata —máichapa ema Jesús.

Eta táicuñayare eta návasana ena achaneana masuapajirairahana
(Lc. 10.13-15)

²⁰Ema Jesús tépanavapa máechajisiha eta táicuñayarehi eta avasareana máichinehi eta tiáramicareana. Ticaicuñanayarehi ena tachichanaveanahi táichavenehi eta namasuapajiraivahi. Váhivare náneuchavahini, náinajcahipucaini eta napecurana. Máechajicapa ena achaneana tímicutijiricavahi natiarihinahini te mamirahu. Ánipa macahe:

²¹—¡Páurehesami eti nujaneanana ecavasanahi te avasare Corazín! ¡Páurehesamihivare eti apamuriana nujaneanana ecavasanahivare te avasare Betsaida! Ichape eta ícuñayare taicha éti ímaharipa tamutu eta tíáramicareana níchaqueneanahi te emirahu, váhisera ávarahahini éneuchavahíni. Ena nani achaneana ticavasanahi te Siria, apavasananahinéni, tétavicavahinéni eta namaurivahi, németeacasera núti nasapihahipucaini téneuchavana te náimahahini eta níchaqueneanapahi. Enévanenahíni náimerecavahini yátupi eta náeneuchiravainahini. ²²Numetacahevanesera: Te jena sáchezare, muracapanayare eta ícuñayare éti, taicha eta emavarairahi éneuchavahini. Tacachuricayare eta nacaícuñairaya ena achaneana apavasanana ticavasanahi te Siria. ²³Étiripa eti ecavasanahi te avasare Capernaum, tamapurujihí eta nímitusirahéhi éta pa eta ímairahi eta tíáramicareana níchaqueneana. Eti ecasiñavavaicahi, ímijachaipapuca eta ticayapaheyare te anuma. Ichapesera eta etsirihacarevayare, taicha épujuquichavayare eta te yucu taicha vahi éneuchavaimahi éti. Taicha te nímerecáhini eta tíáramicareana tayehe eta avasaréni váinarajiquenehi Sodoma, tácutihini eta ímairahi éti, ichapehipucaini eta náeneuchiravainahini, váipapuca macuicúñacahini ema Viya. ²⁴Numetacahevanesera: Ichape eta ícuñayare te táitecapapa eta júciyare. Tacachuricayare eta náicuñayare ena ticavasanaini te avasare Sodoma —macahepa ema Jesús.

Ema Jesús tíurisamuréinehi mayehe ema Maiya
(Lc. 10.21-22)

²⁵Étarichuhi te jena hórahi, ema Jesús ánipa macahe:

—Tata Nucaiyaquene, tétavicava eta nucunachiravi. Jéhezare píti táquenuvihu eta anuma éta pa te juca apaquehe. Títauchavaipa eta pipaneruhi. Vahi písapahini náitucáhini eta júcana ena tímijachavanahi téchemarahiana. Énapasera píjaracahi ena nani téhicanuanahi, tájinahinéni náechemaraivainahini. Puiti nasapiharipahi nacachuricahi ena títapajjiacavanahi. ²⁶Tétavicavahi eta táurivahi eta pipanereruhi píti, Tata Nucaiyaquene.

Ema Jesús máichuhavaca ena navitajiruana, mavaraha macanaracavaca

²⁷Tacahe, ema Jesús máichavacapa ena achaneana:

—Ema Tata Nucaiyaquene, ema tíjaracánuhi eta nútiraya néchaya tamutu. Nájjina énajivainahini náimatihini ema Tata. Nucarichu núti néchinavahi ena nímitatiruanayare éma. Taicha núti yátupihu eta nímatirahi ema Tata Nucaiyaquene; tacutiquenehi eta yátupirahivare eta máimatiranuhi éma.

²⁸Yare, ecasiñanu emutu eti evitajiruanahi te íachanevana eti éyarecahiana eta éjecapiravana. Núti nuncanaracaheyare. ²⁹Ísapava nunacasicahe eta nuyehe yugo. Nucachanehe apaesa ecaravahu nuyehe, taicha núti mánsunu, tétavicava eta núriva eta nusamure. Éti tétavicavaya eta iúricarevaya te íachanevana te ejaçapa eta nímiturapiana. ³⁰Taicha eta nuyehe yugo vahi tácajera. Tipevejiyare esama —máichavacapa ema Jesús.

Ena fariséoana náimipicauchahi eta nayeherepiana tayehe eta sávarumuhuana. Émasera ema Jesús máimereuchahi émarichu téchahi eta nayeherepiana ena achaneana eta sache nanarasirayare.
(*Mr. 2.23-28; Lc. 6.1-5*)

12 ¹Eta jena sávaru, ema Jesús tiyanapa tipaica. Tiámahavipa viti máimitureana. Témechivanapa ena fariséoana. Vétavivijicapaipahi eta isanítiana. Tacahe, eta vipaisirapahi, vécuropaipa viti máimitureana. Tásiha, vivechuquihapaipahi étajavapahi eta trigo. Vivepiraquihapaipa, vépurajacachavapaipahi. Vinicapaipa, taicha tísapacareichucha. ²Énaserá ena fariséoana eta náimarasirapahi, tisemamajuheanapa. Ánipa naicha ema Jesús:

—Pímaha ena pímitureana. Ticaemataneanapaichucha eta navepiraquihapahi eta trigo puiti juca sache tétavicavahi eta tacapicahuirahi. Vahi tísapacaremahi eta juca nacaematanérahí puiti —náichapa.

³Tásiha, majicapavacapa ema Jesús:

—Németeaca éti vahi ecaicutiara eta tacayemaquene eta Sagrada Escritura, eta máichavaquenevahi ema víyarahaini David eta mapaisirapahi técuropaipa, énerichuva ena téhicanapahi. ⁴Écharichuhi éti te masiapapa eta mapena ema Viya, tiyaseserecapa eta manicayarehi. Náijaracapa eta pan tacapichuquenehi nanacasarehi te mamiarahi ema Viya. Nanicasarehi ena tiyujaracarahiana, émasera ema David vahi tátuparacahini manicahini. Étasera eta máecuavahi, manicapa eta pan, énapa ena macachanequeneanapahi. ⁵Váhipuca échajicuha éti eta te Sagrada Escritura eta mavanairipi ema víyarahaini Moisés eta nayehe ena tiyujaracarahiana téchapajiricanahi eta Templo. Éna, tájina natapiravainahini eta nacaematanerahi te sávarumuhuana. ⁶Tavetijichapuca puiti nutiarihipahi nútí. Ichápequenénupánahi tayehe eta Templo. ⁷Éti váhivare ecaicutiara eta juca máechajiriruvana ema Viya: “Núti nuvaraha yátupinaini eta eJapanuraivainaini. Taicha te vahi, tamapurujiyare eta ecamavahuirahi eta nuyehé” macahepa. Te ecaicutiarahini, váhiyarehini ecaecahivaca ena nímitureana, taicha éna tájina natapiravainapahi. ⁸Tiuri puiti, numetacaheyare: Núti Manerejirunuhi ema Viya, nútirichu néchahi eta sache nanarasiraya ena achaneana —náichapa.

Ena Jesús macanaraca ema achane tépenavahu

(*Mr. 3.1-6; Lc. 6.6-11*)

⁹Te apanavarepa sávaru, tiyanavare ema Jesús tisiapahi tayehe eta náurujisirareva. ¹⁰Ánaqui matiaríhi ema achane vaipa tayamurichahini eta mavahu, tépenavahuipa. Natiaríhivare ena fariséoana, natanujiricahi eta ticaviurevayarehi ema Jesús. Nayaserecapa éma:

—¿Táuricapuca vicanaracavaca ena nacajumaqueneana te sávarumuhuana tacapichuquenehi? —náichapa.

¹¹Ena Jesús majicapavacapa:

—Nímicutichinahe puiti. Németeaca májina émanaina achane vahi macujapanuhini eta máitatiquene uvesa, te téchipaicavapuca te pusu te jena sache tacapicahuquenehi. Eta máeñamirahi, tipatsicava mavecuha eta paure sárare. ¹²Núti numetacahe: Ema maca achane tíapajucavahi eta téñamacare tayehe eta uvesa. Tacahe, tísapacaréchucha víchayare eta táuriqueneana te sávarumuhuana —máichavacapa.

¹³Tásiha, ema Jesús máichuhapa ema achane ticajumavahuhi:

—Nímaha. Picajaruvauchava, pímereca eta pivahu —máichapa.

Tacahe, ema achane eta macajaruvauchiravahi, enevanerinehi tinaraca eta mavahu. Tiúrivarepa tichava, tacutipá eta mavahu sapa. ¹⁴Tisemanarinehi ena fariséoana eta náimairahi eta máichaquenehi ema Jesús. Tiyanaapa. Tinacuchavanapa eta napanerechirahi eta nacapasirayarehi ema Jesús.

Ena Jesús tiyanavarepa tipaicaí

¹⁵Tacahe, ema Jesús, te máechapa eta napanererihi ena fariséoana, navairahi nacapaca, tiyanavarepa tipaicaí. Náehicapa ena camuriqueneana achaneana. Énerichuvare, náitecapauchapaipa ena nacajumaqueneana. Macanaracavacapaipa namutu. ¹⁶Mavanecapaipasera ena macanararuanaapahi vahi nacumetajirica eta émaírahi ticanaraca. ¹⁷Eta juca títauchavapahi eta máechajiriruvahi ema Viya tayehe eta májurehi ema víyahaini profetaíni Isaías. ¹⁸Ánipa tacahehi: “Nuvaraha ímatiya ema vanairucahi nuyehé, nunerejiruhi núti. Tétavacavahi eta némunasirahi, núrismurehivare máicha. Ímatiyare éma taicha mávaháruhi ema Espíritu Santo máíjararuhi éma. Ema nuvanara, túmitucavacayare ena achaneana te tamutu avasareana eta nuvanairipianahi. ¹⁹Éma, tájina máitucaimahi téhacaca. Váhivare tipiararecaimahi, macunachiravahi te cálleana tayehe eta máichaqueneanahi. ²⁰Mánsuhi éma taicha ticayehehi paciencia. Macamichavacahi namutu. Váhivare macajachaimahi nácani vahi túmeanaina. Tiámainucava te máejacapa tayehe eta mávacureyare, muracainapa eta mávacureyare. ²¹Tásihasera, namutu ena achaneana te avasareana ticunevanayare eta mayehé, navairayare máurichayare éma” macahepa ema Viya.

Ena fariséoana téjcapavanahi eta náimijachirahi ema Jesús mávaháruhi ema Váinaraji Satanás (Mr. 3.19-30; Lc. 11.14-23; 12.10)

²²Tacahe, ena achaneana námapaipa ema achane púchuqui, úpavare, taicha mávaháruhi ema éreana. Navarahahi macanaraca ema Jesús. Jéhesarehisera ema Jesús macanaracahi. Tiúripa téchejica, tímairiricavarepa. ²³Ichaperinehi nárami ena achaneana. Tásiha, ánipa nacahe:

—Ema maca Jesús, émapachupuca ema Cristo, ema vicuchapaquenehi mámariequene ema víyahaini David —nacahepa.

²⁴Énaserá ena fariséoana napanerechahi náepiyaequenehayarehi. Ánipa nacahe:

—Ema maca Jesús, eta macuchusiravacahi ena éreanana, vémeteaca máijjararuihi eta máitupajijiasiravahi mayehe ema Satanás, ema náquenu-murihi ena éreanana —nacahepa.

²⁵Ema Jesús máimatihí eta napanererihi éna. Tacahe, máichavacapa: —Nímicutichinahe puiti ena machanerana ema gobierno. Éna vahi típutsimuriahacanaímahi apinainahipucaini partido. Te típutsimuriacacanapa, énjacacaipapucaini tíáquipaicacana. Énaripa ena achaneana te avasare, vahi táurica náiputsimuriavahini. Émaripa mácani achane, te camurianahi ena machichanaveana, váiparinehivare típutsimuriavanimahi náehajiricacahini, énjiricacahini náquipairicacahini. ²⁶Ene macahehi ema Váinaraji Satanás, váiparinehi máisapahini típutsicacana ena machamuriana, taicha mavarahahi tisimutuanayarehi éna, tímiyanavanayarehi eta nacaetemajirisrahaviyarehi. ²⁷Éti ímijachaipa nútirichu machamuri ema Satanás, táichavenehi eta nuratahairahi nucuchucavaca ena éreanana. Tájina vahi étupicavahini éti eta juca epanereruana. Te émahipuca tímicatatanuhi ema Satanás, énerichuhivare éti máimicataruanahivare jácani éma, eta ecuchusiravaca ena éreanana. Epanerechinávanuma. ²⁸Émaquenehisera ema Espíritu Santo, tíjaracanuhi eta juca nuratahairahi nucuchucavaca ena éreanana. Eta juca étara ícutiaraya éti eta matuparasiranuhi ema Viya eta nútirayare nécha tamutu. Nútiripara nuti ecuchapaquenehi.

²⁹Nájina tisiapaimahi eta námerecahini te jácani peti matiarihíhi ema túmequenehi. Tacamunuhi nacaratacanumayare, náitiacanumayarehi éma. Jéhesare, náituruyechasareyarepa eta máimahaqueneana. Ene nucahehi núti, túmepananuhi mayehe ema maca Satanás.

³⁰Te vahi éhicanu, ecaemataneasiranuya, machamurihehi éti ema ticatianacanuhi. Masapiha ímicatacahi éma eta macaetemajirisiranuhi.

³¹⁻³²Nutupiruva numetacahe: Eperdonachacareana eti achaneana eta epecaturana, tamutu jácani échajísihaira eta táíñemahiqueneana. Jácani te ecaecahinuhipuca nuti Manerejirunuhi ema Viya. Jararihisera eta epecatura vahi tiperdonachacaremahi. Éti ímijachahi ema Satanás ema tiávahácanuhi. Ichape eta éjecapiravahi, taicha ema tiávahácanuhi núti, émaquenehi ema Espíritu Santo. Éti epanararacaripa éma. Tásiha, tájina eperdonachacareimahi puiti juca ítaresiraichaha, evetijipa te apana ítaresira —máichavacapa.

Ema Jesús máimicuticha eta táhi eta yucuqui

(Lc. 6.43-45)

³³Tímaticare eta yucuqui te tíurinisíhi eta tacahira. Tímaticarehivare eta apana yucuqui, máuriraha eta tacahira. ¡Epanerecha! Núti níchahi eta táuriqueneana nayehe ena achaneana ticatajivanahi. Éta tímereuchanuhi eta mávahásiranuhi ema Espíritu Santo. Téhesera nucaetemarecahini, níchahini eta máematanerepiana ema Váinaraji, jéhevareserapucaini eta tímereuchanuhini eta mávahásiranuinahini éma. ³⁴¡Étisera machichanaveanatataji ema Váinaraji!

Váiparinehi ítucaimahi échajisiha eta táurinaqueneana, taicha éti tamavera-siavahi eta evainarajivana. Eta échajirivanahi ticaecherahi eta evainarajiva te esamureana. ³⁵Nácani tíuriana achaneana, tatupiruvahi eta náechajirisirava taicha tíurihi eta nasamure. Nácansera achaneana váinarajiana, vahi tíurimahi eta náechajirisirava. Tíñemahipivacahi taicha tavayuchahi eta tavainarajiva eta nasamure. ³⁶Nutupiruva numetacaha: Te táitecapapa eta sache táitecapirayare eta juício, emutu ecayaserehiyare eta échajisihairana eta tamaeperajiqueneana. ³⁷Étaripa eta tivichaheyare. Téhesera tíurhipuca eta échajisihairahi, vahi ecaicuñaimahi. Tájina tivichahémahi —máichavacapa.

Ena Jesús macajachavaca ena fariséoana taicha eta namasuapajiravahi
(*Mr. 8.12; Lc. 11.29-32*)

³⁸Tacahe, nayaseacapa ena Jesús ena fariséoana énapa ena escribá-noana. Ánipa náicha:

—Tata maestro, vivaraha picuchucaini eta tiáramicare, te yátupipuca mavaneruvihí ena Viya —náichapa.

³⁹Ena Jesús majicapavacapa:

—¡Eti achaneana váinarajiqueneana! Núti nímatihe. Vahi esuapanuimahi, te nímercapucaini eta tiáramicare. Tásiha, váhinéni étina tatuparaca ímahahini eta tiáramicareana. Ímahayaresera eta tiáramicare tacutiyaare eta máichavaque-nevahi ena víyarahaini profetaini Jonás. ⁴⁰Taicha ena Jonás masiapajuechahi eta ichapequene jima, mapana sache eta mayerevahi, mapanavare yati. Ene nucaheyare, núti Manerejirunuhi ena Viya, mapanayare sache, mapanavare yati, eta nucaheyare eta nucaecarasirayare. ⁴¹Eta jena sácheyare téchepucanayare namutu, tiúchucuhanayare ena achaneana ticavasanáinili acane te Nínive. Tisipe-caturarahianahinéni éna. Natupiruvahisera nasuapa eta mametarairu ena Jonás. Téneuchavanavanehi. Tásiha, te jena sácheyare, nacahenapa eyehe éti: “Táuricapa nacaicuñaini ena nani maparajuruana ena Cristo, táichavenehi eta namasua-pirahi éma. Taicha éma, máuriquenepanahi mayehe ena Jonás” nacahénapa. ⁴²Tacutiquene esu reina Seba eta acane, te susamairiricapa eta máitupajijiasiravahi yátupi ena Salomón. Ésu, tayérehiquenehinéni eta suávasa, tiyanahisera sucapayaca ena Salomón taicha suvarahahi susamayarehi éma. Tacahe te téchepucanapa namutu, ésu suyaseacainapa eta ecaicuña éti máetupicushmani puiti. Sucahenapapuca: “Táuricapa nacaicuñahini ena nani máetupicushmana, tájina náetseraruina nasamaripa ena Cristo, ena títupajijiápanavahi mayehe ena Salomón, tásiha vuíchahacaruva nasuapa” sucahénapapuca jácani.

Ena Jesús máimicutichinahi ena masuapajirairahana mayehe
(*Lc. 11.24-26*)

⁴³Tímiyanava eta máechajisiravahi ena Jesús, ánipa macaha: —Énerichu-vare éti ecuti mácani achane máinajiruhi ena émana éreana. Ena éreana tiyana matanucainapa eta jácani masiapihayarehi. Eta mamaichimavira

eta mavarahaquene, mapanerechayarehi tichava. ⁴⁴Macahénapapuca: “Nuyanayare nuchava, nusiapayareva mayehe ema návaháruinihi”. Te títecapapa ema éreana mayehe ema achane mávaháruinihi, máimahapa ema achane máinajicaripa eta mapecaturana, vuíchahasera máehicahini ema Viya. ⁴⁵Tásiha, tiúrisamurepa ema éreana. Tásiha, tíchuarecapa ena sítequeneana machamuriana. Váinarajipanana éna. Nasiapahacainavarepa namutu éna. Jéhesare, tiápajucavapa eta mavainarajiva ema paure achane. Ene ecaheyare éti, taicha eta emasuapiranuhi —máichavacapa ema Jesús.

Suítecapauchapa esu maena ema Jesús énapa ena maparapenaveana
(*Mr. 3.31-35; Lc. 8.19-21*)

⁴⁶Tímiturecarichaha ema Jesús nayehe ena achaneana, títecapanecha esu maena énapa ena maparapenaveana. Nanasihisera te aneca. Navarahahi náechajicayarehi éma. ⁴⁷Natiarihíhi ena timetapananahi ema Jesús. Ánipa nacahe:

—Esu pémunaruquenehi pena énapa ena piparapenaveana, nararihi ani te aneca. Navarahahi téchajicaviana —náichapa.

⁴⁸Émasera majicapapa:

—Yátupi némunacavacahi esu meme, énapa ena nuparapenaveana. Nararihisera ani te juca nuchacaya ena némunaruanahivare, nuparapenaveanahi.

⁴⁹Tásiha, tisuvechahavípa viti mayeheana apóstoleana. Tásiha, macahepa: —Numetacahe, ena nani ena némunaruanahivare. ⁵⁰Taicha namutu nácani ticaemataneacanahi me Tata tiávilhahi te anuma, énahi ena némunaruanahivare —máichavacapa.

Ema Jesús máimicutichinavaca ena achaneana eta evaraqui
tacaevaquenehi te apanapanenejiquene máteji
(*Mr. 4.1-9; Lc. 8.4-8*)

13 ¹Te jena sache, tiyanavarepa ema Jesús, macaijuhe te tachausi eta cáquiure. Téjacavarepa eta ánaqui eta máimituresirayarehi. ²Tásiha, camurianapahivare ena achaneana títecapauchanahi éma. Eta navayuchiraripa ena achaneana, tiyanapa ema Jesús tiávacuhapa tayehe eta pacure. Ena achaneana nanasipa te tachausi tiájipahi. ³Tásiha, camurihi eta máimicutichaqueneanahi eta máimitusiravacahi. Ánipa macahe:

—Matarihi ema émana achane. Tévanapanahi te máesane. ⁴Eta mapaisirapahi, témiricapaipa eta evaraqui te achene. Táimahapa eta cáyure, tanicapa.

⁵Eta mayherepi éma eta máevasira, máevajajapaica eta apaquehe. Tásiha, eta apamuri evaraqui témiricapa te váhirichu tamitutihini eta máteji taicha máripahi eta apaquehe. Tímarucavanepaneni táicha. ⁶Téhesera te tíjurepa eta sache, tacapajicapa; taicha váhirichu táuparevacahíni. ⁷Tacahe, eta apana evaraqui témiricapaipa te tataracu eta itapepaire. Tiúrinahinéni eta táimarusirahi, étasera eta itape tacachuricapa eta tajurusirahi. Táemuriachapa eta sucureca. ⁸Tacahe, eta apamuri evaraqui témiricapaipa te tiúrina máteji. Tiúrina-

panahi eta tajurusira. Eta étana, ticahipa tétupicavapanapa. Eta apanavare, ticahipa ánimuríchu. Eta apanavare, ticahivare apaesasajiruichu. ⁹Esamararacanu emutu éti. Te evarahapuca ecaicutiara, tavaraha eta epanerechinavayare.

Ena Jesús máitametacaquenevacapa ena apóstoleana eta juca máimiturapihi
(*Mr. 4.10-20; Lc. 8.9-15*)

¹⁰Tacahe, viti mayeheana apostóleana vémeñhavapa eta mayehe ena Jesús. Viyaserecapa tájahapuca tacayemahi eta máimicutiarachirava-caichucha eta máimitusiravacahi ena achaneana.

¹¹Tásiha, ena Jesús tijicapahavipa:

—Ena Tata tituparacaruhi nítametacaheyare éti eta juca táequenereruana mapanereruana. Mavaraha ímatiequenehaya éti. Énaserá ena apamuriana achaneana vahi nítametacavacaimahi, náimainavainepa éna. ¹²Éti, te esuapa yátupihí eta nímiturapiána, ena Espíritu Santo títimucaheya tamutu eta tacayemaqueneanahi. Énaserá nácani vahi návarahahini nasuapa, énajivayare tíchavana ticaverejicasianaya eta nasamaqueneanahi. ¹³Eta tacahehí eta nímitusiravacahí, nímicutiarachinavacaichucha. Te apaesarichu eta navarairahí náituca, vahi nacaicutiarahini eta juca nímechaqueneanahi. Nasamahí eta néchajiriruvana, váhisera nacaicutiarahini eta nímitusirahí. ¹⁴Puítí ena nani achaneana nacutí ena achaneana acane, vahi nasuapahini ena víyarahaini profeta Isaías. Ánipa macahe: “Nímatihe éti. Esamayarenénipuca, váhisera ecaicutiaraimahi. Ímahayarehinénipuca, váhivaresera ímatiequenehaimahi. ¹⁵Taicha eta esamureana eti achaneana, tétavicavahí eta tamuracava. Vahi evaraha esama. Épiyacavahivare púchuquilhe, emavarairahí esuapahini te esamureana. Tájinapa táichahíní vicuchapahini eta éneuchiravainahíní, evarairapucaini ecasiñavahini me Viya, apaesa macanaracahehini” macahepa ena víyarahaini Isaías.

¹⁶Étisera eti nímitureana, tétavicavahí eta iúricacarevahí, taicha esuapahí eta juca ímahaqueneanahi étapa eta esamaqueneanahi. ¹⁷Nutupiruva numetacahe: Acane ichapemuriana ena achaneana tíuriana énapa ena víyarahaini profetana, tétavicavahí eta navarairahí tímatinuana, náimahavare eta juca níchaqueneanahi ímahaqueneanahi. Navarahavarepa nasama eta nímituresirahí. Váipasera nacapayacahini.

¹⁸Ácaicutiaraicha eta juca nímicutiarachaquenehí mayehe ena tévacarahí. ¹⁹Núti níchuhavaca ena achaneana, machaneranayare ena Viya ena téhicanuanayare. Tásiha, natiarihí ena achaneana nasamaripahinéni eta nímiturapiánahi, émasera ena Váinarají vahi máisapahini tánasihini te nasamureana. Enevanehí macamitiscavaca eta náimitucasivanainihí. Éna nacutihí eta máteji muracapahiquenehí te achene. ²⁰Natiarihivare ena apamuriana achaneana, nacutihí eta máteji máripahí. Te nasamararaca eta nímiturapiána, natupiruvanehí nasuapa, tíurisamureanainehí. ²¹Váhisera náratahahini nacaravahuhini yátupinahíni. Vahi nácutihíni eta evaraquí tíuparehí. Ánipirichu eta náehisirahí, taicha vahi nacamichahini jácani nacatajivairanahí. Váhivare túmesamureanainahíni te

tatiarhipa eta jácani nacatichaira ena achaneana táichavenehi eta náehisiranuhi. ²²Natiarhivare ena apamuriana achaneana nacuti eta máteji te táviahahi eta itapequijiana. Énerichuvare nasamararacahinéni eta nímiturapiana. Napaneréquenehahinéni, tahapapiricavacahisera eta jácani táchararacavayarehi eta náitaresira. Tavayucavacavare eta tájiparacana, étapa eta navarairahi tirricochavana. Tamutu eta juca táemetavícahi eta navarairahi téhicanuana. Tamapurujiyarehi eta najacpirahi eta nímiturapiana. ²³Natiarhisera ena apamuriana achaneana nacutihi eta tíurina máteji. Éna, tisamanuanahi. Náunacahi yátupi eta nímiturapiana, náimatiequenehairahi. Tájinavare náichiravainahíni eta náehisiranuhi. Ichape eta nacaemataneasirahi ema Viya. Nararihi ena apasarichu eta nacaemataneasirahi. Nararhivare ena apamuriana, nativarerehapanapa eta nacaemataneasirahi. Tásiha, ena apamuriana, ichapemuripapanapa eta nacaemataneasirahi ema Viya —macahepa ema Jesús.

Emá Jesús máimicutiarachina eta sucureca trigo étapa eta ejare

²⁴Emá Jesús máimicutiarachavare ena achaneana eta máimitusiravacahi: —Puiti nuvaraha nímitucahe tatiarhiyare eta sáchezare te táitecapapa eta nacayeserehiraya me Viya ena achaneana. Tacutihi eta máichavaqueneva mácani achane tévacarahi eta tíurina evaraquí tayehe eta tíurina máteji. ²⁵Étasera te tímacapa ema ticayehe eta sucureca, macahepaipa ema macatianaru. Máimisiriqichinapa eta táíñemahiqueneana ejare. Tásiha, tiyanapa. ²⁶Tacahe, te tímarucainipa eta evaraquí trigo, tíuchucavarepa eta ejare, tacachanepaipa eta evaraquí. ²⁷Náraminehi ena machaneranahi ema achane tévacarahi. Tiyananapa nametapana ema náejaháruhi. Ánipa náicha: “Tata, eta jena pévaraquihi, tájina tacasiriquihini eta táíñemahiqueneana ejare. Puítisera tíuchucapa tacachanepaipahi eta pévaraquihi” náichapa. ²⁸Emá náejaháruhi majicapapa: “Matiarihi mácani ticatianacanuhi. Éma tíchahi eta juca, tímisiriquichinanuhi”. Tásiha, ema machanerana náichapa: “¿Pivarahapuca, tata, viyana víti vivepuríha eta jena ejareana?” ²⁹Éma majicapapa: “Vahi tíuririne, taicha machu táimivepurica eta névaraquí trigo. ³⁰Tácaticacárichaha eta tajurusirayare. Tíámainucava te tacaechatíjipa, nuvanecahénapa éti nuchanerana tativayare evepurica eta ejarejiana, ítíjicainapa eta tacaijui-rayare. Tásiha, evehainasarepa eta trigo, ticaunainapa te tacaunairare”.

Emá Jesús máimicuticha eta taquí eta mostaza

(Mr. 4.30-32; Lc. 13.18-19)

³¹⁻³²Emá Jesús máimicutiarachavare eta taquí eta mostaza eta máimituresirahi. Ánipa macahe:

—Puiti nuvaraha nímitucaheya eta apana tayehe eta evaraquí ánichichaquene, étasera te tíjurucapa, tíñejiyarehi. Tacaheyare eta tajurusirayare eta nímiturapiana nayehe nácani tíjacapanayare. Ímatichuhi éti eta taquí eta mostaza, eta ánichichapanahi tayehe eta apamuriana evaraquiana. Tásihasera

te tímarucapa, tiúnayarehi eta táenaqui, tacutiyahehi eta yucuqui eta táichapeva. Tacachuricayarehi eta apamuriana evaraquiána. Járájapainapa eta cáyureana. Táepiyacainapa eta tamacajiana te tatavavajiana. Ene tacaheyare eta tajurusirayare eta nímiturapiana núti Manerejirunuhi ema Viya.

Emma Jesús máimicuticha eta levadura

(Lc. 13.20-21)

³³Énerichuvare máimicutichina eta juca apana máimituresirahi. Ánipa macahe: —Tacutiquene, eta juca nímiturapiana tímicutijiricavahi eta levadura. Esu súcáni esena tíúrihi eta tasisjísira eta suyehe levadura te tamutu eta suépiyaruhi masa, tayanapane apinapucaini arroba eta suyehe jarina, tasihajicahisera. Jéhesare, tiápuçayarehi tiuri.

Camuri eta máimicutichaqueneana

(Mr. 4.33-34)

³⁴Emma Jesús tamutu máimicutiarachinapahi eta máimituresirahi. Tájina étahena te tímitureca, vahi macunacahini eta máimicutichinaqueneana. ³⁵Títauchavahi eta juca máechajiriruvanahi ema émana profeta. Ani macahehi: “Tamutu eta nímiturapianayare nímicutichinayarepahi. Nímicaecherachainapa eta táeñaurevaquenehi te tépanavainapa máepiyacainapa ema Viya eta apaquehe” macahepa.

Emma Jesús máimicaecherachapa eta máimicutichaqueneanahi tayehe eta trigo étapa eta ejare

³⁶Tacahe, ema Jesús mavanecavacapa ena achaneana nayanapa te napenana. Éma apanava tiyanavarepa tichava te mapena, vítipa viti mayeaneanahi apóstoleana. Tacahe, te véjacapa vimutu, viyaserecapa máimicaecherachahini eta máimiturapihi máimicutichaquenehi eta ejare tacachanequenehi eta trigo. ³⁷Tacahe, ema Jesús máichahavipa:

—Nuti Manerejirunuhi ema Viya nucutihi ema achane tévacahi eta tíurina evaraqui. ³⁸Eta apaquehe tacaevaiyahi eta trigo, énahi ena achaneana te juca apaquehe. Eta tíurina evaraqui, étihí eti nuchaneranahi núti. Tásiha, eta ejare énahi ena machaneranahi ema Váinaraji. ³⁹Taicha ema ticatianacanuhi, manacahi eta ejare, mavarairahi máepacuchayarehi eta névaruhi núti. Eta tacaechatijirapa eta trigo, étahi eta táitavirayare eta apaquehe. Nárájapayarepa ena ángleana, ticurujiricanayarehi. ⁴⁰⁻⁴²Tásiha, te jena sáchezare, nuti Manerejirunuhi ema Viya nuvanecainapa ena nuyeheana ángleana nacavehasi ena tíchanahi eta máeperajiqueneana énapa ena tímiaquipaicana ena apamuriana achaneana. Tásiha, náquijicavacainapa eta te táijurequenehi yucu. Ticapitiquiahechavanainapa eta tacativayare nasama. Tíyahanainapa. ⁴³Tásiha, nácáni títauchanahi eta mavanairipianahi ema Viya, tétaçicavayare eta najaraivayare

tacutiyare eta tajaraiva eta sache. Téjacanainapa tayehe eta macatuparahaiyahi ema Vicaiyaquene. Te evarahapuca ecaicutiara, tavaraha eta epanerechinavaya.

Emá Jesús máimicuticha eta entierro

⁴⁴Eta nímiturapiana nuti násihaquenehi te anuma tacuti eta tayumuruvevaquenehi entierro. Te máichimavahi mácani achane eta entierro, tíurisamureyarehi. Tásiha, máimichavayarehi mayumuruca tayehe eta apaquehe távihahi. Mavacharecayarepa eta apaquehe, mavarairayarehi eta entierro. Tayanapane táimijararecayarepa tamutu eta macayehequeneanainihi.

Máimicutichavare eta perla tasivachaquenehi

⁴⁵Énerichuvare eta najacapirahi ena achaneana eta nímiturapiana nuti násihaquenehi te anuma tacuti eta macaematanerahi mácani achane comerciantepahi. Matanucapahi eta tasivachaqueneanahi perla. ⁴⁶Te máichimavapa eta perla matanurepahi, tétavicavahi eta tasivachavahi. Mavarahasera mavachareca eta perla, tayanapane táimijararecayarehi tamutu eta macayehequeneanainihi.

Máimicutichavare eta ichape nayutahe

⁴⁷Énerichuvare nuvaraha nímitucahe tayehe eta sáchezare eta táitecapirayarehi eta ecuñaraqui. Tacutihi eta ichape nayutahe. Te náechipaecapa te cáquiure, tamutu tavehayarehi eta tasimutuqueneana jímana. ⁴⁸Te náimahapa tínica eta nayutahe, navehayarepa nachurupaicapa te tiájipahi tachausi. Nanerejicayarepa eta jímana tíurinana. Nanacacuhayarepa te ichape maha. Tásiha, náquijicayarepa eta apamuri máurirahanahi. ⁴⁹Ene tacaheyare eta táitavirayare eta apaquehe. Nárajapayare ena ángeleana, nanerejicainapa ena achaneana tíchanahi eta tamauriqueneanahi. ⁵⁰Náijuchainapa te yucu, táetaviuchahi eta táijureva. Ticapitiquiahechavainapa eta tacativayare nasama. Tíyahanainapa —macahepa ema Jesús.

Emá Jesús mayaserecavaca te nacaicutiarahipuca eta máimiturapianahi

⁵¹Tacahe, ema Jesús tiyaserecavavipa. Ánipa macahe:
—¿Ecaicutiarapuca éti tamutu eta juca nímiturapianahi? —máichahavipa.
Tásiha, víti vijicapapa:

—Vicaicutiara, tata —vicahepa.

⁵²Tacahe, máichahavipa:

—Eta yátupirapa eta ímatiequenehairapa eta nímiturapiana, éti apanavare máestrohénapa. Puiti nutuparacahe ímitucavacaya ena achaneana. Tétavicavaya eta ítamuturusirayare eta ímituresirayare eta mapanereruana ema Viya —máichapa.

Tichavapa ema Jesús te mávasa Nazaret

(Mr. 6.1-6; Lc. 4.16-30)

⁵³Te tamutupa eta máimicutichirahi ema Jesús eta juca máimiturapiana, viyanapa. ⁵⁴⁻⁵⁷Vichavapa tayehe eta mávasa. Te sávarumuhuquenepa, viyanavarepa tayehe eta náurujsirareva eta nayujarauchirahi ena achaneana. Tímiturecapa ema Jesús. Ichape eta tahapasamurechiravacahi ena achaneana. Váhiserá návarahahini nasuapahini. Náepururichucha éma. Ánipa nacahe:

—Témunahiricava eta máitupajjiasiravapahi ema maca. ¿Távihásica macaravahuinehi eta máichirayare eta tiáramicareana? Vivaraha vímaha víti apanava eta jácáni máichaqueneanahiji visamaiririuana. Taicha vímatihí ema maca. Carpintérohi éma. Vímativare ema máiyaini, ésupa esu maena María, énapa ena maparapenaveana ema Jacobo^d, ema José, ema Simón, émapa ema Judas. Vímativare ena esenana maparapenaveanahivare, ticavasanahi eta ani. ¿Távihásica máitusiavahi eta juca máitucaqueneanahicacha? —nacahepa.

Émasera máichavacapa:

—Tatuparaca epicauchahaviya vimutu víti mavaneruana ema Viya. Étisera éti nujaneananahi ecavasanahi eta te juca viávasa, étipa eti nuparapenaveana, vahi epicauchanuimahi —máichavacapa.

⁵⁸Tásiha, tájina máimerecachichaini eta tiáramicareana táichavenehi eta namasuapajiraivanahi, váhivare nacasiñavahini eta mayehe.

Ema Herodes masamairicapa eta máichaqueneanahi ema Jesús

(Mr. 6.14-29; Lc. 9.7-9)

14 ¹Tacahe, ema Herodes ema aquenucahi tayehe eta Galilea masamairicavarepa eta máichaqueneanahi ema Jesús. ²Tacahe, ema Herodes máimijachahi ema tichavahi técheputa ema Juan. Tásiha, máichavacapa ena máevanachanahi:

—Ema mácara, émaripa ema Juan Tícachasiricarahi, ema nímica-paruhi. Tichavaripa técheputa te máecari. Táitusiava máiturucahi macuchuca eta tiáramicareana —macahepa.

³⁻⁴Taicha ema Herodes mavehahi esu Herodías, esu machinenahi, mayenahi ema maparape Felipe. Máiminajicapa ema suima. Tacahe, ema Juan macajachavacaripa éna eta naviracacairahi. Éta tamicatichahi ema Juan, sucatichapa esu Herodías. Tásiha, ema Herodes máeratacapa te cárcel ema Juan, macavanaripipa náitiaca te cadena. ⁵Taicha supamicahi ésu eta máimicapasirayarehi. Tipichiserá éma nasemahini ena achaneana. Taicha ema Juan, tétavicavahi eta náemunasirahi ena achaneana. Náimatihí éma, eta vanairucairahi me Viya.

d Mt. 13.54-57 Ema maca achane, ticajarehi Jacobo te náechajiriruva ena israelítana. Te véchajiriruva, ticajarehi Santiago. Mapaenumavahi máehica ema Jesús te táequenepa eta máechepusirahi te máecari ema Viáquenu.

⁶Tásihasera, títecapapa eta sache máijaremuhu ema Herodes, sutirihahi esu amaperu, suchicha esu Herodías. Tiúchucapa tírimaica te mamirahu ema Herodes, énapa ena machimaranahi. Ema Herodes máuricainehi ichape. ⁷Tacahe, máichapa ésu:

—Nujaracha te pimirahu, eta njarasiraviya jácani piyasearunuyare —máichapa.

⁸Tásiha, esu amaperu suyaserecapa esu suena tájahahipuca eta suyasearuyarehi. Esu suena suímitucapa: Piyaseacayare ani píchaya: “Píjaracanu eta ñichuti eñi Juan te curuja” píchayare.

⁹Tásiha, eta masamirahi eta juca suyasearuhi, ema rey Herodes ichape-rinehi eta mapanereresirahi. Tájinapasera máicharacavahini taicha máechajiriruvaipahi majurachaipahi te namirahu ena machimaranahi eta máijarasirayare eta suyasearuyarehi ésu.

¹⁰Tacahe, macavanairipipa nayuchatipiquenuhapana ema Juan. ¹¹Tacahe, námapaipa te curuja eta machutini, nájaracapa esu amaperu. Tásiha, ésu sujacapa, suíjaracapa esu suena.

¹²Títecapananecha ena máimitureanahi ema Juan. Navehapa eta máquehe, náecarapanapa. Tásiha, tiyananapa nametapanahi ema Jesús.

Ema Jesús máitaparavaca máenicavaca ena camuriqueneana achaneana
(*Mr. 6.30-44; Lc. 9.10-17; Jn. 6.1-14*)

¹³Te masamairiricapa ema Jesús eta nacapasirahi ema Juan, viyanapa viávacuhapa tayehe eta pacure. Vicaijuhepa tayehe eta apaquehe mávapahi. Énaserá ena achaneana náecharichucha eta viyanirahi. Tiyananapa náehichahi tipaicanapahi. ¹⁴Te tiúcupaicapa ema Jesús tayehe eta pacure, máimahapa ena camuriqueneana achaneana. Majapanuvarinehi eta máimairavacahi. Macanaracavacapa ena nacajumaqueneanahi námaqueneanapahi. ¹⁵Tacahe, viti mayeheana apóstoleana vímahapa eta cáperehíchicharínehi. Vimetacapa éma máevatumuríhahini ena achaneana natiarihiqueneanahi. Víchapa éma:

—Cáperehipa jena sache. Tiyerehivacahi eta pétiana. Táuricapa pivane-cavaca ena achaneana nayanapa, navachareca eta nanica; taicha ani tájina naviyavaimahi eta te juca —víchapa.

¹⁶Ema Jesús tijicapahavipa:

—Vahi nuvaraha nuvaneca nayana. Tájina naviyava eta nácaijuhehine. Íjaraca étina eta nanica.

¹⁷Tásiha, viti víchapa:

—Tájina vácayehe eta tinicacare. Jucarihisera cínochichahi eta pan, apina eta jima.

¹⁸Ema Jesús máichahavipa:

—Íama ani.

¹⁹Tacahe, macavanairipipa náejahahapaica ena achaneana te táinahu eta muíjipahi. Mavehapa eta cínoquene pan étapa eta apina jima.

Máesenicapa eta anuma. Mahasulupayachapa ema Viya. Mayuvetucavacapa eta pan, tásiha, tjaracahavipa víti. Víti vjaracavacapa ena achaneana. ²⁰Vinicapa vimutu, visatuhevacapa. Tásiha, vicaemacharichahavare doce saye ichapehiana táinicachaichahava eta vémacharajiana.

²¹Ena tinicanahi eta juca, cinco mil ena ajairana eta náichapemu-rívahi, énerichuvare ena esenana énapa ena amaperuana.

Emá Jesús mapaicaeca eta une

(Mr. 6.45-52; Jn. 6.16-21)

²²Tiuri, ema Jesús tivanecahavipa viti mayeheana apóstoleana viávacuhayare eta te pacure. Vínapucayarehi viánueca te apachara eta cáquiure. Émasera manasiyarehi máevatamuríhanumayarehi ena achaneana nachava te napenana. ²³Te tamutupa eta macametavairahi ema Jesús nayehe ena achaneana, tiyanapa tiápanahi tayehe eta cerro. Tiyujaracayarehi tayehe. Étapa tavinehi eta yati, manasipa macarichuhi eta te cerro. ²⁴Tacahe, víti te túpierecaviripahi, tichimarahavipa eta muraca técticava, viácapaquihaipahi. ²⁵Te tjararahichichapa, vímahapa ema Jesús mapaicaecapahi eta une eta macapayasirahaviya. ²⁶Eta vímairahi éma, vipicarinehi. Vímijachapa cunare. Vipiararecapa eta vipisirahi.

²⁷Émasera ema Jesús téchajicahavipa:

—Vahi ecupica. Nútichucha. Étumehava —máichahavipa.

²⁸Tásiha, ema Pedro majicapapa:

—Te yátupipuca pítiquenehi, piti Tata, pivanecanu núti apanavare nupaicaeca eta une. Nuvaraha nupauchavi —máichapa.

²⁹Emá Jesús majicapapa:

—Yare, pipauchanu.

Enevanepa tiúcupaicahi te pacure ema Pedro. Tiyanapa mapaicaecapa eta une, macapayacayarehi ema Jesús. ³⁰Étasera eta máramesirahi taicha eta muraca técticava, timutserahavapaipa téricapaipa. Tásiha, tipiararecapa:

—¡Picatajicanu, Tata! ¡Néricainapa!

³¹Enevanepasera macaratavauchapa ema Jesús eta macuchucuirayarehi. Tásiha, máichapa:

—¿Ticamitisicavipapuca eta pipisirahi eta picasiñanuirahi?

³²Te tiávacuhapa ema Jesús émapa ema Pedro tayehe eta pacure, enevanepa tésamiricavahi eta técticava. Tíchecapa eta táepacucairahi.

³³Tacahe, viti apamuriana vicunachainehe ema Jesús eta vímairahi. Vépyumurihapa te mamirahu. Tásiha, víchapa:

—¡Jéhevare piti Tata, Machichaquénévihi ema Viya! —víchapa.

Emá Jesús macanaraca ena nacajumaqueneana te avasare Genesaret

(Mr. 6.53-56)

³⁴Tacahe, te apanapa sache, viápechavavarepa viánueca eta cáquiure. Vítecapapa eta te apaquehe ticajare Genesaret. ³⁵Tásiha, ena achaneana

ticavasanahi tayehe náimativanehi eta émairahi ema Jesús. Timetajiricacanapa náechapa namutu ena achaneana ticavasanahi te avasareana. Tiyananapa mayehe ema Jesús, námavacapaipahi namutu ena nacajumaqueneana. ³⁶Nayaseacapa éma eta máisapirainahíni námamajiaca eta tacheyarapi eta mamuiriha. Tacahe, nácani témamajiacanapahi, enevanepaipa tinaracanapahi.

Emá Jesús mametaca ena achaneana eta timaeperajicarahi

(Mr. 7.1-23)

15 ¹Tacahe, títecapanapa ena apamuriana fariséoana tíásihanahi tayehe eta Jerusalén, énapa ena escribánoana. Témeñahavanapa eta mayehe ema Jesús. Ánipa naicha:

²—Pímaha, ena pímitureana vahi náitauchahini eta viyeherepiana. Namaeperajicapa eta náchanevana eta nanisirahi taicha vahi nacasipavahunumahini. ¿Tájaha tacayema vahi napicauchahini eta viyeherepi nanaquiruhi ena viáchucanaveanaini? ¿Étaserapuca tacahehi eta pímitusiravacahi? —náichapa.

³Tásiha, ema Jesús majicapavacapa:

—¿Tájaha tacayema éti apanavare, vahi ítauchahini eta mavanairipiana ema Viya, tasapihapa epicauchahi eta eyeherepiana nanaquiruhi ena iáchucanaveanaini? ⁴Emá Viya ani macahehi eta macavanairipirahi eta viyehe: “Pipicauchaya pémunacayareva ema piya ésupa esu pena”. Jucaríhi eta apana vanairipi: “Ecapacayarehi mácani tñnemahi eta nacayemaquene mayehe ema máiya, ésupa esu maena”. ⁵⁻⁶Étiserá vahi epicauchahini eta júcana mavanairipiana ema Viya. Taicha te mararíhi mácani achane ticamavahupuca me Viya eta máimahaqueneanahi, eta ímitucasivahi éti: “Vaipa tatuparaca ema achane eta máimicatasiraya ema maiya ésupa esu maena”. Tasapihapa, ichape ticapicahuhi eyehe eta eyeherepiana. Étaserá eta mavanairipi ema Viya, vaipa epicauchahini. ⁷¿Éti ecáijarehi apimirana! Tatupiruvahi eta máechajiriruvahi ema Viya, téchajisiahehi éti eta te Sagrada Escritura^e. ⁸⁻⁹Ánipa macahe: “Ena nani achaneana, tétserajicanuanahi te najaca; váhisera táetupicavahíni te nasamureana. Téneuchavanahi eta nuyehe, tamapurujihisera eta náeneuchiravahi. Nacaerajicahivare eta nuvanairipiana; tasapihapa náimicapicauchahi eta nayeherepiana táuchurechucha te napanereruana ena náchucanaveánaini” macahepa ema Viya.

¹⁰Tásiha, máichuhavacapa ema Jesús ena achaneana. Ánipa máicha:

—Nuvaraha esamanu yátupina, apaesa ácaicutiara. ¹¹Tájina máeperajina eta viáchanevana te vinicapuca eta vimacasipavahuiranumahini. Jácani tasiapaquenehi te vijaca, tájina tamaeperajicahivahini. Vahi étaparacaina. Étaserá eta evainarajivana táuchureanapuca te ejaca, étapa eta evainarajipanereruanahi, jéhevare éta timaeperajicahehi —máichapa.

¹²Tacahe, viti mayeheana apóstoleana vémeñahavapa eta mayehe. Vimetacapa:

e Mt. 15.7 Májurehi ema víyarahaini profeta Isaías eta juca máechajiriruvana ema Viya.

—Ena nani fariséoana tiseமானahi taicha eta juca píchiravacahi —víchapa.
 13 Émasera máichahavipa:

—Ena nani nacutihi eta ejare, vaipa émainahi máechahini ema Tata Nucaiyaquene. Ticavepuricasianayaresera éna. 14 Ésamiricachucha. Vahi ecuimisiapava nayehe, taicha éna, púchuquianahi tayehe eta juca nímitu-rapiana. Ena púchuquiana, te tichurucacanapuca, tiáquipaicacanayarehi táicha vahi náimahahini eta nayanihayarehi —máichapa.

15 Tásiha, ema Pedro mayaserecapa:

—Picatajichavi pímitucahavi apaesa vímatiequeneha eta juca pímicu-tiarachirahi eta táuchureanahi te vijaca —máichapa.

16 Ema Jesús máichahavivarepa:

—¿Énerichuvare éti mapanererehehi? 17 ¿Váhipuca ácaicutiarahíni eta juca? Tamutu eta juca tasiapaqueneanahi te vijaca vinicasareanahi, tatupiru te viami. Tásiha, te tiúchucapa, apanapa eta táuchusihahi. Vahi timaepera-jichahavimahi. 18 Étaserá jácani táuchurehi te vijaca tásihaquenehi te amahe eta visamure. Eta taurivahi eta náechajisirana ena achaneana, étara timaepera-jicavacahi éna. 19 Táicha jácani táíñemahiqueneanahi paner-rucana, eta tásihaqueneanahi te nasamureana. Ema achane mapanerechahi maveha esu apana esena mayena ema apana achane. Esu esena supane-rechahi suveha ema apana achane suima esu apana esena. Ena amaperuana napanerechahi eta natuhusivaya. Nácanivare, tipanerechanahi eta ticapa-recana, tiámerecana, tivayurecana, téchajihiana. 20 Tamutu eta juca panerercana tauriqueneana, te náichahi ena achaneana, éta timaepera-jicahi éna. Étaserá jácani nanicaqueneana, tayanapanepuca vahi náichahi eta nayeherepi eta nasipavauchirava, vahi tamerajicaimahi —máichahavipa.

Esu ésuna esena apavasana sucasiña ema Jesús

(Mr. 7.24-30)

21 Tacahe, tiámahavivarepa ema Jesús te apana avasareana táunavahi eta departamento Siria, návasa ena apaechajiriruvana. 22 Ánaquí, ticapayacahavipa esu esena. Supiaracapaipa eta supauchirahi ema Jesús. Ánipa sucahe:

—Pájapanunu, tata. Píti yátupiquenevihi Cristo, ñvaneruvihi eñi Viya, vicuchapaquenevihi. Esu nuchicha ñávahácahi eñi éreana, tétávicavahi eta sucatajivairahi. Picatajicanu, tata, eta picanarasinanuini ésu nuchicha —suíchapa.

23 Émasera ema Jesús vahi majicapahini. Tipaicapaichucha. Vipauchapa viti mayeheana apóstoleana, vimetacapa éma:

—Tata, pévatata suyana esu suna esena apavasana tipiararecapahi te véquene —vicahepa.

24 Tásiha, ema Jesús máichahavipa:

—Jéhevare eta epanereruhi. Ema Tata tivanecanuhi nacarichu néchapajiricayare ena vijaneanana israelítana. Nacutihi éna eta uvesana máquensureana, taicha ticamununanahi eta nujaneasiraya —máichahavipa.

²⁵Ésusera esu esena tépuyucapa te mamirahu. Suíchapa:
—¡Tátachicha, picatajicanupaini, pímicatacanu! ¡Picanarasinanuini esu nuchichasami! —suíchapa.

²⁶Ema Jesús majicapapa:
—Nativa néchapajiricavacaya ena nujaneanana. Taicha vahi táuricahini ásapihahíni néchapajiricahehíni éti apavasanana émetavicahíni ena nujaneanana —máichapa.

²⁷Esu esena sujicapapa:
—Énehinehi tacahehi, tátachicha. Yátupihí vahi pijaneananuinahini. Pájapanunusera, picatajicanuchuchaini. Víti apanava vácasiñavahi eta piyehe eta vítátijivairaina —suíchapa.

²⁸Ema Jesús majicapavarepa:
—Páureví piti nuchicha, ichape eta picasiñavairahi eta nuyehe. Puiti títauchavayare eta piyasearapihi nuyehe. Nucanarasinaviyare esu pichicha —máichapa.

Jéhesare enevanepa tinaracahi esu amaperu.

Camurianahi ena nacajumaqueneana macanararuanahi ema Jesús

²⁹Tacahe, tiyanavarepa ema Jesús. Véhicavarepa víti apanava. Vichavavarepa te Galilea. Tásiha, vijuchehausichapaipahi eta cáquiure, vicaijuheya eta te mávapahi apaquehe anuquerehi, te távihahi eta céroana. Vinasipanapa eta jena sácheana eta ánaqui. ³⁰Tacahe, nacahepaipavare ena camuriqueneana achaneana te viávihahi víti. Námaquenepanepahi ena nacajumaqueneana: ena masariana, énapa ena púchuquiána, énapa ena úpana, énapa ena túpupáiqueana. ³¹Namutu ena nani nacajumaqueneana macanaracavacapaipahi éma. Ichaperinehi eta náramirahi ena achaneana eta náechajisiraipa ena úpana, énapa ena túpupáiqueana tinaracanaipa, tíuripaipa eta napaisira ena masariana. Tímairiricanapaipa ena púchuquiána. Eta náurisamurevapahi, nacunachapaipa ema Viya.

Ema Jesús máenica ena cuatro mílqueneana achaneana

(Mr. 8.1-10)

³²Tásiha, ema Jesús tíchuhavipa viti mayeheana apóstoleana. Máichahavipa:
—Nujapanuvaca ena nani achaneana natiarihiqueneanahi ani, taicha mapanaripahi sache puiti eta nacahehi eta viyehe. Tájinahivare naviyahini nanica. Nujapanuvacaicha névatacavacahini, machu náquipaicava te achene taicha eta náecuavana. Vájapanu eta náecuava, vénicavaca —máichahavipa.

³³Tásiha, víti vijicapapa:
—¿Távihapucaini vítusiavahini eta tinicacare eta te juca mávapahi vámahi? ¡Váhivare vítaparahaimahi vénicavaca ena nani camuriqueneana achaneana! —víchapa.

³⁴Tacahe, ema Jesús tiyaserechavipa:

—¿Áyanachaha eta pan eta íamaqueneanapahi?

Víti vijicapapa:

—Jucarihi siéterine. Ánimurichicharinehivare eta jímachicha —vicahepa.

³⁵Tásiha, macavanairipipa eta náejahapaimurihahíni namutu te apaquehe.

³⁶Mavehapa eta siétequene pan, étapa eta jímana. Mahasulupayachapa ema Viya. Tásiha, mayuvetucavacapa, tjaracahavipa víti. Tásiha, víti vjaracavacapa ena camuriqueneana achaneana. ³⁷Tacahe, vimutu vinicahi, visatuhevaca. Vicaemacharichahavare. Siétehi eta sáyeana táinicaruhi eta vémacharajiana. ³⁸Eta nasimutuvahi ena achaneana, cuatro mlqueneana ena ajairana. Natiarihihivare ena esenana énapa ena amaperuana. ³⁹Te tamutupa eta juca, mavanecavacapa ema Jesús ena achaneana nayanapa nachava te napenana. Tásiha, éma tiávacuhavarepa te pacure. Vivanavarepa. Vicaijuhe eta te avasare Magdalena.

Ema Jesús mápechavare mayunacavaca eta namasuapajiraivahi ena fariséoana

(Mr. 8.11-13; Lc. 12.54-56)

16 ¹Tacahe, ena apamuriana fariséoana énapa ena saducéoana napauchapa ema Jesús. Eta navarairahi náemejecapavacha éma, nayaseacapa máimerec ahini eta tiáramicareana, máimerec ahini te yátupihipuca vanairucahi me Viya. ²Émasera majicapapa:

—Te cáperehichicha, te ímahahi eta táitsirahi eta úcaji, éti ímijacha tímiyanavayare eta tiúriyare eta sácheana. ³Te yáticarahi, te ímaha eta timapicurume, títsitsimehi, ímijachahi tiquivayare. Éti, ímijachavahi ímatiequeneha eta tapaisira eta anuma. ¡Tétavacavahisera eta emasuapajiraivahi! Taicha éti ímijachavahi religiósohe, ímijachavavare ímatiequeneha eta mavarahaqueneanahi ema Viya, váhisera ávarahahini ímatiequeneha eta máimeruhehi ema Viya, te juca sácheana nucachanerahehi. ⁴¡Eti achaneana váinarajiqueneana! Núti nímatihe. Vahi esuapanuimahi, te nímercapucaini eta tiáramicare. Tásiha, váhira étina tatuparaca ímahahini eta tiáramicareana. Ímahayaresera eta tiáramicare tacutiyare eta máichavaquenevahi ema víyarahaini profetaini Jonás —máichavacapa.

Tásiha, majunijicavacapa, tiyanapa.

Ema Jesús máimicuticha eta levadura eta náimiturapiana ena fariséoana

(Mr. 8.14-21)

⁵Tacahe, eta viánuesiravarepa eta cáquiure, vipanerechapaipahi eta vémitisisirapa eta pan.

⁶Ema Jesús máichahavipa:

—Tímaticarehi eyehe eta levadura eta tapareasirahi eta masa.

Tacutirichu eta tapareasirahi eta apimirairavacahi ena fariséoana énapa ena saducéoana. Échapavaicha tayehe, vahi ecuehica éna —macahepa.

⁷Vítisera viti apóstoleana, eta véñamavairahi, víchacacapa:

—Tímicajachavahi eta vémitisisirahi eta pan. Eta tacahe, macahehi tayehe eta levadura —víchapa.

⁸Éma tímatiacahavihi. Tásiha, máichahavipa:

—¿Tájaha tacayema ecahechajiruvahi eta vahi íamapahini eta pan? ¿Váhipuca ácașiñavahi eta nuyehe? ⁹¿Vuíchahacaru ácaicutiaraini? ¿Vuíchahahipuca ímatinu? ¿Váhivare échaini eta nucaejapasirahi eta cincoquene pan nanicaquenehi ena cinco mlíqueneana achaneana étapa eta náemacharajiana? ¹⁰¿Váhivarepuca écha eta sítequene pan naniruhi ena cuatro mlíqueneana achaneana étapa eta náemacharajiana? ¹¹Nímijachapa ecaicutiarayarehi eta níchirahahi eta échapi-ravainahini eta nayehe levadura ena fariséoana énapa ena saducéoana. Váhira étainahini néchajisihahíni eta levadura tayehe eta pan —máichahavipa.

¹²Vipaenumavahi véchahi eta máichirahavihi éma eta véchapiravainahini vahi vicucuti ena fariséoana énapa ena saducéoana eta apimirairanahi.

Ema Pedro máimereucha ema Jesús eta émairahi ema Cristo

(*Mr. 8.27-30; Lc. 9.18-21*)

¹³Tacahe, te apanapa sache, viyanavarepa vipaica. Vicaijuhe eta te Cesarea máepiyaruihi ema rey Felipe. Te viánehipa, ema Jesús tiyaserecachavipa:

—¿Tájaha nacayema ena achaneana eta nuyehe nuti Manerejirunuhi ema Viya? ¿Nájahapuca náimijachanuhi éna? —máichahavipa.

¹⁴Vijicapapa víti:

—Ena apamuriana náimijachavihi ema Juan, tichavahi téchepucahi. Ena apamuriana tímijachavianahi ema víyarahaini profeta Elías, téchepucahi éma. Ena apamuriana tímijachavianahivare ema víyarahaini profeta Jeremías; émapuca ema apana profetaini antívuini, téchepucahi —vicahepa.

¹⁵Ema Jesús tíápechahavivare tiyaserechavi:

—Étiyapa ¿nájaha ímijachanuhi núti?

¹⁶Ema Pedro majicapapa:

—Pítira yátupiquenevihi Cristo, machichaquenevihi ema yátupiquenehi Viya.

¹⁷Ema Jesús majicapapa:

—Piti Pedro, tétavicavahi eta pétupisiravahi taicha manacasamure-ruvihi ema Tata Nucaiquene tiávihihi te anuma. Vahi étáinahini eta máimiturapinahíni piyehe mácani achane. ¹⁸Núti apanavare nutupiruva numetacavi. Píti picajarehi Pedro. Píti picutiyare eta mari, tétavicavayare eta pitumevaya. Namutu ena picutiqueneana eta pisuapiranuhi nútirahi yátupiquenehi Cristo, éna nuchaneranyare. Éna apanavare nacutiyareva eta mari eta natumevayare eta náehisiranuhi. Tájina vahi máratahaimahi macaetemavaca ema Váinaraji. ¹⁹Píti picatuparahayare eta llave tayehe eta anuma, apaesa nasiapa nácani pijacapaqueneanayare píti —máichapa.

²⁰Tacahe, tituparacahavipa muraca ema Jesús nacuija vicumetaca eta émairahi ema Cristo.

f Mt. 16.17 Ema Jesús téchjicahi te máechajiriruva hebreo, máimijarechahi ema Pedro: “Simón, machicha ema Jonás”.

Emá Jesús máimereucha eta máepenirayarehi

(Mr. 8.31-9.1; Lc. 9.22-27)

²¹Tacahe, emá Jesús tépanavapa timetacahavihi eta táicharacavayare eta máepenirayare. Máichahavipa:

—Nuti nucatuparahahi eta nuyanirayarehi te Jerusalén. Ánaqui nucatajivayarehi ichape naicha ena tuparairucana, énapa ena aquenucarahana, énapa ena escribánoana. Éna, tímicapacuanayareva. Mapanayareichuhisera sache nucaheyare eta népenirayare. Tásiha, nuchavayarehi néchepuca —máichahavipa.

²²Tásiha, máiputsicapa mámahí emá Pedro emá Jesús. Ánaqui macajachapa, máijarasiravahi eta mapanereruhi:

—Núti vahi návarahahini táitauchavahini nacapacavihini.

²³Tacahe, emá Jesús máichapa emá Pedro:

—Piti téjcapavahi eta pipanereruhi. Pínajica eta juca tamauriqueneanahi. Pivarahapuca pihapapicayare eta mapanereruhi emá Viya. Eta juca pipanereruhi tacuti eta mapanereruanahi emá Satanás, énapa ena machanerana —máichapa.

²⁴Tásiha, máichahavivarepa víti:

—Nácani navaraha náehicanu, tacamunu náinajicava tamutu eta tihapapiricavaca eta náehisiranuhi. Nacaravahuyareva eta nímiturapiána. Nájaracavavare eta táimicapasiraina eta náehisiranuhi. ²⁵Nácanisera téñamanahi eta náitaresira, tiávamirahuanaya eta náehisiranu, énajivayare ticamitiequenehavanaya eta náitaresira. Énasera nácani yátupiquenehi tjaracavana téhicanuana, tayanapane táimicapacainepuca eta náehisiranuhi, éna títujicavanayare tíuchucuhayare eta náitaresiranaya. ²⁶Énerichuvare nácani tacañamararuanahi eta nacaimahaquenéiraya te juca apaquehe, tájina náimaequenehaimahi, taicha eta tacañamarasiravacahi tahapapiricavacahi tayehe eta náuchucuirayarehini. Taicha vahi máratahaimahi mácani achane mavachachahini eta máuricacarevaya te apana vítaresira. ²⁷Taicha nuti Manerejirunuhi emá Viya nuchavayarehi. Námainapaipa eta majaraíva emá Tata, nuchachénapaipavare ena ángleana. Te jena sáchehare, níjaracavacainapa eta náicuchianahi ena nuchanerana te tíurihi eta nacaemataneasiranuhi, te jácani náemataneanapachuhi. ²⁸Nutupiruva numetacahe: Puítiripa éti, etiaríhi enerejicavayare vahi épenavanémahi, ímahanumaya eta nucatuparahairaya aquenucanuirayare nuti Manerejirunuhi emá Viya —macahepa.

Emá Jesús tihapamaichava eta máimahi

(Mr. 9.2-13; Lc. 9.28-36)

17 ¹Tiuri, sáisipa sache eta vinasirahi ánaqui. Tacahe, tinaquicahavipa emá Jesús. Nacarinehi máma emá Pedro, emá Jacobo émapa emá Juan. Tiyananapa eta te étana cerro anuquehepana. ²Eta ánaqui, náimahapa tihapamaichavahi eta máimahi emá Jesús te namirahu éna. Eta mamira, tétavicava eta tajararasira tacuti eta sache. Eta mamuiríha,

tétavicava eta tajananumesirahi, étapa eta tajapuvahi. ³Tásiha, tiáramica-reanavarepa tímerecavana ena apinana ajairana: ema víyahahaini Moisés émapa ema víyahahaini profetaini Elías. Téchajiricavanaripahi mayehe ema Jesús. ⁴Tásiha, ema Pedro tímisiapavapa téchajicapa. Ánipa macahe:

—Tata Náquenu, tétavicavapa eta viúricacareva eta viávihairahi eta áni. Tiúrihipucaini vépiyarecahini eta epenahuinapachuhini. Pipenahuinarichuhini píti, mapenainarichuhivaréni ema Moisés, émapaini ema Elías —macahepa.

⁵Tacahe, téchejicaichaha ema Pedro, tiáramicarepa eta úcaji táepacumurihahi éna. Tétavicavahisera eta tajananusirahi eta úcaji. Nasamavarepa eta mahu ema Viya tayehe eta úcaji. Ánipa macahe:

—Ema maca, éma yátupiquenehi nuchicha némunaruquenehi. Tétavicavahi eta núrismurevahi máicha. Éma esuapayti, mapenainarichuhivarare —macahepa.

⁶Eta nasamirahi ena vichamuriana, tipicanarinehi. Tépuycanapa titsiucapairicana. ⁷Tásiha, ema Jesús témeñahavapa eta nayehe. Máemamasicavacapa. Máichavacapa:

—Échepuca, nuchichanaveana. Vahi ecupica —máichapa.

⁸Tacahe, te téchepucanapa éna, nájinaripahi éna apinana náimahaqueneanahi. Macarinehi ema Jesús.

⁹Te tichavanapa tayehe eta cerro, ema Jesús mametacavacapa vahi nacumetajiricahini eta juca náimahaquenehi. Tiámainucava te máechepucapaini te máecari éma. ¹⁰Tacahe, nayaserecapa ema Jesús:

—Ena escribánoana eta náimiturapihi, náechajisihahi eta machavirayare títareca ema víyahahaini Elías, tínapucayarehi eta máimeresiravayare piyehe piti Cristo. ¿Énapuca téjcapavanahi ena escribánoana? —náichapa.

¹¹Ema Jesús majicapavacapa:

—Yátupi ema víyahahaini Elías títecapayarehi, máetupiripanayarehi tamutu. ¹²Nútisera nutupiruva numetacahe: Títecaripahi ema Elías, váhisera náimatihini ena escribánoana. Váhivare najacpahini éma ena tuparairucana. Nacatianacahi nacapacahi éma. Ene nucaheyare nuti Manerejirunuhi ema Viya, ticatianacananayarehiva, éneyaréichuvare ticapacananayare —máichapa.

¹³Tásiha, ena vichamuriana náechapa eta máechajisihairahi ema Jesús ema Juan Tícachasiricarahihi.

Ema Jesús macanaraca ema amaperu mávaháruhi ema éreana
(*Mr. 9.14-29; Lc. 9.37-43*)

¹⁴Tacahe, te tichavanapa éna tayehe eta viávihahi víti énapa ena achaneana, témeñahavapa ema émana achane mayehe ema Jesús. Tépuycapa te mamirahu. Máichapa:

¹⁵—Picatajicanu, tata, pímicatacanu. Picanarasinanuini ema maca nuchicha. Tétavicavahi eta macatajivairahi. Tacaeharipairica te tanahaca eta majuma. Tatiarihi te táquipaica te une, téhepuca yucu. ¹⁶Námaripahinéni nayehe ena pímitureana, váhisera náratahahini nacanaracahini éna —máichapa.

¹⁷Ema Jesús máichahavipa:

—¡Tétavicava emasuapajiraivavaca eti achaneana! ¡Cúverarecacha-sicáini eta nucamichirahenahini! Jáma ani ema amaperu —máichapa.

¹⁸Tacahe, ema Jesús, muraca eta máevatasirahi ema éreana, máinajiacapa ema amaperu. Enevanepa tinaracavanehi éma.

¹⁹Tásiha, te táequenepa, víti víputsiacavapa ema Jesús, viyaserecapa:

—¿Tájahapuca tacayemahi eta vahi váratahahini vicuchuca ema éreana mayehe ema amaperu? —víchapa.

²⁰Ema Jesús tijicapahavipa:

—Eta tíchahi éti vuíchaha yátupinahini ácasiñavahini me Viya. Nutupiruva numetacahe: Te yátupiquenenahini ácasiñavahini mayehe éma, eratahayarehini. Váhinéni tácomesahini ichapenahini eta ecasiñavairahi. Tayanapanepuca ánichichainaichu eta ecasiñairavahi, tacutihipucaini eta táquichicha eta mostaza, tamuturihini erataha. Étaripa eta jácani cerro ávarahahini ecayejeca, eratahayarehi. Te íchapuca: “Piyejecava eta te juca. Piyana ánaquipana”. Tásiha, tiyejecavahini éta. Jéhesare, tájina tacucajerarajihini eyehe. ²¹Étaserá eta juca, muracapanahi ema éreana ema tiávahácahi ema maca amaperu. Eta vicuchusira, tavaraha víchanumayare eta ayuna étapa eta viyujaraca —máichahavipa.

Tiápechavavare ema Jesús máimereucha eta máepenirayarehi

(Mr. 9.30-32; Lc. 9.43-45)

²²Tacahe, eta vipaisirapahi tayehe eta avasareana eta te táunavahi eta Galilea, tiápechahavivarepa timetacahavi ema Jesús eta máepenirayarehi. Ánipa macahe:

—Nuti Manerejirunuhi ema Viya, járajapainapa eta sáchezare tíjararecanuyare mácani achane nayehe ena ticatianacuananahi. Ticaratacuanayare éna. ²³Ticapacuanayareva. Néchepucayaresera te mapanaquenenapa sache —máichahavipa.

Tacahe, eta visamirahi, ichaperinehi eta véñamiravahi víti.

Ticavacha eta impuesto tayehe eta Templo

²⁴Tacahe, te vítecapapa tayehe eta viávasa Capernaúm, natiarihihi ena ticobrarecarahiana eta impuesto tayehe eta Templo. Nárajapapa náechajipanahi ema Pedro. Nayaserecapa:

—¿Mavachachapuca ema eyehe máestro éti eta impuesto tayehe eta Templo? —náichapa.

²⁵Ema Pedro majicapapa:

—Mavachacha —macahepa.

Te visiapayarepa te peti, ema Jesús máechajicanumapa ema Pedro. Ánipa macahe:

—¿Tájaha picayema, piti Pedro, nájahasica tatuparacahi navachachayare eta impuesto mavarahaquene ema mácani rey? ¿Énapuca ena machichaqueneana, énapuca ena machanerana? —máichapa.

²⁶Ema Pedro majicapapa:

—Ena machanerana.

Tásiha, ema Jesús macahepa:

—Tiuri, viti machichahavihi ema Viya. Vahi tatuparacahini vivachachahini víti eta juca impuesto. ²⁷Vinaquicasera eta impuesto apaesa tacuija tacuca-yemacare nayehe ena achaneana. Piyanayare pénica eta jima te cáquiure. Te piáquijiecapa eta pénirave, eta títapuca jima tacaratacaya eta pénirave, tatiarihiyare eta plata te tajaca. Pivehainapa eta reale, tásiha taratahayare tavachacha eta nuyehe parte núti, étapa eta piyehe píti —máichapa.

¿Nájahapuca ema apóstole ticapichupana?

(Mr. 9.33-37; Lc. 9.46-48)

18 ¹Tacahe, te jena sácheanahi, viyaserecapa ema Jesús: —¿Nájahapuca ema ticapichupanaya viyehe víti te táitecapapa eta sache aquenucaviraya? —vicanauquicasera eta impuesto apaehapa.

²Tacahe, máichuhapa ema Jesús ema émana amaperuchicha, macatupihapa te vimirahu. ³Máichahavipa:

—Nutupiruva numetacahe: Ínajicayare eta ecasiñavavaisira.

Echávyare ecutyare ema maca amaperu, apaesa ítujicava esiapa ecachanenu tayehe eta néjasihayare. ⁴Nácani navarahahi ticapichupananayare te jena néjasihayare núti, tacamunu mánsuanayare. Vahi máitucaimahi tiácapauchava. ⁵Tacutiquene nácani tijacapanayare ena amaperuana níchavenénahi núti, ena nani yátupili náimereca eta náemunasiranuhi núti, taicha tímicutijiricavahi nítinahini najacapa.

Ichape eta máicuñayare mácani tímiaquipaica te pecatu ena amaperuana

(Mr. 9.42-48; Lc. 17.1-2)

⁶Tacutiquene mácani tiáquipaicaya ema émana amaperu téhicanuhi, tiúripanahipucaini máepenahini mativainahini éma. Váhirichupucaini macucaicuñahini, taicha vahi macuaquipaichahini ema amaperu tayehe eta pecatu. ⁷Taicha muracayare eta náicuñayare nácani tímiaquipaicayare ena achaneana. Yátupi vahi téjiacavaimahi eta tímiaquipaicaya ena achaneana tayehe eta pecatu. Ichapesera eta náicuñayare nácani ticatapiravanahi eta náimiaquipaisirahi ena achaneana tayehe eta pecatu.

⁸Eta tacahe, te táimipecurachahepuca eta evahu, étapuca eta ívapeana, tiúripana eyuchatica, iáquijica; apaesa vahi tacuimiaquipaicahe tayehe eta pecatu. Tiúripana táejicava eta iáquehe eta esiapirayare te anuma, váhisera tacumutuhi tasiapa te yucu eta iáquehe. ⁹Étaripavare eta iúquiha, te táimiaquipaicahepuca tayehe eta pecatu, tavarairahi táimahayare eta tamauriqueneana tájiparacana, tiúripana evecuhaulquichava iáquijicaya. Taicha tiúripana eta ejacapacarehi éti eta esiapiraya te anuma tayanapane táejicavapuca eta iúquiha. Páuresamisera éti, te náepujuquichahepuca te yucu infierno, tamutuyare eta iáquehe.

Ena Jesús máimicutiarachinahi te témitiaca étana uvesa

(Lc. 15.3-7)

¹⁰Vahi ecuepuru ena amaperuana. Numetacahevane: Nararihi ena ángeleana tijaneacavacahi éna. Títupajjiacavanahi eta nacatiuchiravacahi ena amaperuana, máicha ema Viya. ¹¹Nuti Manerejirunuhi ema Viya, eta tímitecanuhi nucuchucuhayare nácani tiávacuhanahi táíñehiquene eta náitaresira.

¹²Esamanuchaha. Nímicutichinaheyare puiti. Matiarihi ema émana achane. Ticayehe eta cien uvesana. Te témitiyechapuca eta étana, ema achane tiyanayarehi matanuca eta táemitiaruhi. Eta máeñamiravahi, manaquicayarepa eta apamuriana noventa y nueve te majanearesihahi. ¹³Te máichimavapa, tichavapa. Tétavicava eta máurisamurevapaipahi eta mámirapaipahi eta táejaruvahi.

¹⁴Ene macahe ema Tata Ecayiaquene éti, ema tiávihihi te anuma. Vahi mávarahahini náemitiacahini ena nani amaperuana.

Tatuparaca viperdonacha ena téjecapavana eta viyehe

(Lc. 17.3)

¹⁵Te tatiarihipuca eta máejecapiravahi ema piparape eta piyehe, tituparacavi piperdonachayare. Tásiha, piconsejachayare éma, píputsiacayare éma eta pimetasira eta máejecapiravahi. Te tisuapavihi éma, tájinapa íchiravaimahi. Tiúrinapa eta ítaresirana. ¹⁶Téhesera te vahi macusuapavi, pitanucayare apinanaina ena piyehenayare testigo apaesa tasuapacarepa eta piconsejariyare. ¹⁷Te vuíchaha macusuapavi, pimetacapa namutu ena pichamurianahi picatupihapa te namirahu. Téhesera te váhiquenechapuca macusuapahe, tímaticarénapa éma eta mamasuapajiraivahi me Viya. Vaipa ecuimisiapava mayehe, taicha eta mamasuapajiraivahi. ¹⁸Nutupiruva numetacahe: Te ecurujicacahi, te ímahahi eta mamasuapajiraivahi, emetacayare éma vahi táepahahini eta mapecatura. Tanasirichuhi. Émaripa ema Viya, máimararacahi eta evarairahi etupirica éma. Téhesera te máneuchavapuca, emetacayare éma eta táepahariripa eta mapecatura. Ema Viya, tiúriripa eta máimaira.

¹⁹⁻²⁰Énerichuvare te etiarhipuca éti te juca apaquehe apinahehi, mapanahehipuca ecurujicacahi te nójare núti, nutiarhiyarechuhivare núti te emuri. Tásiha, te étanaichuhi eta epanereruhi, ticuticacahi eta eyaseserepi te mayehe ema Tata, éma tíjaracaheyare —máichahavipa.

²¹Tásiha, ema Pedro mapauchapa, mayaserecayarehi ema Jesús. Ánipa macahe:

—Tata, ¿áyahepuca tatuparaca nuperdonachaya ema nuparape, te máejecapava eta nuyehe? ¿Táuricapuca siéteheyare eta nuperdonachirayare? —macahepa.

²²Ema Jesús majicapapa:

—Vahi tácarichuimahi siétehénarichuyare eta piperdonachirayare. Tímiyanavayarechucha eta piperdonachiranayare. Vahi pitupachaimahi —máichapa.

**Emá Jesús máimicutiarachina emá achane máuriraha
vahi máitucaimahi maperdonacha emá maparape**

²³Nuti Manerejirunuhi emá Viya nucuti mácani rey rícoquenehi te mavarahahi máechayare eta nanteveana ena mamusurana. ²⁴Tásiha, námapaipahi emá tétavica-vahi eta manteve. Tisintevapanahi éma. ²⁵Tásiha, emá achane musu, tájina maviyahini mavachachihahini emá máquenuhi. Tacahe, emá rey macavanairipipa macaijararecasi, namutu esu mayena énapa ena machichanaveana, éropa eta macayehequeneanaini te mapena, apaesa mavachachahini apaesachichainari-nehini eta mantevehi. ²⁶Tásiha, emá achane musu tépuyucapa te mamirahu emá máquenu. Ánipa máicha: “Tátachicha, picatajicanuhini. Picuchapanuini. Te nítucavapaini, nuvachachapaini tamutu eta nunteve piyehe” macahepa. ²⁷Jéhesare, emá máquenu majapanupa. Maperdonachapa tamutu eta mantevenihi. Macaiticapa. ²⁸Vuíchahasera táyerehini emá máchusirahi, mácapajicapa emá apana achane ticantevehi eta mayehe. Macompañeroinihivare. Váhinéni camurinahini eta mantevehi. Macaratachahisera, macobrachapa. Masemaracapa macapitinucapa. “Pivachachanu puftirichu” máichapa. ²⁹Emá achane ticantevehi tépuyucapa te mamirahu. Mayaseacapa: “Picatajicanu, picuchapanuchaha. Te nítucavapa, nuvachachavipa”. ³⁰Váhiquesera maperdonachahini. Máimicasiapapa te cárcel, mavairairahi mavachachavaneyarehini eta mantevehi. ³¹Tacahe, te náimahapa ena apamuriana machamurianahi, ticatirinehi te nasamure eta náimairahi emá nachamuri présuiraipahi. Tiyananapa nametacahi emá náquenu tamutu eta máichavaquenévahi emá nachamuri. ³²⁻³⁴Tacahe, emá máquenuhi máimichuhapa emá tipresurecainihi. Ichape eta masemanevahi. Ánipa maicha: “¡Piti máepera-jítataji musu! Váiparinehi péchavahini eta nuperdonachiravihi eta pinteve ichapequenehi. Taicha eta piyaseasiranuhi, nuperdonachavihi. Piúriháinehi pájapanuhini píti apanavare emá pichamusuvahi, tácutihini eta nuperdona-chiravihi núti” máichapa emá rey. Tásiha, macavanairipipa náicuñaca, éropa mavachachayarehi tamutu eta mantevehi.

³⁵Tacahe, emá Jesús te títapiricapa eta juca máimiturapiana, ánipa macahe: —Ene máichaheyare emá Tata Nucaiyaquene éti apanavare, te vahi ecuituca eperdonacha nácani eparapenaveana náejecaparuvanahi eta eyehe —máichahavipa.

**Emá Jesús tímiturecahi máechajisihahi mácani achane tínajicahi esu mayena
(Mr. 10.1-12; Lc. 16.18)**

19 ¹Te tamutupa eta juca máimiturapianahi emá Jesús, viúchucapa te Galilea. Viyanapa tayehe eta Judea. Viánuecapa eta cajacure Jordán te tinapaicahi te táuchusine eta sache. ²Camuriana ena achaneana tíurujicavanahi. Ánaqui macanaracapaipavare emá Jesús ena nacajumaqueneana.

³Tásiha, títecapanapa ena apamuriana fariséoana. Napauchapa emá Jesús. Natanucahi eta tivíuchayarehi éma. Ánipa naicha:

—Vivaraha pimetacahavi ¿te táuricapuca máinajica ema achane esu mayena taicha jácane tájiparacana? —náichapa.

⁴Ema Jesús majicapavacapa:

—Németeaca vahi ácaucitiarahi eta échajicuirahi eta Sagrada Escritura. Te tépanavainapa acane, ema Viya máijaracahi ema achane ésunaya-reichuhi esu mayenayare. Esu esena émanayareichuvare ema suímayare.

⁵Ani tacahe eta mavanairipi ema Viya: “Mácani amaperu achane ésupa esu mayenayare, te ticaimanapa, tatuparacavacahi típutsicavanyarehi eta napenana ena ticachichana. Énajivainapa títáticacanayare. Eta navehacacairahi, tímicitijiricavaipa étanarinehi eta náqueheana” macahepa ema Viya. ⁶Tacahe, tímicitijiricavainapa émanainarichuhini te peti. Étanarichu eta napanereruana. Vaipa táisapacarehini náinajicahini. Eta tacahe, mácani máinajicahi esu mayena, éma máepuruhi eta juca mavanairipi ema Viya —máichavacapa.

⁷Tásiha, ánivare nacahe:

—¿Tájahasica tacayema eta mavanairipihi ema víyarahaini Moisés ticaepiyayarehi eta ajureca suyehe esu esena eta máinajisirayarehi ema suima? —náichapa.

⁸Ema Jesús majicapavarepa:

—Ena iáchucanaveanaini, te jácane eta nasemirahi, náinajicapa ena nayenana. Ema víyarahaini Moisés máisapahi tínajicacana táichavenehi eta tájinairahi eta náimitucacarevainahini, táetaviuchirahi eta namuracasmureva. Váhisera máuricahini ema Viya eta náinajicacahini. ⁹Puiti nuvaraha numetacahe: Te máinajicapuca esu mayena mácani achane, te tájinapuca sufchiravainahini; tásiha, mavehapa esu apana esena, ticapecaturaipahi me Viya. Tacutiquene, mácani mavehahipuca súcane esena máinajiruhi ema suima, ticapecaturaipavare éma, taicha ésu, matiarichahahi ema suímaquenehi —máichavacapa.

¹⁰Tacahe, te víputsiacavavarepa, viti mayeheana apóstole viyaserecapa ema Jesús:

—Te énehipuca tacahehi eta juca, eta vivira viti ajairana esu esena, tíuripanaichuhipuca vahi vicutanuca esu esena —víchapa.

¹¹Ema Jesús máichahavivarepa:

—Vahi ámutu árataha ímatiequeneha eta juca. Nararihisera tinerejicavanayarehi náimatiequenehayare máicha ema Viya. ¹²Nararihi ena ajairana vahi natanucaimahi esu esena nayenainahini, taicha eta náquehe vahi táichuhahini esu esena. Nararihivare ena ticavechianahi, navetijipa éna vaipa náesenicaimahi esu esena. Nararihivare ena apamuriana tinerejicavanahi vahi natanucahinehi esu nayenainahini, navarairahi tacuija jácane tahapapicahini eta nacaemataneasiraya ema Viya. Ticunachacarepanayare ena tiratahanayare eta juca náijarasirava yátupiquene nacaemataneacaya ema Viya —máichahavipa.

Ema Jesús mayujaraucha ena amuyana

(Mr. 10.13-16; Lc. 18.15-17)

¹³Tacahe, ena achaneana námavacapaipa ena amuyana eta mayehe ema Jesús. Navarahahi máemamahacavacayarehi éna, mayujarauchahivaréni. Vítisera viti mayeheana apóstoleana vahi vísapahini. Vicaichepaicapa ena tíamanapahi ena amuyana. ¹⁴Ema Jesús máichahavipa:

—Ésamiricachucha ena amuyana, náitecaichaha eta nuyehe. Vahi eucacichepaica éna. Taicha ena nuchanerana nuti Cristo nacutiyairehi ena nani amuyana eta nasuapajiraiva éna —máichahavipa.

¹⁵Tásiha, máemamahacavacapa ena amuyana, mayujarauchavacapa. Te tamutupa, viyanavarepa te apana avasare.

Ema achane rico téchajiricava mayehe ema Jesús

(Mr. 10.17-31; Lc. 18.18-30)

¹⁶Matiarihi ema achane amaperu rico. Mapauchapa ema Jesús. Mayaserecapa: —Tata maestro, piti piúriqueune. ¿Tájahapucaini eta nícharacavahíni eta nítujisiravaina me Viya máichecuarquirénahini eta nítaresira? —máichapa.

¹⁷Ema Jesús majicapapa:

—¿Tájaha tacayema pímiijarechanu “Piti piúriqueune”? Mararihi ema Viya. Jéhevare éma, tétavicavahi eta máurivahi. Téhesera te pivarahapuca pécha te apana vítaresira, pisuapayare eta vanairipiana —máichapa.

¹⁸Mayaserecavarepa ema achane:

—¿Tájahasica eta vanairipianahi eta nusuapaqueneya?

Majicapavare ema Jesús:

—Eta juca eta mavanairipiana ema Viya: Vahi picucapareca. Vahi picuveha esu esena apayena. Vahi picuamereca. Nacuija pépiyéqueneruina. ¹⁹Pipicauchayare ena ticachichaviana. Pémunacayareva ema piparaepiyahi, tácuti eta pémunasiravahi píti —máichapa.

²⁰Tacahe, ema achane majicapapa:

—Tamutu eta juca nusuapahi nítauchahi. ¿Tájahasera puca eta jácani néjequeruichahahi? —macahepa.

²¹Ema Jesús majicapavare:

—Te pivaraha pítaucha tamutu, piyana píjararecaya tamutu eta pímaqueneana. Tásiha, píjaracavacapa ena páureana. Jéhevare éta, pijacapayare eta pímaqueneayare te anuma táitsivayare. Te tamutupa eta juca, pítecavanepa péhicanu —máichapa.

²²Te masamapa ema achane eta juca macayemaquenehi ema Jesús, ichaperinehi eta mapanereresirahi, taicha mavayuchahi eta macaimahaquenerahi. Macatiequeneharinehi tamutu. Tiyana tipanererecapaipa.

²³Tacahe, ema Jesús máichahavipa viti mayeheana apóstole:

—Nutupiruva numetacahe: Yátupiquenehi máitujíhi eta náijarasiravainahini eta náehisiranuinahini ena rícoana eta nasiapirainahini te anuma. ²⁴Esamanuchaha. Eta juca tímicutijiricavahi eta vípera camello, máitujíhi tánucuhahini te támicuejehe eta parirapa. Ene nacahehi ena rícoana —macahepa.

²⁵Eta visamirahi viti, víraminehi. Víchacacapa:

—¡Tétavicavahi eta tamáitujicacarevahi! ¡Nájina títujicavaimahi náuchucuhahini!

²⁶Ema Jesús tímararacahavipa. Tásiha, máichahavipa:

—Nájina émanaina achane émajivainahíni ticuchucuhava. Émasera ema Viya, macarichu marataha ticuchucureca. Taicha tájina máemejera-chaquenénahini ema Viya. Tamutu marataha —máichapa.

²⁷Ema Pedro máichavarepa:

—Vítisera, Tata, vinaquicahi tamutu eta vicayehequeneanahi, vivarairahi véhicavi. ¿Tájahasica eta vímahaquenéya? —máichapa.

²⁸Ema Jesús majicapavarepa:

—Nutupiruva numetacahe: Járjapayare eta sáchevayare, tacaitsivairayare tamutu arairuya. Tásiha, nuti Manerejirunuhi ema Tata néjacainapa te tajarahiquenehi trono. Tásiha, eti éhicanuanahi éjacainavarepa tayehe eta dócequene trono. Ecavanairipinapa nayehe ena dócemuri-queneana vijaneanana israelítana. ²⁹Tásiha, emutu eti enaquicanahi eta epenana, ejunijicahivare ena ticachichaheana^g, ena eparapenaveana, ena echichanaveana, eta eyehe apaquehe, táichavenehi eta éhisiranuhi puiti, tiápajucavainapa camuripanayare ena ejaneananayare étapa eta ímahaqueneanaya. Énerichuvare táurivayare eta ítaresira máichecuaraquirenapa. ³⁰Maverahesera eti etiarihiqueneanahi puiti, váhirichuhi ecapicahuhini. Te jena sáchezare, ichapepanainapa eta ecapicahuiraya. Ena puiti ticapichuanahi, te táitauchavapa te jena sáchezare, énapavainapa téquenehanayare.

Ena Jesús máimicutichahi ema achane rico tiuri eta mavachachira ena ticaematanezechana

20 ¹Te jena sáchezare te njaracahénapa eta ícuchiyare eti nuchanerana, tacuti eta mavachachirahi ema émana achane ticayehe eta ichape quinta úvaquiji nayehe ena ticaematanezahiana. Ema maca mayatiruhi tipaica matanuca ena achaneana ticaemataneanayarehi mayehe. Tírericanayarehi eta uva. ²Te tíucavapa ena ajairana, mametacavacapa eta mavachachirayarehi étana reale te sache. Tiúrihi eta mavachachiravacahi. Mavanecavacapa tiyanana tayehe eta náireresihayarehi. ³Tásiha, macamunuichahava ena apamuriana achane. Te las nuévapa sache, tiyanavarepa te plaza. Máimahainezare ena apamuriana

g 19.29: Te jácani apanana versiónéana, tatiarihi te juca lista eta táechajiriruva “ena naye-nana”. Tájinasera nalistanahini te libro antivupanahi. Eta tacachehi, vímatiequeneha vahi manacahini ema Mateo. Mácani apana achane mavejuchahipuca te Lucas 18.29.

ajairana máematanereanahi. ⁴Máechajiacavarepa eta náireresirayarehi. Mametacavacavarepa eta táurivayarehi eta mavachachirayarehi. Tiyananavarepa éna, tírerecanahi. ⁵Te las dócepa sache, tiyanavarepa matanuca ena apamuriana. Títucavavare, máevatamurihavare tírerecanayare. Te las trespa sache, tíapechavavare tiyana títucavavare ena apamuriana, énerichuvare tírerecanayarehi. ⁶Te las cóncopa sache, tiyanavare tíuchucahi tayehe eta plaza. Títucavavare ena apamuriana ajairana máematanereanahi. Tásiha, máichavacapa: “¿Tájaha tacayema tájina ématanenahini puiti jena sache?” ⁷Éna najicapapa: “Nájina náechejiacahavihini”. Tásiha, ema máichavacapa: “Eyana éti apanava íreca ánaqui te nuyehe quinta úvaquiji”. Mаметacavarepa eta táurivayarehi eta mavachachiraya. ⁸Tacahe, te yátipa, mametacapa ema mayehe empleo máichuhavacapa namutu, mavachachavacayarepa. Mavarahahi náinapuca nacavacha ena náequenereruanahi ticaemataneana. Nasapihapa téquenehanahi ticavachana ena náinapureanahi. ⁹Tásiha, ena nasiapaqueneanahi te las cóncopa sache, mavachachavacapa ema achane eta étapevacahi eta reale, tacutirichuhi eta navachahi ena ticaemataneanahi tamutu sache. Énapa ena nasiapaqueneanahi te las trespa sache, énerichuvare eta étapevaca reale eta navachahi. ¹⁰Tacahe, te ticavachanapa ena náinapureanahi tisiapana, náimahapa éna tacutirichuhi eta navachanahi ena náequenereruqueneanahi. ¹¹Tásiha, tise manapa mayehe ema náquenuhi. ¹²Ánipa nacahe: “Ena nani náequenereruanahi títecapana, vicutivachavacaichuhi eta navachahi, étanainehinéni hora eta nacaematanerahi. Tacutirichuhisera eta vivachahi viti vínapureanahi. Váhiquene táuricaímahi eta juca, taicha ichapemuríhi eta vicamichiráhi víti eta táijureva muracaquene eta sache. Táurica vicachuricavacayarehini éna eta navachahi” nacahepa. ¹³Émasera ema náquenu majicapavacapa: “Váhira nucaetmahémahi éti. Énaripa ena náequenereruanahi, váhivare nucaetemavacaimahi. Tínunahi eta nuvachachirahéhi étapevacahi eta reale njaracahe. Vahi ecusema. ¹⁴Ésamiricavachucha. Evehachucha eta juca evachahi. ¹⁵Núti néchinava taicha nuyeherichuhi eta plata. Nuvaraha ácuticacahini eta evachana emutu. ¿Éti ecapinarunupapuca eta núrivahi nayehe ena nani?” máichavacapa.

¹⁶Ema Jesús macahevarepa:

—Ene nacaheyare te jena sáche yare, nácani náequenereruanahi téhicanuana, éna nasapihayare tínapucana. Tásiha, nácani náinapureanahi, nasapihayare téquenehanayare^h —macahepa.

h Mt. 20.16 Te jácani apanana versiónéana, tatiarihi eta juca táechajiriruvana “porque muchos son llamados, pero pocos son escogidos”. Tájinasera eta juca táechajiriruvanahi te libro antivupanahi. Eta tacahe, vímatiequeneha vahi manacahini ema Mateo. Mácani apana achane mavejuchahi eta juca te Mateo 22.14.

Ema Jesús tíapechavavare máechajisiha eta máepenirayare

(Mr. 10.32-34; Lc. 18.31-34)

¹⁷Tacahe, eta vipaisirapahi te achene te vicaijuhepa eta Jerusalén, típutsiacahavipa ema Jesús viti dócequeneana apóstoleana. Máichahavipa:

¹⁸—Ímaha puiti, viyanainapaipa vicaijuheyare eta Jerusalén. Ánaqui nucaijararecasiyare nuti Manerejirunuhi ema Viya. Ticaratacanuanainapa ena tuparairucana. ¹⁹Tímicapacuanayare taicha tjararecanuanainapa nayehe ena suntaruana romanoana. Éna, nájina najapanuquenéna. Ticaecahinuanainapa. Téstacuanayareva. Tétatacanuanayareva te crusu. Tásihaseva, te mapanaquenapana sache, néchepucainapa te nécari —máichahavipa.

Esu naena ema Jacobo émapa ema Juan suyaseaca ema Jesús eta macajupahavahini ena suchichanaveana

(Mr. 10.35-45)

²⁰Tásiha, témeñahavapa esu naena ena vichamuriana ema Jacobo émapa ema Juan, suámavacapaipahi éna. Tépuycapa ésu te mamirahu ema Jesús, suyaseacayarehi éñainahini majupahanainahini ena suchichanaveanahi. ²¹Éma mayaserecapa:

—¿Tájahasica ecamunu, nuchicha?

Ésu suíchapa:

—Nuvaraha pácchanéni ena nuchichanaveana tayehe eta péjasihayare picavacureraya. Náejacahini te pichacaya, eñi éñina te pivaure, eñi apana te sapa —suíchapa.

²²Ema Jesús majicapavacapa éna:

—Éti, vahi ímati tájahapuca eta nátajivayare nácani nujupahanayare. ¿Eratahayarepuca ecamicha eta íchavaquenévayare ecatajivairayare, ecutinuyarepuca eta nucamichirayare núti? —máichapa.

Éna najicapapa:

—Virataha vicamicha —nacahepa.

²³Tásiha, máichapa:

—Yátupi ichape eta ecatajivairaya, vicuticacaya eta nacapasirahaviyare. Étapasera eta éjasirayare eta te nuchacaya, vaipa nútina necha nucaejacahini. Ema Tata Nucaiyaquene, émahini tinerejicayarehi ena nujupahanayare —máichapa.

²⁴Tacahe, eta visamirahi viti diésqueneana mayeheana apóstole, visemapa nayehe ena apinana. ²⁵Émasera ema Jesús máichahavipa. Ánipa macahe:

—Écharichuhi éti ena aquenucana tayehe eta avasare, muraca eta nacavanairipira. Énaripa ena tuparairucana, tétavicavahi tisuapacareanahi eta nacavacurerahi. ²⁶Váhisera ecucahehi éti nayehe ena echamuriana. Mácani tímerecavahi ticapicahupana, tacamunuhi máitativacayare ena apamuriana. ²⁷Te etiarhivarepuca eti evarahahi ínapuca, tacamunuhi ímerecavaya navanarahayarehi ena echamuriana. ²⁸Ecutinuyare nuti

Manerejirunuhi ema Viya. Vahi étaina tímitecanu nucaitaticasihini. Nútiyarehi nítatihe. Énerichuvare njaracavayarehi nímicapacava íchavenequeneanainahi éti camuriqueneanaya nucuchucureanaya —máichahavipa.

EMA JESÚS MACAIMAIRIRICAVACA ENA APINANA PÚCHUQUIANA

(Mr. 10.46-52; Lc. 18.35-43)

²⁹Tacahe, te vijunijicavarepa eta avasare Jericó, camurianahivare ena achaneana ticvasanahi tayehe, téhichavianahi. ³⁰Natiarihi ena apinana ajairana púchuquiana. Téjacanahi te achenechacaya. Te nasamapa ema Jesús eta mánuoirapahi, tipiararecanapa. Ánipa nacahe:

—¡Tátachicha! ¡Pítiqueneripa yátupiquenévihi Cristo! ¡Picatajicahavipaini pájapanuhavi!

³¹Natiarihisera ena achaneana vahi náuricahini eta napiarasirahi ena púchuquiana. Navarahapa nacamatina. Énasera napiaracaichucha:

—¡Tátachicha! ¡Pítiqueneripa yátupiquenévi Cristo! ¡Picatajicahavipaini pájapanuhavi! —nacahepa.

³²Tacahe, ema Jesús eta masamiravacahi, titupihapa. Máichuhavacapa ena púchuquiana. Mayaserecapa tájahahipuca navarahahi.

³³Éna najicapapa:

—Tátachicha, vivaraha pípuhauquichahavini apaesa vímairicapaini —nacahepa.

³⁴Tacahe, ema Jesús majapanuvacainehi. Máemamahauquichavacapa. Enevanerinehi tímairicana. Tásiha, téhichavianapa.

TÍTECAPAPA EMA JESÚS ETA TE JERUSALÉN

(Mr. 11.1-11; Lc. 19.28-40; Jn. 12.12-19)

21 ¹Tacahe, te apanapa semana, viyanapa vicaijuhe te Jerusalén. Vétavajicapa tayehe eta avasarechicha Betfagé te tachacaya eta cerro ticaijarehi Olivoquiji. Ánaqui ema Jesús mavanecapa ena apinana vichamuriana. ²Ánipa maicha:

—Eyanayare tayehe eta te jena avasarechicha Betfagé. Ánaqui ímahayare ticaitihahi eta esena burrico, étapa eta tachicha te tachacaya. Evejapucayare íaminanuyare eta áni. ³Te natiarihinapuca náeñama, emetacayare eta nucamunuirahi núti. Vahi táyerémahi vímichavavanezare —máichavacapa.

⁴Eta juca tamutuhi títauchavapahi eta májuchaquenehi ema mácani víyarahaini profeta. ⁵Ani tacahehi: “Emétaca ena achaneana ticvasanahi te Jerusalén, apaesa natsecava eta najacapirayare ema nayeheyare Rey. Emétacayare vahi nacupica, taicha tétavicavapahi eta mamansuvapahi, étapa eta máurivahi. Mámapahi eta iúritaresirayare. Tímaticareyarepahi ema, taicha ticaperayare eta burricuchicha” tacahehi eta Sagrada Escritura.

⁶Tacahe, ena vanairucanahi náitauchahi eta navanahi mayehe ema Jesús.

⁷Námapaipahi eta burricochicha étapa eta tachicha. Nanacamaequechapa

eta náepacuhana. Tásiha, ticaperapa ema Jesús. ⁸Camuriana ena achaneana tiácapanahi náepacapaicaipa eta namuirihana. Ena apamuriana navehapa eta tapacaji eta cáchipaca. Nanacavare te mayanihayarehi éma. ⁹Ena apamuriana tinapumirauchanapahi énapa ena téquenehanapahi tipiaracanapaipa:

—Yare, Tata. Píti yátupiquenevihi Cristo réyvihi viyehe viti israelítana. Ichape eta vicunachiravihi píti. ¡Vanairucaquenevihi me Viya! ¡Asulupaya me Viya te anuma! ¡Viva ema Viáquenu! ¡Viva! —nacahepa.

¹⁰Tiúchuchujicanapa ena achaneana te Jerusalén. Ichape eta náramirahi ema Jesús eta máitecapirahi. Tiyaserejiricacanapaipa:

—¿Nájaha ema maca achane?

¹¹Ena apamuriana najicapapa:

—Émara ema profeta ticajjare Jesús, ticavasa te Nazaret te tinapaica te Galilea —nacahepa.

**Ema Jesús macuchuchujicavaca ena tjararecanahi eta sárareana,
cáyureana te tajuhe eta Templo**

(Mr. 11.15-19; Lc. 19.45-48; Jn. 2.13-22)

¹²⁻¹³Tacahe, te apanapa sache, tiyanapa tisiapa ema Jesús tayehe eta te Templo. Máimaharinehi ena achaneana tjararecanahi eta sárareana, cáyureana. Ena apamuriana ena tivacharecanahi. Natiarivare ena tísiriperecarahiana eta naplataneana ena apavasanana. Máichavacapa:

—Ema Tata Nucaiyaquene, ani macahehi eta máechajiruvahi te Sagrada Escritura: “Eta nupena tacarichu táicuchihi eta nayujarasirareya ena achaneana” macahepa. Étisera eti tiámerahiana, ecasiapavapa eta te juca. Emaeperajicapa eta tacapicahuirahi. ¡Eyana íuchucatataji! —máichavacapa.

Tásiha, macuchuchujicavacapa namutu. Máequehepuichinavacapa eta namesarana étapa eta nasiyana.

¹⁴Eta mávihairahi te Templo ema Jesús, napauchapa ena púchuquiana énapa ena masariana. Tásiha, éma macanaracavacapaipahi. ¹⁵Tacahe, ena amaperuana tipiararecanahi eta nacunachirahi éma, ánipa nacahe: “Pítiquenehi yátupiquenevihi Cristo manerejiruvahi ema Viya” nacahepa. Énaserá ena tuparairucana énapa ena escribánoana vaipa náuricahini eta náimairahi tamutu eta juca. Tisemanapa. ¹⁶Náurujiacapa. Navarahapa nacaichepaica eta máichaqueneanahi. Tásiha, náichapa éma:

—¿Tájaha tacayema písapa tipiararecana ena nani amaperuana? ¿Váhiyapa picamatinacavacapai? —náichapa.

Ema Jesús majicapavacapa:

—¿Tájahasica táichavahi eta juca najirairahi? ¿Váhipuca échajicuha eta Sagrada Escritura eta táechajisihairahi eta juca najirasahi ena nani amaperuana? Ani tacahehi: “Píti, Tata, pinacasamurechavacahi ena amaperuana eta máejera-rerayarehi naicha eta najirairayare eta táurinaquene alabanza” —máichavacapa.

¹⁷Te títapiricapa eta majicapiravacahi, majunijicavacapa. Tiyanapa eta te avasarechicha Betania, étapa máimasinehi. Véhicapaichuhisera víti.

Emá Jesús májiquiha eta higo taicha máhiriquirehi

(Mr. 11.12-14, 20-26)

¹⁸Te apanapa sache, te yáticarrahichicha, tiyanavarepa emá Jesús tayehe eta Jerusalén. Véhicapaichuhivare víti apanava. Eta vipaisirapahi, técuhasamurepa éma. ¹⁹Máimahapa eta yucuqui ticaicare higo te achenechacaya. Tiyanapa mapauchahi. Tájinasera táhinahini. Tapacajianachucha. Tásiha, máichapa emá Jesús eta higo:

—¡Pépiyanapa píti eta máhiriquereviare! —máichapa.

Eta macaherahi, enevanepa tijiyujipa eta tapacajiana. ²⁰Eta vímairahi víti, viáraminehi ichape. Viyaserecapa emá Jesús:

—¿Tájaha táichararacavahi eta tájahúchiravahi tájiqui eta higo? —vicahepa.

²¹Emá Jesús tijicapahavipa:

—Jéhesare nusamacarehi me Tata. Éti apana esamacareyareva, te yátupina eta ecasiñavairahi me Viya. Tájina émaitucaimahi. Eratahayare ícha, ecutinuya eta níchaquenehi. Eratahayareva ecayejea eta cerro te apachacaya.

²²Tamutu jácani eyaseserepiyare eta mayehe emá Viya te eyujarasirana, ecaijaracasyare te yátupina eta ecasiñavairahi me Viya —máichahavipa.

Nayaserecapa emá Jesús nájahahipuca tituparacahi éma

(Mr. 11.27-33; Lc. 20.1-8)

²³Tacahe, visiapavarepa tayehe eta te Templo. Emá Jesús, tímiturecavarepa nayehe ena achaneana. Tacahe, napauchapa ena tuparairucanahi. Natiarihihivare ena tinerejicavanahi ena aquenucarahana. Ánipa nacahe:

—Píti, vahi vitupararuvinahini víti eta píchira eta júcana. ¿Nájahasica tímitucavihi? ¿Nájaha tituparacavihi eta juca píchaqueneana? —náichapa.

²⁴Emá Jesús majicapavacapa:

—Núti apanavare nuvaraha nuyaserecahe. Ejicapanuyaresera apaesa numetacahe eta nucatuparahairahi eta níchirahi eta júcana. ²⁵¿Nájahapuca tivanecahi emá Juan eta máitesirahi máicachasirisirahi? ¿Émapuca emá Viya tivanecahi, émajivapuca eta máitesirahi? —máichavacapa.

²⁶Váhisera náituruequenehahini eta najicapirayarehi. Tiácapaemajiricacanapa. Ánipa nacahe:

—¿Tájahasica vicayemayare eta vijicapirayare emá maca? Te vémunahacava vícha: “Mavaneruhi emá Viya”, éma macahénapapuca: “Tásiha, ¿váhiyapa esuapahini éma?”. Téhesera vácahepuca: “Émajivaichucha eta máitesirahi”, ticauyayacerripa titupisichaviana eta te márijahiana ena achaneana, taicha namutuhi náimijachahi emá Juan profetaquenehi yátupiquene, mavaneruhi emá Viya —téchajiricacanapa.

²⁷Tásiha, náichapa emá Jesús:

—Vahi vecha víti —nacahepa.

Tacahe, máichavacapa éma:

—Énerichuvare núti, vahi numetacahémahi nájahapuca ema tituparacanuhi. ²⁸Nuvarahasera nímicutiarachinaheyare. Nararihi ena apinana ticaparapecacana. Ticavanahipa ema émana mayehe ema naiya. Ánipa máicha: “Nuchicha, piyana picaematane puiti jena sache. Pírerecaya eta uva” máichapa. ²⁹Ema machicha majicapapa: “Vahi nuvaraha nucaematane puiti juca sache”. Te tiyerepa, tiyanapanéni ticaematanehi. ³⁰Tásiha, ema naiya mavanecavarepa ema émana machicha, mayanahini macaematanehini éma apanavare. Tásiha, ema amaperu majicapapa: “Tiuri, nuyanayare” macahepa. Váhinéni mayanahini. ³¹Puiti nuyaserecaheyare: ¿Nájaha ema tisuapajirahihi mayehe ema maiya? —máichavacapa ema Jesús.

Éna najicapapa:

—Ema tñapuca, éma tisuapajirahihi.

Tásiha, ema Jesús máichavacapa:

—Nutupiruva numetacahe puiti. Nasapihayare ticachuricaheanayare tisiapana te anuma ena túhusianainihi énapa ena tisipecaturarahianainihi. Éti vahi esiapaimahi. ³²Taicha vahi esuapahini eta máimiturapiana ema Juan Tícachasiricarahini, váhivare ávarahahini étupiricavahini eta itaresirana. Nararihisera ena tisipecaturarahiana, ichape eta nasuapirahi. Étisera, tétavicava eta emasuapajiraiva, tayanapane ímahahi masuapacarevahi éma —máichavacapa.

Éma Jesús máimicutichina ena pártirárioana máurirahana

(*Mr. 12.1-12; Lc. 20.9-19*)

³³Ema Jesús máichavarepa:

—Esamanu eta juca apana nímiturapiya. Nímicutichinaheyare. Matiarahihi ema achane. Ticaevaruhi camuri eta uva te máesane. Manaruchapa eta masucure. Máepiyacavarepa eta nacaticaresihayare eta tachi eta uva. Máepiyacavare eta torre, nápanihayare eta najaneasirayare eta máevaru.

Tásiha, máijaracapa ena achaneana, pártirárioanayarehi. Tásiha, tiyanapa ema achane te apana avasare. ³⁴Tacahe, te títecapapa eta caje tayairahi eta uva, máimivanerecapa ena mamusurana nayaseapanavacayarehi ena pártirárioanahi eta tatucachaqueneyarehi éma. ³⁵Énasera ena pártirárioanahi tisemauchavanarichucha. Nacaratacavacapa, náehapa ena vanairucana. Nacapacapa ema émana. Ema apana nayucaracapa te márijahiana. ³⁶Tásiha, ema achane máimivanerecavarepa ena apamuriana. Camuripananapa. Váhiquesera nájaracahini, náehavacavarepa. Nacapacavacapa ena apamuriana.

³⁷Tacahe, émajacaruvapa máevataca ema machicha. Máimijachaipahi émapapucaini napicauchahini. ³⁸Te náimahapa ema machicha ema ticayehe eta úvaquiji, ánipa nacahe: “Émainapapuca ticayeheyare ema maca. Yare, vicapaca apaesa tánasipa viyehe tamutu. Tájina máicharachavimahi ema achanénavaji”. ³⁹Tacahe, nacaratacapa ema machicha, nacuchucapa eta tayehe eta isaniti, nacapacapa.

⁴⁰Puiti, nuyaserecaheyare: ¿Tájahapuca máicharacavayare ema ticayehe eta úvaquiji ena pártirárioanahi máurirahana? —macahepa ema Jesús.

⁴¹Éna najicapapa:

—Éma tisemainapa. Vaipa májapanuvacaimahi. Macapapanavacayarepa ena pártirárioanainihi. Májaracainapa ena apamuriana pártirárioanayareva, nácani tipicaurahianahi, nájaracahini eta mayehe parte —náichapa.

⁴²Tásiha, ema Jesús máichavacapa:

—Jehe tíurihi eta ejicapiranuhi. Nuvarahasera epanerechinavapaini eta tacayemahi eta Sagrada Escritura, apaesa ácaicutiara éti. Ani tacahehi: “Ena tépiyarecarahiana eta Templo, tasapiha náepuruhi eta mari táicuchihi tatumearayare eta peti, taicha vahi náimatihini. Émasera ema Viya macaitcapahi eta te táicuchihi eta tatuparahahi. Tacapicahuquenehi puiti. Táitusiava, tétavicavahi eta vicunachirahi víti ema Viya” tacahehi eta Sagrada Escritura. Nuvaraha ecaicutiaraya.

⁴³Puiti numetacahe: Táichavenehi eta emasupajiraivahi, vaipa étiparacaimahi tayehe eta mavanairipi ema Viya. Ena tisuapajirahianahi, éna ticavacureanayare te jena sáchezare. Énainapa téchanayare eta vanairipiana. ⁴⁴Puiti, núti nucutihi eta ichape mari náepuruquenehi. Eti épurunuanahi, iáquipaicavayare évetutujicayare. Tichimaracahenapa eta muraca ecuñaraqui taicha eta emavarahairahi éhicanu —máichavacapa.

⁴⁵Étasera eta nasamirahi ena tuparairucana énapa ena fariséoana, tisemanarinehi taicha tímaticavanapa eta énairahi tayunacavaca eta máimicutichiravacahi ema Jesús. ⁴⁶Navarahapa nacaratacayarehíni. Tipicacavanachuchasera nayehe ena achaneana taicha namutu nacunachahi ema Jesús eta émairahi vanairuca me Viya.

**Ena Jesús tímicutichava mácani rey te máichuhavacapa
ena machimaranaya, máichayarehi eta ichape piesta**

22 ¹Ena Jesús máimitucavare ena achaneana eta apana máimicuti-chaquene. Ánipa macahe:

²—Ena Viya, macutihi mácani rey te máimiyenachayare ema machicha, máichayarehi eta ichape piesta. ³Mavanecapa ena mavanarana náichuhapanavaca ena machimaranaya. Váhisera návarahahini nayanahini éna. ⁴Tásiha, ema rey máevatacavare ena apamuriana mavanarana. Ánipa máichavaca: “Eyanavare étipava ímitatajiricavaca ena níchuhaqueneanahi, náitecavanepa. Nucaparecaripahi eta vaca nirureyare nésinaruanahi. Tiúrinapa tamutu eta juca tinicacare. Énanecha nucuchapahi náitecavanepa” macahepa.

⁵Énasera ena máichuhaqueneanahi vahi nasupahini. Nájina nayanahini. Ema émana tiyanapa te máesane. Ema apana máimahapana eta mayehe tienda. ⁶Ena apamuriana nacaratacapa ena vanairucanainihi, náehavacapa, nacapacavacapa. ⁷Tacahe, te máechapa ema rey, tisemapa. Mavanecapa ena masuntaruana nacapapanavaca ena ticapahianahi. Náijuchavare eta tamutu

eta napenanaini. ⁸Tásiha, máichavacavarepa ena apamuriana mavanaranahi: “Tiúripa tamutu eta juca tinicacareana. Váipasera nuvaraha náiteca ena náinapureanahi níchuhaqueneanainihi. ⁹Eyana te tamutu cálleana. Íchuhavacayare namutu nácani ecainunaqueneanayare” máichavacapa. ¹⁰Tacahe, ena mavanaranahi tiyananapa, náchehupanevacapa. Nacurujicavacapa namutu nácani nacainunaqueneanapahi: nácani achaneana tiúriana énapa ena súnsusurujiana. Camurianahi. Tínicanarinehi eta te távihayarehi eta piesta.

¹¹Tacahe, ema rey tisiapapa, máimahayarehi ena machimaranahi. Máimahapa ema émana achane ema matiarihiquenehi vahi manacahini eta namuirihasa te ticaichuasiana. ¹²Tacahe, máichapa: “Ajaira, ¿tájaha tacayema vahi pinacahini eta múiriare njararuheanahi tayeheyarehi puiti juca piéstayarehi?” Émasera ema achane vahi majicapahini. ¹³Tacahe, ema rey mavanecavacapa ena mavanarana: “Eveha ema maca. Ítjivaucha, ítiápechavare. Íyaracuhapana te timapicu tayehe eta máiyauchiavayare macapitiquiahechiavayare” macahepa ema rey.

¹⁴Ema Jesús máichavarepa:

—Numetacahe puiti: Camurianahi ena níchuhaqueneanapaipahi. Ánimurianarichusera ena títaurahianayare —macahepa ema Jesús.

Navaraha náemejecapavacha ema Jesús tayehe eta impuesto

(Mr. 12.13-17; Lc. 20. 20-26)

¹⁵Tacahe, eta nasamirahi ena fariséoana, tiseanmarinehi. Tiyananapa ticurujicacanapa, navarahaipa náemejecapavachayarehi apaesa étainahipucaini taviuchahini ema Jesús. ¹⁶Tacahe, navanecapa ena nachamuriana énapa ena políticoana. Nayaserepanahi ema Jesús. Te náitecapauchapa, ánipa nacahe:

—Tata maestro, vímatihi eta tatupiruvairahi táurivahi eta juca pímiturapianahi. Yátupihi eta pímitusiravacahi eta táurinaquene achene ticaijuhe me Viya. Váhivare pipicacaracavahini eta péchajisihairahi eta náichavaquenévanahi nácani achaneana, tayanapanehi aquenucahi.

¹⁷Vivarahahisera viyaserecaviyare eta pipanereruhi: ¿Táuricahipuca vivachacha eta viyasehana impuesto mayehe ema Presidente Emperador romano? Taicha víti, machanerahavihi ema Viya, ¿masi? —náichapa.

¹⁸Émasera ema Jesús máimatiacavacapa eta tamaurivapahi eta napanereruana. Tacahe, máichavacapa:

—¡Apimirahetataji! ¿Tájaha tacayema evaraha ímiaquipaicanu?

¹⁹Nímahaseji, iáminanu étapena eta reale —máichavacapa.

²⁰Eta náijarasirapa, éma máichavacapa:

—¿Nájaha ticaijare eta juca? ¿Nájahavare ticavasimahi eta juca mirare eta te juca reale? —máichavacapa.

²¹Éna najicapapa:

—Mayehe ema Presidente Emperador —náichapa.

Tacahe, éma máichavacapa:

—Tiuri, táuricahi fjaraca ema Presidente Emperador eta juca mayeherichuhi éma. Tásiha, fjaracavare ema Viya eta mayeherichuhivare éma —máichavacapa.

²²Te nasamapa ema Jesús eta majicapiravacahi, ichaperinehi titsiriha-cavanahi. Náramipa eta máitupajijiasiravahi. Tiyananapa tichavanahi.

Nayasereca ema Jesús náicharacavayarepuca ena náepenaqueneana eta náechepusirayare

(Mr. 12.18-27; Lc. 20.27-40)

²³Étarichu te jena sache, nacahepaipahi ena saducéoana. Ena nani saducéoana, apanahivare eta náimiturapiana. Éna, vahi nasuapa eta náechepusirayare ena náepenaqueneana. Tiyananapa náimahapanahi ema Jesús. Natanucahi eta táetseraruvayarehi náicha. Ánipa nacahe:

²⁴—Tata maestro, ema víyarahaini Moisés, manaquicahi eta máechajiriruvahi eta viyehé: “Te máepenaquenehahipuca ema achane esu mayena, tásiha nájinahipuca manaquiequeneruvainahini machichainahini; te matiarihihipuca mácani maparapehi, mavehayare esu machinenaequenéni, apaesa émainapuca macachicha eta suyehe, máitsivainahi ema maparapéni”. ²⁵Tacutiqene te juca vitaracu, natiarihinili ena siétequeneana ticaparapejiricacana. Tacahe, ema náechavimuri títauchavapa. Máepenaquenehapasera esu mayena. Nájinahi machichainahini. ²⁶Tacahe, ema maparape máitauchavare esu machinenaini. Énerichuvasera máepenaquenehavare, nájinavare máchichainahini. Ema émana maparape máitauchavare ésu. Énerichuvare máepenaquenehavare. Namutupa ena siétequeneana navehahi ésu, tásihasera náepenaquenehapaipa, nájina émanainahini macachichahini eta suyehe. ²⁷Te táequenepa, tépenapa esu esenaini. ²⁸Tacahe puiti, te apanapapuca eta náitaresirayare ena nani, ¿nájahapuca ena siétequeneana ema yátupiquenehi suímaquenehi esu esena, taicha ena siétequeneana namutuhi suímanarihi? —náichapa.

²⁹Tásiha, ema Jesús majicapavacapa:

—Éjecapava éti. ¿Tájaha tacayema vahi ácaicutiarahini eta táimiturapi eta Sagrada Escritura? ¡Váhivare evarahahini esuapahini eta tamutuirahi marataha ema Viya! ³⁰Ánaqui te apana náitaresiraya, vaipa nácamunuimahi esu esena. Énaripa ena esenana, váipavare nácamunuimahi ema ajaira. Nacutinapa ena ángeleana tiávihanahi te anuma eta namaepenacacairahi. ³¹Éti váhivarepuca ácaicutiara eta yátupirahi eta vahi táepenahini eta náchanevana ena náepenaqueneana. Váhipuca ácaicutiara eta máechajiriruva ema Viya. Ani macahehi éma: ³²“Nútira yátupiquenenuhi Viya, macasiñaquenehi ema Abraham, ema Isaac émapa ema Jacobo” macahepa ema Viya. Nutupiruvahi numetacahé: Ema Viya, éma téchahi eta náitaresirana ena téhicanahi, tayanapane tépenanaripa. Eta náchanevana, tímiyanavarichucha títareca te mamirahu. Éti, ichape eta éjecapiravahi —máichavacapa ema Jesús.

³³Tacahe, eta nasamirahi ema Jesús, ichaperinehi eta náramirahi ena achaneana eta máimiturapihi.

Eta tisuapacarepanahi te mavanairipiana ema Viya

(Mr. 12.28-34)

³⁴Tacahe, ena fariséoana eta náimairahi macamatinasiravacahi ema Jesús ena saducéoana, ticurujicacanapa éna. ³⁵Tásiha, tiyananapa náemejecapavachayarehi ema Jesús. Ema émana ticainapucavapa, máestrohi éma tayehe eta nayeherepiana. Mayaserecapa éma:

³⁶—Tata maestro, nuvaraha pimetacanuini ¿tájahapuca eta vanairipi tisuapacarepanahi tayehe eta mavanairipiana ema Viya? —macahepa.

³⁷⁻³⁸Ema Jesús majicapapa:

—Eta máechajiriruva ema Viya te Sagrada Escritura, ani tacahehi: “Yátupina eta émunasiranuina nuti Iáquenu. Iúnaca te esamureana. Yátupina eta ecachanevairanuina núti. Epanerecha eta nímiturapiana tamutu sácheana, yátiana”. Étara eta juca eta vanairipi tisuapacarepanahi. Éta tativayare ítauchayare, títapuca tayehe eta apamuri vanairipiana. ³⁹Eta apana táehiruhi eta juca, ánvare tacahe: “Pémunacayare ema piparaepiyahi, tácuti eta pémunasiravahi píti”. ⁴⁰Eta juca apinaquene vanairipi, éta máehicahi ema víyarahaini Moisés tayehe eta apamuriana mavanairipianahi éma. Énaripa ena apamuriana profetana, étarichuvare náehicahivare éna tayehe eta náimiturapianahi.

Yátupi ema Cristo mámaríequenénihí ema rey David, Víyahivare éma

(Mr. 12.35-37; Lc. 20.41-44)

⁴¹Tacahe, eta náurujiásiraichaha ena fariséoana te machacaya ema Jesús, ⁴²máichavacapa:

—Puiti, nuvaraha nuyaserecahe eti: ¿Tájaha tacayema eta epanereruana éti mayehe ema Cristo ema ecuchapaquenehi? ¿Tájaha eta ícutiarayare eta ímatirayarehi éma te máimerecapa? —máichavacapa.

Éna najicapapa:

—Vímatinapa éma taicha tíuchucayare mámariequenyare ema víyaraháini rey David —nacahepa.

⁴³Majicapavarepa:

—Yátupihí ema Cristo achanequenehi eta máimahi taicha mámariequenyarehi ema víyaraháini David. Nuvarahasera epanerechaya eta juca máechajiriruvahi ema David te májurehi Salmo, ani macahehi: ⁴⁴“Ema Viya máichapa ema Tata Náquenu Cristo: Yare, péjaca te nuvaure, eta picuchapíhayare eta nucaepuyusiraya te pimirahu ena ticatianacavianahi” macahepa. ⁴⁵Ema David, eta máimijarechirahi ema Cristo “Tata Náquenu”, ¿tájahapuca eta macayemaquenehi? Núti németeaca Víyahivare ema Cristo. ¿Tájaha íchahi éti? —máichavacapa.

⁴⁶Eta nasamirahi eta juca, nájina nájaracavahini najicapahini. Eta tacahe, nájínapa napatsicavahini nápechahini nayaserecahíni.

Ena Jesús máimereuchavaca eta náejecapiravana ena fariséoana énapa ena escribánoana

(Mr. 12.38-40; Lc. 11.37-54; 20.45-57)

23 ¹Tacahe, ena Jesús máichavacapa ena achaneana vítipa viti máimitureana. Ánipa máichahavi:

²—Ena escribánoana énapa ena fariséoana tímijachavana catuparahana eta navepaisirayarehi eta mavanairipiana ena Moisés. ³Tacahe, éna esuapayare. Ítauchayare eta navanairipiana. Váhisera ecuehica eta nayeherepiana taicha ena apapipijichucha eta napanereruana. ⁴Tacutiquene tipamicheana ítauchaya eta camuriqueneana nayeherepiana. Éti, tájina eta eJapanucrehíni nayehere. Nájinapa tiratahaimahi títaucha. Apanasica éna, vahi náratahahini náitauchahini tamutu. ⁵Tímijachavanahi tamutu náitaucha, navarairahi ticunachacareanayarehi nayehere ena achaneana. Tisiñavavaicanahi eta nápajusiravahi religiósoana. Nanacahi te nanahuana eta ajureca navejurehi eta te Sagrada Escritura. Tacutiquene eta nacamuirihaira tísapepeacavanahi píncanillanahi. Ticamatsivacahi eta nacamuirihaira. ⁶Ena nani, te ticaichuhasiana eta nanisiraya, éna tinerejisinavanahi eta tíúrinapanána eta náejasihaya. Navarahahivare ichape eta napicauchiraya ena achaneana te náurujsirarevanahi. ⁷Tétavicavahi eta navarairahi ticapichuana. Navarahahivare ticacajamicasianayarehi te jácani nácapajisiha ena náimitureana téhepahi calle.

⁸Étiserá vahi ecujamuracha eta nacajamisirahenahini ena achaneana, étainapapucaini nacunachirahenahini. Taicha éti eparapejiricacahi, ecuticacahi te mamirahu ena Viya. Nucarichu núti yátupiquenénuhi eyehenuhi Maestro, nuti Cristo. ⁹Váhivare “Tata Nucaiyaquene” ecuquicha nácani achaneana te juca apaquehe. Taicha mararihi ena yátupiquene Ecaiyaquene, ena tiávihahi te anuma. ¹⁰Váhivare tísapacaré mahi eta náimijarechahe, “Tata nuyehere jefe”, taicha nucarichuhi núti yátupiquenénuhi jéfenuhi eyehe. ¹¹Nuvarahasera ítátijiricacayare. Nácani títátirahiana, éna ticunachacarepananayarehi eta eyehe. ¹²Énerichuvare nácani mánsuanahi, éna ticunachacarepananayare me Viya. Nácanserá ticasíñavavaicanahi ticunachavanapuca, tímitsiriávanayare me Viya —macahepa.

Ena Jesús mayunacavaca eta náejecapiravanahi ena escribánoana énapa ena fariséoana

¹³Tacahe, títecapanapa ena escribánoana énapa ena fariséoana. Tásiha, ena Jesús máechajicavacapa éna, mayunacavacahi. Ánipa macahe:

—¡Éti escribánoana étipa eti fariséoana! ¡Muracayare eta ícuñayare taicha eta apimirairahehi! ¿Tájaha tacayema ímijachavahi éti echa eta tapaja eta anuma? Vahi ísapa nasiapahini ena achaneana, nácani tivarahana tisiapana. ¡Étiripa vahi ítujicavaimahi esiapa!

¹⁴Jucarihi eta apana tiviuchahehi. Tatuparacahi eJapanuyare ena tépenaimana te váhipuca narataha navachachahini eta nantéve. Étiserá everejicavacahi tamutu eta nacayehequeneana. ¡Apimirahehi! Épiyacavahi religiósohehi, íchahi úpiemahi eta eyujarasira te namirahu ena achaneana, evarairahi vahi tacuimicaecherachava eta emaurivanahi. Ichapeyare eta ícuñayare táicha.

¹⁵¡Jucarihivare eta apana tiviuchahehi, éti escribánoana étipa eti fariséoana! ¡Muracayare eta ícuñayare taicha eta apimirairahehi! Éti, tétavicavahi eta éñamavairahi eta íturuca ena téhicana eta ímiturapiána, eyanirahi te avasareana tiyerehiana. Tasapihahi ímitucavacahi eta nacutiheraya eta evainarajivahi. Tiápajucava eta namaurivahi ícha. Eta tacahe, ecachanevacayare éna te yucu infierno.

¹⁶Jéhevare éti ecaijare páurehe. Ichape eta ícuñayare taicha eta ímiaquipaisiravacahi ena ecutiqueneana púchuquiána. Éjecapavahi tayehe eta juca ímiturapihi. Ímituca eta tájinahi eta taviuchaimahi nácani najurachahi eta Templo. Étasera te najuracha tayehe eta oro eta tiávihahi eta te Templo, ticaviurevanainapa ícha éti. ¹⁷¡Tétavicavahi eta emaecharaireva eti púchuquiána! Eta Templo, étara tipicauchacarepanahi tayehe eta oro tiávihahi tayehe. ¹⁸Iápechavavare eta éjecapiravahi tayehe eta apana ímiturapi. Éti íchavare: “Te náichapuca nácani eta promesa, najurachapuca tayehe eta náijuchirare eta sárareana, tájinai-pavare ticaviurémahi. Téhesera najurachahi tayehe eta nanaquiruvahi te táinahu eta náijuchirarehi, étasera ticaviurevanaripa” íchahi éti.

¹⁹¡Tétavicavahi eta emaecharaireva eti púchuquiána! Eta náijuchirarehi eta sárareana, étara tipicauchacarepanahi tayehe eta enaquiruvanahi. Éta tímipicauchahi eta enaquiruvanahi. ²⁰Taicha nácani tijurachanahi tayehe eta náijuchirarehi, vahi tácarichuhini napicauchayare éta, napicauchayarehiva tamutu eta námavahuana tiávihanahi te náijuchirarehi.

²¹Tacutiquene nácani tijurachanahi tayehe eta Templo, vahi tácarichuhini náichahini eta juramento tayehe eta Templo. Najurachahivare mayehe ema Viya tiávihahi tayehe. ²²Énaripa ena tijurachanahi tayehe eta anuma, najurachahivare mayehe ema Viya, taicha eta anuma étahi eta mávasa, étaipa eta máejasihahi ema téchahi tamutu.

²³⁻²⁴¡Jucarihivare eta apana tiviuchahehi eta tamuracavaya eta ícuñayare, éti apimirana! Éti ímijachavahi íminecapaequeneha ena ecutiqueneana púchuquiána tayehe eta títucareana. Ímijachavahi yátupiquenehi eta religiósohéirahi eta epamisiravahi eta ítauchira eta vanairipi eta ecama-vahuira me Viya eta diésmuri tayehe eta sucurecana. Ecunachacarehi taicha éta. Váhisera epamicavahini eta táuriqueneana ticunachacarepanahi me Viya. Tatuparacahe emutu áJapanurahi; ecatiuchavacayarehi ena macatiuchavarahanahi; yátupina eta ítauchiraya tamutu eta fjarasiravahi; yátupina eta ecasiñavairaina me Viya. Tatuparacahevare ecamavahu eta me Viya

eta diésmuri. Éti éñamavahi eta itauchirahi eta ánichichana, étasera eta tisupacarepanaqueneanahi táuriqueneana, tasapihahi vahi esuapahini¹.

²⁵ ¡Tétavicavahi eta apimirairahehi! Éti ímijachavahi yátupiquenehi religiósohehi, ecañamaracavahi eta ímianiravaya itaucha eta eyehe-repiana. Étasera eta esamureana, tétavicavahi eta tachipejivavacahi taicha eta ecaetemaraivana étapa eta íjarasiravahi icha tamutu eta ejamuraraivana. ²⁶ ¡Tétavicavahi eta epuchiquiva eti fariséoana! Tamapurujihí eta religiósohéirahi. Tacamunuhi tativa esipaca eta esamureana, apaesa yátupinasarepa eta iúrivayare, tipachinainapa eta itaresiraya.

²⁷ ¡Tétavicavahi eta ecatajivairaya, táichavenehi eta apimirairahehi, eti escribánoana étipa eti fariséoana! Éti ecuti eta covacha. Tiúrinahi te táinahu, téhesera te amahe távihahi eta máeperejiqueneana. ²⁸ Tacahehi eta itaresirahi éti. Ticutimahinehi iúrihi te namirahu ena achaneana. Étasera te esamureana táurujsiavahi eta evainarajivana, tacutiquene eta apimirairahehi.

²⁹ ¡Páurehesamichapucaini eti escribánoana étipa eti fariséoana! ¡Ichapemuriquene eta eviurevanahi! Eti, ímijachavaipahi puiti ecunachacarehi eta evarairahi échapajirica eyeheheacahi eta náecariana ena profetanaini matapiravarequeneanahi, nacaparuanahi ena iáchucanaveanaini éti. Épiyacavahi yátupiquenénahini eta iúrivahi. ³⁰ Tásiha, ánivare ecahe: “Te vitiarihinaripahini víti eta acane te ticaparecanapa ena viáchucanaveanaini, vahi vicuimicasiapavahini tayehe éta” ecahepa. ³¹⁻³² Étijivapa ímereuchavahi eta apimirairahehi, taicha puiti éti epanerechahi ecapacanuya, tacutihi eta napanereruanahi ena iáchucanaveanaini. Tásiha, ecuticacayare eta naviurevahi ena iáchucanaveanaini.

³³ ¡Éti tachichanaveanatataji eta quichare, tétavicavahi eta evainarajivahi! ¡Váhiquene ticaíticahémahi eta ícuñaya te infierno! ³⁴ Nímicaecherachayare eta evainarajivahi. Nuvanecayare napauchahe ena nuchanerana. Éna, timetacaheanayare eta mapanereruana ema Tata. Tímitucaheanayareva tamutu eta nímiturapiana. Nasapihayare vahi esuapaimahi éna. Éna, yátupihí náituca. Émepurecayaresera éti eta náitupajijiasiravahi éna. Esapihainapa, éti ecapacavacainapa éna; ena apamuriana émétatacayare te crusu. Tásiha, ena apamuriana éstacavacainapa te iúrujsirarevana. Éhica-rairicavacainapa te jácani avasareana najunaiyayarepahi.

³⁵ Tásiha, eta ecapasiravacainapa ena nuvanermanahi, étinapa tamuriacayare eta naviurevanahi namutu ena ticapacanahi ena achaneana matapiravarequeneanahi. Ema Abel máinapuiruhi nacaparuhi, máetaviuchainihí eta máuriva. Émapa ema máequenereruhi Zacarías (machichainihí ema Berequías), ema nacaparuhi te tamirahu eta Templo. Camuriana-

i Mt. 23.25 Ani tacahe eta mayeherepi ema Jesús te máechajiriruva: “Eti ecaticaja eta chupi; ejircasera eta camello”.

hisera ena apamuriana náumurivanainihi. ³⁶Nutupiruva numetacahe puiti: Étinapa tamuriacayare tamutu eta náepeniranahi. Títecapainapa eta ícuñayare eti achaneana ítareruanahi puiti —macahepa ema Jesús.

Ena Jesús ticatisamurevahi táichavenehi eta namasuapajiraivahi ena achaneana ticavasanahi te Jerusalén
(Lc. 13.34-35)

³⁷Tacahe, ema Jesús tíápechavava máechajicavacapa ena achaneana. Ánipa macahe, taicha eta macatisamureravahi:

—¿Tétavicavahi nucatisamureravahi ícha étisami eti tachichanaveanahi te juca viávasa Jerusalén! Ena íchucanaveanaini, éna ticapapajicanahi ena profetana mavaneruanahi ema Tata. Puiti étipavapa evaraha ecutiya ena íchucanaveanaini. Ichapemurihinéhi eta níchuirahéhi éti, iúrujiacanhini, tácutihini eta varayu te tacurujimuriha eta tachichanaveana eta te tapava. Váhisera ávarahahíni. ³⁸Ímahainapasera puiti eta íchararacavayare. Ticaquipaicasiyare tamutu eta epenana, étiripa ticuchucaheanainapa. ³⁹Numetacahevane puiti vaipa íápechavaimahi ímahanu, tiámainucavainapa te ítsivachapa eta epanereruana, evarairayare ejacapanu. Ecahénapa: “Ichape eta vicunachiravihi píti vanairucaquenévihí me Viya” ecahénapa.

Ena Jesús máimereucharipa eta táquipaisiravaya eta Templo
(Mr. 13.1-2; Lc. 21.5-6)

24 ¹Tacahe, ema Jesús tíúchucapa tayehe eta Templo, tiyanaya-repaini. Vítisera viti máimitureana vémeñahavapa eta mayehe. Eta viáramirahi, vímechapa eta táurinaqueneana mari tayehe eta anuquehe peti te Témplosami. ²Émasera ema Jesús tijicapahavipa:

—Tamapurujiyare eta juca táurinava eta pétisami ímahaquenehi puiti. Nutupiruva numetacahe: Járájapayare eta sácheyare ticaquipaicasiyare tamutu eta juca Templo. Téjanerepaicainapa tamutu eta juca táurinaqueneanahi ímahaqueneanahi puíti —máichahavipa.

Tatarihiyare eta ecutiarareanaya te tánehipaicha eta táichecuiraya
(Mr. 13.3-23; Lc. 21.7-24; 17.22-24)

³Tásiha, viyanapa tayehe eta cerro Olivoquiji, víputsicavapa. Te vítecapapa, téjacapa ema Jesús. Tásiha, víti máimitureana viyaserecapa: —Vivaraha pimetacahavi. ¿Tájamuhupuca eta náimiauquipaisirayare eta Témplosami? ¿Jararihiyarepuca eta ecutiarareyare eta piápechiravayare píteca, étapa eta táitauchirayare eta táequenereruhi mapanereru ema Viya? —víchapa.

⁴Tásiha, ema Jesús máichahavipa:

—Ecuneuchavaicha yátupina, machu navayuacahe, taicha nárajapayare ena tépiyacavanayarepahi tímivisichavanayare nuyehe. ⁵Nacaheyarepahi éna: “Nútiripa Cristo”. Nasapiha navayuacayare ena camuriana achaneana.

6-7 Énerichuvare esamairiricayare eta táehacacairayare eta ichapequeneana avasareana. Ticanarajiricacanainapa eta te avasareana tayerehiqueneana, énerichuvare ticauyayacarenapa guerraina eyehe éti. Váhisera ecuarameca eta esamairirisiraya, taicha ene tacaheyare eta táepaniravayare eta ecutiarareanayare. Vuíchahasera étaimahi eta táichecuirayare. Énerichuvare tatiarihiyareva eta ichape ecumahuhuyareva te avasareana. Tatiarihiyareva eta ichape tayamurisirananya eta apaquehe te jácani távihanapahi táetupiaruyare. 8 Tamutu eta juca ecutiarareanayare eta táepaniravayare eta nátajivanayare ena achaneana.

9 Tásiha, eti nuchaneranahi, ticatianacaheanainapa ena achaneana, táichave-neyare eta éhisiranuhi. Tipanajiricaheanainapa te tamutu avasareana. Ticaratacaheanayareva. Ticapacaheanayareva. 10 Tásiha, nararihinapa camurianaya ena tñajicavanayare eta náehisiranuhi. Tásiha, ticatiana-caheanainapa éti yátupiquene eta éhisiranuya. Tíjararecaheanainapa éti. 11 Natiarihinavarepa nácani tépiyacavanayare mavaneruana ema Tata. Tamutusera eta náimiturapiana náepiyahiraivayarechucha, camurianayare ena navayuaruanayare. 12 Énaripa ena arajuruana, tétavicavainapa eta namasua-pajiraivaya, vaipa napicauchaimahi ema Viya. Camurianayare éna vaipa témunarahianáimahi. 13 Étiserá nuchaneranahi, te ecamichahi tamutu, ímiyanavahivare eta éhisiranuhi te táitavapa tamutu, nucuchucuhaheyare núti.

14 Énerichuvare, eti nuchanerana ecametarairuyare te tamutu avasareana, taicha nuvaraha náecha namutu ena achaneana. Ímitucavacayarehi eta najacapacarevahi me Tata namutu ena téneuchavanahi, étpa eta apamuriana nímiturapiana. Te ítecapapa te tamutu eta avasareana, nápechavayare nuchava.

15 Numetacahevaneyare eta apana. Járájapayare eta sache táíñehique-neyare. Tímerecavaya ema achane váinarajiquene, máechajisihauenehi ema víyarahaini profeta Daniel. Mavanecayare ena machanerana náechipejisi-rayare eta tacapicahuquenehi Templo, nacuchucavacayare ena téhicanahi ema Viya. (Nácani navaraha nacaicutiara eta juca, tacamunuhi ticaravahuanayare eta májurehi ema víyarahaini Daniel.) 16 Tásiha, te ímahapa eta juca, esamairiricapapuca, táuricapa etatajipa ejunavane, éti etiarihiqueneanahi te Judea. Ecaijuheyare eta te cérrona, étaina eyumurusivaina. 17 Nácani tiávihanahi te nayehe canchón te nasamairiricapa eta juca téchacarehi, táuricapa najunavanepa. Vaipa táuricahini nasiapanumahini te napenana, navehahini jácani náeñamaqueneanainihi. 18 Nácani tachimararuanayare te vamáhi eta téchacarehi, táuricapa vaipa nacuchava tayehe eta avasare, tayanapane náeñamahi eta nayereruvana. 19 ¡Páureanasami nácani esenana tachimararuanayare, nácani ticajarianahipuca, nácani esenana ticachichanahi eta amuya tiájicachaha! 20 Eta tacahe, eyaseacayare ema Viya tacuija táichejicahé; váhivare

j Mt. 24.20 Ema Jesús máechajisihahi eta ticasarahimuhu, tiquivamuhuhivare te jena mávasa Judea. Máechajisihahivare eta nayeherepi ena israelítana eta váhiquene náisapavahini tiyanana tipaicana te jácani sávarumuhuana.

tacuchimaracahe eta ichape tiquiva te achene te eyanapapuca ejuna. ²¹Te jena sácheanayare, tétavicavayare eta nacatajivairayarehi ena achaneana. Tájina tácutimahi eta táñehivayare eta nacatajivairayare, te táepaniravahi eta náitare-sirahi ena achaneana te juca apaquehe. Te táequenénapa eta tíñehi, tájinainapa tácutimahi. ²²Nájina tacaitirumahi eta nacatajivairayarehi ichape. Macaiche-cavaneyaresera ema Viya eta masemavahi ema maca achane váinarajiquene, mavarairahi ema Viya macuchucuhavaca ena machanerana manerejiruana, majapanuqueneanahivare. Taicha te vahi macucaicheca ema Viya, máitamuriha-hipucaini macapapajicavaca namutu ena achaneana ema maca achane.

²³⁻²⁴Énerichuvare te tánehipaicha eta juca, natiarihinapa ena tivayuarahiana tépiyacavanayare Cristo tímivasichavanainapa núti. Natiarihivare ena tímicu-tijiricavanayare profetana mavaneruinahini ema Viya. Áninapa nacaheyare: “Yare, éhicayare ema Cristo. Matiarhipahi te juca vitaracu”. Ena apamuriana ánvare nacaheya: “Náepiyahiraivahi éna. Ema Cristo mávihahi te viávasa víti”. Étisera vahi ecusuapavaca. Eta navarairahi tivayuacaheanaya eti machanerana ema Tata, náituruequenehayare naicha eta ichapequeneana tiáramicareana ecutiarareanayare. Camuriasamiyare ena navayuaruanayare. ²⁵Étisera vahi tivayuacaheanaimahi taicha numetacahevanehi puiti. ²⁶Te náichahepuca: “Ímaha máenahi ema Cristo ánaqui te mávapahi apaquehe”, vahi ecuyana. Étaripa te náichahepuca: “Mararihpa jácani tayumururevaquenehi cuarto. Vicarichu viti vímatihí eta mávihahi”, váhiquenevare ecusuapavaca. ²⁷Taicha te yátupinapa eta nítésirayare núti, nucutiyare eta tájjahúchirava títecapa eta térameca. Namutuyare ena achaneana te juca apaquehe tinecapanuanayare. Tacaheyare eta nuchavirayare nuti Manerejirunuhi ema Viya. ²⁸Vahi ecueñamava távihapuca nítecapihaya. Núti nítecapauchaheya te jácani iávihahi éti^k.

Eta machavirayare ema Manerejiruhi ema Viya
(Mr. 13.24-27; Lc. 21.25-33; 17.26-30, 34-36)

²⁹Tacahe, te táitavapa eta juca nacatajivairaya ena achaneana, enévanénapa témahainapa eta sache. Étaripa eta caje, témahainavarepa. Témiricanainapa eta jarairiquiana. Étaripa eta tiávihanahi te anuma vímaimahaqueneanahi énerichuvare tiyamuricanainapa, tiyejejecavanainapa. ³⁰Tásiha, náimahainapa te anuma eta núcutiara núti Manerejirunuhi ema Viya. Tíyahanainapa eta napisira namutu ena achaneana távacuanahi eta avasareana te apaquehe. Tásiha, tímahanuanainapa núti. Tiámanuinapaipa eta úcaji eta núcupaisirayare. Tétavicavayare eta nujaraivayarepahi, níñehinapaipa. ³¹Nuvanecaya ema Arcángele, muracayare eta macachujairayapahi, apaesa ena ángeleana nacurujicainapa namutu ena nuchanerana nunerejiruanahi, tiásihanayare te tamutu eta juca apaquehe.

k Mt. 24.28 Te máechajiriruvahi ema Jesús, áni macahehi: “Te jácani mávihahi ema máepenaquene, eta távihayare eta sipuquiána”. Eta juca mayehehi proverbio, tatiaríhi eta tacayemaquenehi tayumurevahi.

³²Tiuri puiti, nuvaraha nímicutichinahe eta jácani yucuqui. Eta táitsivachiravavacapa eta tapacajiana, te ímahapa eta tajimuyairapa eta tatavaqui, tíuchucayarepa eta tapacajianaya arairu, tímaticarehi tíánehiripa eta únemuhuirayarépa. ³³Ene tacahehi, te ímahayarepa tacaecherapa eta júcana ecutiarareana, ímatiacainapa eta tánehirainapa eta nuchavira. ³⁴Numetacahevanecha: Vuíchaha tívavanaimahi ena achaneana náitareruanaichaha te táitecapapa eta júcana ecutiarareanayare. ³⁵Títavainapa eta anuma étapa eta apaquehe. Tativayaresera títauchava tamutu eta numetaruheanahi.

³⁶Eta juca tíáramicareyarechucha. Nájina téchaimahi tájamuhuyarepuca eta táitauchiravayare, énaripa ena ángeleana vahi náechahini. Nútivanerécahipucáini néchahini. Macarichu ema Tata, ema téchahi. ³⁷⁻³⁸Tacutiyaire eta acane eta náijahúchiravahi tépenana ena achaneana machamurianaini ema Noé. Ena nani tinicairihianarinecha, náematanerinecha térana, tímarerecanahi ena nachichanaveana. Vahi téñamavanaimahi eta náimairahi ema Noé eta masiapirahi tayehe eta ichapequene pacure. ³⁹Tájina vahi natsecavahini eta táitecapauchirayarehi eta ichape une. Tacahe, eta táemirisirapa eta ichapequene tiquiva, tacapapajicavacahi namutu éna. Ene nacaheyare ena achaneana te jena sácheyare. Vahi natsecavahini tayehe eta nuchaviraya. ⁴⁰Te jena sácheanayare, natiarihiyare ena apinana ajairana ticaemataneanahi te isaniti, ema émana tíáramicareyare tíára. Ema apana manasinapa. ⁴¹Tacutiquene, apinanahipuca ena esenana cáemataneanahi tiyuvarecanahipuca. Énerichuvare esu ésuna tíáramicareya tíára. Esu apana sunasinapa.

⁴²Eta tacahe, etsecavahi ecauneuchava éti machu vahi ecunecapauchava eta nítesirayarehi nuti Iáquenu. ⁴³Nuvaraha ácaicutiaraquenéna. Machu ácutiriana mácani achane námeyeruhi ena tíámerahiana. Tájina máechapiavahini tájahapuca hóravayarehi eta náitecapauchiraya te mapena. Te máechapucaini, ticauneuchavaipahini éma, váipasare nacuameyechahini. ⁴⁴Eta tacahe, éti ecuneuchavayare tamutu sácheana, taicha vahi échahini tájamuhuyarepuca eta nuchavirayare nuti Manerejirunuhi ema Viya, machu iáramecariana.

Nararihi ena músuana tíúriana. Nararihivare ena músuana máurirahana.
(Lc. 12.41-48)

⁴⁵Tiuri, nuvaraha nímicutichinaheyare eta apana. Macañárihipuca ema empleado máetaviuchahi eta máitupajijiasiravahi. Tisuapajirahivare éma. Ema máquenu tiyanayarehi te apana avasare. Táitusiava ema máquenu matuparacahi ema empleado eta máijarasiraya eta tinicacareana ena apamuriana machamusuvanahi. ⁴⁶Tétavicava eta máuricacarevaya ema maca ticatuparahahi, te tamutuhi máitauchahi jácani machimampirana ema máquenu. ⁴⁷Németeaca, eta tamutuirahi tiuri eta machimampirahi,

matuparacainapa éma téchayarehi tamutu eta máimahaqueneana. Eta tacahe, nuvaraha ácutipaini ema maca empleado tíurahi eta máitauravahi. ⁴⁸Téhesera váhipuca tiuri eta mapanereruana ema mácani empleado, máimijachaichucha tiyereyarehi eta máitecapirayarehi ema máquenu. ⁴⁹Tásiha, macaetemajiricavacapapuca ena machamusuvanahi. Máichapapuca eta piesta, tinahacavapa téra macachanevacahi ena macutiqueneana téraarahiana, téniricapa. ⁵⁰Tásiha, vaipa manecapau-chavahini te títecapapa ema máquenu. Machimaracapa ema empleado eta mamapachichijisiraipa eta máimahaqueneana. ⁵¹Eta tacahe, ema máquenu macavanairipinapa náestacayare muraca. Tájina najapanuhini, tayanapane máiyahainepuca, macapitiquiahechavainepuca éma. Tásiha, machu ácutihini ema maca empleado máurirahahi, machu ecaquipaica-sisami eta te yucu infierno.

**Emá Jesús máimicutichina ena diésqueneana
amaperuana esenachichana**

25 ¹Puiti nuvaraha nímicutichinaheyare nayehe ena tíuchucuhanaya ticachanenuanayare eta néjasihaya eta návacureya, énapa ena vahi ticachanenuanaimahi. Ena nani nacutihi ena diésqueneana esenachichana amaperuana. Ticuchapanahi ena araimanayare, nácapirayare te nasamapa eta náitecapiraya. Tiámauchavavacapaipa eta namicahuana lámparinana. ²⁻⁴Ena cincoqueneana, téchemarahianahi. Tiámauchavavacapahi eta nabotellana eta aceite natseruvapahi. Ena apamuriana cincoqueneana-hivare máechemarairahana mapanererureana. Vahi námauchavapahina eta nahaceiteyarehi. Tásiha, tájinapa naviyahini. ⁵Tacahe, vahi náitecapavanehini ena araimana. Navarahaipahi tímacana éna. Tavehapa eta ichapu, tímacanapa. ⁶Tacahe, te enumuhupa yati nasamapa ema tipiaracahi. Ánipa macahe: “¡Nárajapa ena araimanayare! ¡Yare iácapa!” nacahepa. ⁷Técheputanapa namutu ena esenachichana. Náetupiricapa eta namicahuana. ⁸Tásiha, ena cincoanavare tiájicuvacaipahi eta namicahuana. Tiyaseserecanapa eta aceite. Ánipa nacahe: “Ecatajicahavi ecajihavi eta eyehe aceite, taicha tiájicuvacaipahi eta juca vimícahuana, vémahaequenehaipa” nacahepa. ⁹Énaserá ena cincoqueneana najicapapa: “Vahi víjaracahémahi machu véchuriaca víti apanava. Vahi várataimahi. Tiúripána eyana evachareca eta ehaceitena” nacahepa. ¹⁰Tásiha, tiyananapa tivacharepananayarehi eta aceite. Eta nayerevapahi, títecapananecha ena araimanayare. Tisiapanapa te tajuhe te távihayarehi eta piesta. Náehicapa ena cincoana natseruvanahi te távihayarehi eta piesta. Tacahe, ticaeratapa eta tapaja. ¹¹Te tiyerepa, títecapanapa ena apamuriana esenachichana. Náehahamecapa eta tapaja. Ánipa nacahe: “Tata, tata, pivejequenehahavi. Vivaraha visiapa” nacahepa. ¹²Émasera ema arayanayare majicapapa: “Eti, ¿nájahahehipuca? Vahi nímatilhe. Németeaca vahi étina tavanaranaina eta peti” máichavacapa ema arayanayarehi.

¹³Tacahe, ema Jesús máichahavipa:

—Éti, vahi ecucuti ena máechemarairahana. Ecutiyaresera ena téchemarahiana. Ecuneuchavaicha éti, machu vahi ecunecapauchava eta jácani sácheyare eta nuchavirayare núti Manerejirunuhi ema Viya.

**Ema Jesús máimicutichinavaca ena achaneana
ticaíjaracasianahi eta maplatane ema achane rico**

¹⁴Puiti nuvaraha nímicutichinahe tayehe eta njarasiraheya eti nuchanerana eta evacurecana taicha eta táurirahi eta ecaematanea-siranuhi. Matiarahi ema achane rico. Tiyanyarehi te apana avasare. Máichuhavacapa ena mapanana mamusurana. Máíjaracapa eta maplatane.

¹⁵Ema achane máimativacahi eta náechemaraivahi ena mamusurana. Ema émana máíjaracapa cinco millone. Ema apana máíjaracapa apina millone. Ema apana máíjaracapa étana millone. Nacaejapacayare eta plata. Tásiha, ema rico tiyanapa te macaijuheyarehi te apana avasare.

¹⁶Tacahe, ema tijacapai eta cinco millone, macaemataneacapa eta plata. Macaejapacapa eta plata. Diez millonepa maicha eta maplatane eta macaejapasirahi. ¹⁷Ema apana, ema tijacapai eta apina millone, énerichuvarepa macaejapacapa eta plata. Títucavavare éma eta cuatro millone eta plata. ¹⁸Émasera ema tijacapai eta étanaichu millone, vaipa macaejapacahini eta plata. Máecarapa eta plata, mapisirahi eta macaetehahini.

¹⁹Tiyere eta mapairirisirahi ema náejaharu. Téhesera te tichavapa, mayaserecavacapa eta plata máíjararuanahi éma. ²⁰Tacahe, títucapacapa ema tijacapai eta cinco millone. Máíjaracapa ema máquenu eta máiturevahi. Ánipa macahe: “Tata, píti píjaracanuhi cinco millone eta plata. Júcahisera cinco millonevare eta táejapasirahi”. ²¹Ema máejaharu majicapapa: “Tiuri, nuchicha. Tájjina táichava. Tétavicava eta piúríva. Pítauchahi eta picaemataneasirahi eta nuplatane. Puiti vahi támapurujimahi eta piúrivahi tayehe eta juca ánimurichichahi njararuvihí. Nutuparacavinapa eta camuriquene. Puiti pisiapainapa eta nuyehe. Piúrisamurereacaváinapa”. ²²Tásiha, títucapavarepa ema apana ema tijacapai eta apina millone eta plata. Máichavarepa: “Tata, júcahi eta apina millone eta plata píjararunuhi. Júcahivare eta apinavare millone eta táejapasirahi”. ²³Ema máejaharu majicapavarepa: “Tiuri, nuchicha. Tétavicava eta piúríva píti apana. Puiti, váhivare támapurujimahi eta piúrivahi tayehe eta juca ánimurichichahi njararuvihí. Nutuparacavinapa eta camuripanaquene. Puiti pisiapainapa eta nuyehe. Piúrisamurereacaváinapa”. ²⁴Tásiha, títucapavarepa ema tijacapai eta étana millone. Máichapa ema máejaharu: “Tata, núti nímativihí eta pímapanuraivahí. Piverejicanuyarehi eta táejapasirayarehi eta piplatane. Pítahacanuyarehiva eta nématanevachahi. ²⁵Eta nupisirahi nácaetehahini eta piplatane, nécarapa. Puiti, júcahi nímicahava tamutu eta piplatane”. ²⁶Ema máejaharu majicapapa: “Tétavicava eta pisunsuva, píti plújutataji. Te pímatinuhipuca eta numajapanuraivahi, nítarahahi eta apaematanevacha, téhevare pímiachahi nuverejicaviyare

eta táejapasirayarehi eta níjararuvihi nuplatane; ²⁷váhiyapa pinacapai te banco eta nuplatane. Puiti váequeneipahini puiti eta táejahacaripahini eta nuchaviraipahi”. ²⁸Tásiha, máichavacapa ena apamuriana mamusurana natiari-hiqueneanahi: “Everejica ema mácatataji eta plata. Íjaraca ema ticayehehi eta diez millone. ²⁹Taicha, mácani máituruequenehahi eta macaemataneasirava, tatuparacahi eta nímicatasiraya. Ticayeheyare camuripana. Énaserá nácani vahi náiturequenehahini eta nacaemataneasirava, ticaverjecasianayarehi eta náijaracasianahi. ³⁰Émechareca muraca ema maca musu máurirahatataji. Vahi ecujapanu, tayanapane máiyahainepuca, macapitiquiahechavainepuca. Tásiha, íáquijica eta te cuarto tamapicujuhequenepanahi” macahepa ema achane rico.

**Ena achaneana, te jena sáchezare ticayaseserehianainapa,
étapa tiámavacaya eta náitátirahi ena apamuriana,
ticaevatanainapa tayehe eta návihayare**

³¹⁻³³Te nuchava nuti Manerejirunuhi ema Viya, néjacainapa eta te nuyehe trono tacapicahuquene, Réynuina. Tásiha, névatacaya ena nuyeheana ángeleana nacurujicavacaya te numirahu namutu ena achaneana te avasareana. Tásiha, núti nunerejicavacainapa ena yátupiqueneanahi nuchanerana. Nunacainapa te nuvaure. Tásiha, ena vahi nuchanerainahini nunacainapa te sapa. ³⁴Tásiha, nuti Rey ánipa níchayare ena nuchanerana tiávihanayarehi te nuvaure: “Yare, eti íuricacareanahi manerejiruanahi ema Tata. Níjaracahénapa eta etuparahayare, ícuchihi mayehe ema Tata acane te tépanavainapa eta apaquehe. ³⁵Taicha te ímahanuhi eta nécuavahi, éti énicanuhi. Numaunepahi, éti íjaracanuhi néra eta une. Tájina nítecapihahini te nupaisihapahi, éti íjaracanuhi eta nítecapihayare. ³⁶Tájina numuirihainapahini, éti emuriachanuhi. Nucajumahi, éti ípuchapananuhi. Nucaeratahi te cárcel, éti ejirapananuhivare”. ³⁷Tásiha, ena níchuhaqueneanahi tijicapuanainapa: “Tata, ¿tájamuhu vímahavihi pécuahapahi, tásiha vénicavipa? ¿Tájamuhuvare vímahavihi pimaunepahi, tásiha víti vésichavipa eta une? ³⁸¿Tájamuhuvare vímahavihi te pipaisirana tájina pítecapihahini, tásiha, víti víjaracavipa eta pítecapihahi? Váhivare vímahavihini mamuriarevinahini, tásiha víti vimuriachavipa. ³⁹¿Tájamuhuvarehipuca picajumahi, tásiha víti vípuchapanavipa? ¿Tájamuhuvarehipuca picaeratahi, tásiha víti véjirapanavipa?” náichanupa. ⁴⁰Tásiha, nuti Rey nujicapainavarepa: “Nutupiruva numetacahe: Nútira íjaracanuhi tamutu eta ejapanuraivahi, ímicatasiravacahi ena echamuriana nuchaneranhivare, ena nani namaesachaqueneanahi najacapahini ena apamuriana ena achaneana” níchavacapa. ⁴¹Tásiha, ena tiávihanahi te sapa, níchavacainapa: “Étisera évuisiha te numirahu, eti masuapajirairahana ecaviurevanahi. Eyana tayehe eta yucu, acanevacahéna eta ecaicuñaira eta emuruiraya, máicuchihi ema íáquenuhi ema Váinaraji énapa ena majupahana ángeleanainihi. ⁴²Taicha te nécuahapahi, éti vahi íjaracanuhini eta nunica. Numaunepahi, váhivare ésichanuhini une. ⁴³Étaripa

te nupaisiranapahi, váhivare fjaracanhini eta nítecapihahini. Néchurihavare eta numuirihá, váhivare fjaracanhini numuirihainahini. Nucajumahivare, nucaeratavare, váhivare éjirapananhini” níchavacainapa éna. ⁴⁴Tacahe, éna náichanupa: “Tátachicha, ¿tájamuhu vímahavihi pécuahapahi, pimaunepahi, pipairiricapahi, mamuriarevihi, picajumapahi, picaeratahi, eta jácani vímáimicatasirávihipuca?” ⁴⁵Nuti Rey nujicapainavarepa: “Nutupiruva numetacahe: Éti, vahi ejapanunuhini, taicha vahi ájapanuvacahini apaesainahini ena nani nuchanerana emaesachaqueneanahi”. ⁴⁶Emutu éti eyanayare tayehe eta ecaicuñaiyare máitavacayare. Énasera ena nunerejiruana, matapiravareanahi. Nánavacainapa tayehe eta táurivayare eta náitaresira, máitavacayareva.

Napanerechaipahi ena tuparairucana eta nacaratasirayare ema Jesús
(Mr. 14.1-2; Lc. 22.1-2; Jn. 11.45-53)

26 ¹Te títapiricapa eta juca máimiturapianahi, máichahavipa viti máimitureana:

²—Écharichuhi éti eta apinarine sache eta Pascuáiraya. Tásiha, núti Manerejirunuhi ema Viya, ticaratacanuanainapa témetatarecanuanainapa —máichahavipa.

³Tiuri, ena tuparairucana énapa ena aquenucarohana, énapa ena escribánoana ticurujicacanaripahi te tajuhe eta mayehe palacio ema Caifás, ema corregidor. ⁴Tacahe, náechajisihapahi eta nacaratasirayare ema Jesús. Navaraha éna navayuacayarehi eta nacaratasirayare, nacapasirayarehi. ⁵Tipicavananarichuchasera. Ánipa nacahehi eta náechajiriruvahi:

—Vuíchaha vicucarataca éma achichu juca piéstairaya. Taicha camuriayarehi ena achaneana, machu tájahapuca náicharachavi taicha navarahayarehi nacatiucha éma. Vicuchapasera nayana —nacahepa.

Esu esena tíamasichahi ema Jesús te táijiyequene perfume
(Mr. 14.3-9; Jn. 12.1-8)

⁶Tacahe, ema Jesús, tiyanapa tichava eta te avasarechicha Betania. Náichuhavahi eta manisiraya te mapena ema achane ticajare Simón ema leprosoinihi. ⁷Tacahe, eta manisirahi, sucahepaipahi esu ésuna esena. Suámapahi eta perfume te bótechicha. Táetaviuchahi eta tasivachavahi. Supauchapa éma. Sujucusicapa te machuti eta táetaviurehi eta táijiyeva. ⁸Eta náimairahi ena nuchamuriana máimitureana ema Jesús, váiparinehi náuricahini eta suémepururesirahi eta tasivachaquene perfume sujucusisirahi ema Jesús. Ánipa nacahehi:

—¿Tájaha tacayema suémepurureca eta juca tasivachaquenehi perfume? ⁹Tiúripanahipucani víjararecahini eta juca táijiyemaquenehi. Vivehahini eta camuriquene plata; tásiha, vímicatasihahini ena páureana —nacahepa.

¹⁰Émasera ema Jesús máimatihí eta napanereruana. Tacahe, máichahavipa: Ésamirica esu suca esena. Tétavicavahi eta táuriva eta suíchiranuhi. ¹¹Ena páureanasami, tamutuchucha sácheana eta ecachaneravacayare éna. Ímicatayarehi te jácani ecaimahaquenérana. Nútisera vahi nánasiquenémahi eta eyehe.

¹²Eta juca sujucusisiranuhi eta perfume, sucainapucahi ésu eta sufjiyechirahi eta náquehe tayeheyarehi eta nucaecarasirayare. ¹³Nutupiruva numetacahe: Nácani ticametarairuanayare eta tiúrina echajirirucava, náechajisihayarevare eta juca suíchaquenehi esu suca esena. Témechanayare suyehe te tamutu avasareana te juca apaquehe —macahepa.

Eta máijararesirahi ema Júlassi ema Jesús

(Mr. 14.10-11; Lc. 22.3-6)

¹⁴Ema Júlassi, émarichu vichamurinihi éma vidocenénihi apóstole mayehe ema Jesús. Tiyana téchajiripanavahi nayehe ena tuparairucana. ¹⁵Ánipa máichavacahi:

—Te yátupihipuca evarahahi ecarataca ema Jesús, núti nímechaheyare. Nucamunuhisera néchayare ¿áyanayarepuca eta evachachanuyare eta nímechiraheyare eta mávirare? —máichavacapa.

Tacahe, éna nájaracapa eta treinta reale. ¹⁶Jéhevarepasera ema Júlassi matanucaipa eta máicharacayarehi eta máijararesirayarehi ema Jesús.

Ema Jesús máenimurihapa ena máimitureana

(Mr. 14.12-25; Lc. 22.7-23; Jn. 13.21-30)

¹⁷Tacahe, tútecapapa eta piesta Pascua, étaripa eta tnapuca sache eta semana vinicahi eta pan mayehere levadura. Viti máimitureana viyaserecapa ema Jesús:

—¿Távihapuca pivarahahi vácajuhe eta vétupirisiavahini eta vinisirayare eta uvesachicha eta viyeherepi? —nacahepa.

¹⁸Éma tivanecahavipa:

—Eyana tayehe eta Jerusalén, te mapena ema nímaticasare. Ani íchayare: “Ema maestro tivanecahavihi eta piyehe. Ani macahehi: Tiánehipa eta nítavirayare eta nématanehi. Te pipena eta nunisihayare eta uvesachicha eta viyeherepi, nénisihayare ena nímitureana” íchayare.

¹⁹Tacahe, tiyananapa ena máimitureana. Étapaichuhi náichahi eta máimiturapianahi. Tinahacavanapa náetupiricahi eta naniruyare tayehe eta Pascua.

²⁰Tacahe, te jena yátiquenehi ema Jesús, ténicahavipa viti dócequeneana máimitureana. ²¹Te vinicaripahi, máichahavipa éma:

—Jéhesareinehi, te etaracu éti, mararihi ema émana títjararecanuyare —máichahavipa.

²²Tacahe, víti ichaperinehi eta máimipanereresirahavihi eta juca máichirahavihi. Vimutu viyaserecapa éma:

—¿Nútichupuca, Tata, jácani? —víchavacapahi víti éma.

²³Tásiha, éma máichahavipa:

—Mácani néniruyare eta pan néchipsejiruhi te juca nuplatura, émara ema títjararecanuyare. ²⁴Tacahe, núti Manerejirunuhi ema Viya, étapaichuhi eta nacapasiranuyarehi, táitauchiravayarehi eta nuyehe eta táechajiriruvahi

eta Sagrada Escritura. ¡Páuresamisera ema t́jararecanuyare! Tiúripanaichu-hipucani vahi macuchucahini te sujuhe esu maena —máichahavipa.

²⁵Tacahe, téchajicapa ema Júlasí:

—Maestro, ¿nútipuca jácani ńjararecaviyare?

Tásiha, ema Jesús majicapapa:

—Pítisami —máichapa.

**Ema Jesús tímechahavi eta macaejasiraya eta matratune arairu
mayehe ema Maiya
(1 Cor. 11.23-26)**

²⁶Tásiha, eta vinisirahi, mavehapa eta pan ema Jesús. Mahasulupayachapa ema Viya. Mayuvetucapa, t́jaracahavivacapa viti máimitureana. Tásiha, máichahavipa:

—Eta juca neche. Enica —macahepa.

²⁷Tacahe, mavehavarepa eta vasu vérirare, mahasulupayachavarepa ema Viya. Tásiha, t́jaracahavivare. Máichahavipa:

—Era eta juca ámutu éti. ²⁸Taicha eta juca eta nítine, táepusiruvayare eta nucaepahairayare eta epecaturana emutu eti achaneana, esimutuqueneyarehi. Étarichuvare táicutiarayare eta nufirmachirayare eta arairu matratune ema Vicaiyaquene, nucaejasirayava eta matratune apaesa ámutu ejacapacare mayehe. ²⁹Nutupiruva numetacahe: Vaipa nápechavaimahi nérahivaréni eta juca tachi eta uva. Tiámainucava te táitauchavapa eta nusiápiraya eta nucavacuréraya, nucajupahairaya ema Tata Nucaiyaquene. Te jena sache, ńjaracaheya vérainapa eta aramaruama. Vicajupahainapa ema Tata.

**Ema Jesús máimereucha ema Pedro tépiyacavayare vahi máimati ema Jesús
(Mr. 14.26-31; Lc. 22.31-34; Jn. 13.36-38)**

³⁰Tásiha, eta vítanésirapa, vijirapa eta jirasare eta vihasulupayachirahi ema Viya. Te vítapiricapa, viyanapa vicaijuhe eta te huerta Getsemaní távihahi eta táemiripaisinehi eta cerro ticaijare Olivoquiji. ³¹Eta vipaisirapahi, ema Jesús máichahavipa:

—Puiti juca yati ejunijicanuyare emutu éti. Ejunaracayare. Tásiha, tútauchavayarehi eta máechajiriruvahi ema Tata eta te Sagrada Escritura: “Nísapayare nacaratata ema Pastor, nacapasirasamiyare. Tásiha, tijunaracanainapa eta uvesana macurujiruanainihi” macahepa. ³²Téhesera te néchepucapa te nécari, nínapucainapa te Galilea. Ánaqui nucuchapiaheyare éti —máichahavipa ema Jesús.

³³Tásiha, ema Pedro majicapapa:

—Tayanapanepuca, Tata, najunaracapuca ena apamuriana, nítisera vahi nujunaimahi —máichapa.

³⁴Ema Jesús máichavarepa:

—Nutupiruva numetacavi piti Pedrosami: Puiti juca yati, te tamirahui-napaichaha eta táechajisirayare eta varayu, mapahe eta pépiyasiravayare vahi pímatinu —máichapa.

³⁵ Ema Pedro macahevarepa:

—Tayanapanepuca pímicapacanu, váhiquenesera népiyacavaimahi vahi nuuimativihini, váhivare nínajiacavimahi —máichapa.

Viti apamuriana étarichuvare tacahehi eta véchajiruvahi.

Ema Jesús tiyujaraca te Getsemaní

(Mr. 14.32-42; Lc. 22.39-46)

³⁶ Te vítecapapa víti tayehe eta huerta Getsemaní, máichahavipa ema Jesús:

—Éjacachaha eta ani te juca. Ecuchapanuchaha. Núti nuyanayare ánaquipana, nuyujaracayare —macahepa.

³⁷ Mapananaichu ena mámaqueneanahi: ema Pedro, ema Juan émapa ema Jacobo. Ema Jesús, ichape eta máeñamiravahi te masamure, ticatisamurevapa. ³⁸ Tásiha, máichavacapa:

—Tétavicava eta táeñamirava muraca eta nusamure. Tavaraha ticapacanu. Ácahéchaha ani te juca. Váhisera ecuimaca. Ecauneuchanuhi —máichavacapa.

³⁹ Tásiha, tipaipanapa ánaquipanachíchahi. Tiáquipaicavapa máetipaisinapa, macaitecapa eta mamira te apaquehe. Eta mayujarasirahi, ánipa macahe:

—Tátachicha Nucaiyaquene, picatajicanupaini. Váhini tacuitauchavaini eta níchavaquenevayare. Váhini picuisapaini eta nucatajivairaya. Níjaracavaseca núti eta nítauchiraya eta pivarahaquenehi píti —macahepa.

⁴⁰ Tásiha, téchepucapa. Tichavapa eta te návihahi ena mapanaqueneana máimitureana. Máimaharinehi éna, tímacanaripa. Macajamicapa ema Pedro. Tásiha, máichapa:

—Váiparinehi ímicatacanuhini ejaneacavahini étanainahipucaini hora ácahehini. ⁴¹ Éjamiuchava. Eyujarauchava apaesaina. Eyaseaca ema Viya eta étumevaina apaesa vahi macuiturucahe ema Satanás. Yátupihinéni eta iáchanevana taratahahi ticaratacava. Étaseca eta éche máteji, vahi taratahaimahi ticaratacava —máichapa.

⁴² Tásiha, tiápechavavarepa tiyanavarepa ema Jesús. Apihepa eta mayujarasirahi. Ánipa macahe:

—Tátachicha Nucaiyaquene, váhini tacuitauchavaini eta níchavaquenevayare. Tásihasera, níjaracava núti eta nítauchiraya eta pivarahaquenehi puiti. Nísapava nacapacanu —macahepa.

⁴³ Tásiha, tichavavare eta veyehe viti máimitureana. Tímahahavipa víti vímamurihaipa taicha taveharipa eta ichapu eta viúquihana. ⁴⁴ Tacahe, mapahequenepa tichavapa tiyujarapana. Étarichuhi eta máechajirivanahi. ⁴⁵ Te tichavapa, téchajicahavipa:

—¿Iápechavapa ímaca? ¿Vuíchahapuca enaracahini? Jéhesera, puiti títecapapa eta nutuparahahi nacaratasiranuyare ena ticatianacuanahi. ⁴⁶ Ávane ema tíjararecanuyare. Échepuca. Viyana viácavavaca —máichahavipa.

Nacaratacapa ema Jesús
(*Mr. 14.43-50; Lc. 22.47-53; Jn. 18.2-11*)

⁴⁷Téchajiricavaichaha ema Jesús, macahepainecha ema Júlasí, ema vichamurinihi. Mámamurihapaipahi ena camuriqueneana achaneana suntaruana. Ticaepuchiriquianapaipahi, étapa eta nayeheana espada. Éna, vanairucanahi nayehe ena aquenucarahana. ⁴⁸Ema Júlasí, tatiarihíhi eta máicutiarayarehi eta náimatirayarehi ena suntaruana ema Jesús. Ani macahehi eta máechajiriruvahi ema Júlasí:

—Ecunenuyare. Ema nétserareruyare, éma ecaratacaya —macahepa.

⁴⁹Tacahe, ema Júlasí témeñahavapa mayehe ema Jesús. Máichapa:

—Yátiheipa, tata Maestro —máichapa.

⁵⁰Tásiha, máetserarecapa. Ema Jesús majicapapa:

—Piti nímiturevihi, ¿tájaha tímitecavi? —máichapa.

Tásiha, ena suntaruana enevanepa nacaratacáhi, napresuchapa. ⁵¹Ema émana vichamuri mavehapa eta mayehe espada. Mayuchatipaisinapa eta machaca ema mamusura ema aquenuca Caifás. ⁵²Tásihasera ema Jesús macatiuchaichucha. Ánipa maicha:

—Pinaca te tatumaramuhi eta piyehe espada. Taicha namutu nácani ticaparecanahi tayehe eta espada, énerichuvare nacaheyare, espada eta ticapacayare. ⁵³Váhipuca pecha te návarahahini núti nuyaseacahini ema Tata, puítinaichuhini macucupaicahini ena 80,000queneana ángeleana. ⁵⁴Váhisera nuvaraha nuyaseaca. Tatuparacáhi títauchavayarehi eta táechajiriruvanahi eta Sagrada Escritura eta níchavaquenevayarehi —tásiha, máichavacapa ena suntaruana—. ⁵⁵¿Tájaha tacayema ecasiña eta espada, ecaepuchiriquipaipahivare eta ecaratasiranuyare, tímicutijiricavapa námerahihini? Étayapasica cape juca tamutuhi sácheana nucachanehehi nímitucahehi tayehe eta Templo. Váhivare epatsicavahini ecaratacanuhini. ⁵⁶Títauchavahisera tamutu eta juca taicha tacahehi eta náechajiriruvahi ena profetanaini, tayehe eta Escritura táechajisihairanuhi —macahepa.

Tacahe, viti máimitureana vimutu vijunaracapa, vinaquicapa ema Jesús.

Nacatupihapa ema Jesús te namirahu ena tuparairucana
(*Mr. 14.53-65; Lc. 22.54-55, 63-71; Jn. 18.12-14, 19-24*)

⁵⁷Ena ticaratacanahi ema Jesús námapa te mamirahu ema Caifás, ema corregidorhi te jena áñohe. Natiarihivare ena escribánoana énapa ena aquenucarahana. ⁵⁸Ema Pedro, máehiequenehapahi, mayerehipahisera. Te náimisipapa, tisiapavarepa éma te tajuhe eta canchón mayehe ema Caifás. Téjacaipahi macachanevacaipahi ena suntaruana, mavarairahi máimahayarehi tájahapuca eta náicharacayarehi ema Jesús. ⁵⁹Tacahe, ena tuparairucana énapa ena aquenucarahana natanucaipahi ena tépiyaequenehanayarehi ema Jesús, navarairahi tatiarihivarehi eta tiviuchayarehi eta máepenirayare. ⁶⁰Váhisera

náichimavahini, camurianahinéni ena tépiyaequenehanahi. Tisiapanane-chasera ena apinana tépiyaequenehanayarehi. ⁶¹Ánipa nacahe:

—Ema maca achane visamahi víti eta mavarairahi máquipaica eta Templo mayehe ema Viya tacapicahuquenehi. Tásiha, máimichavayarehiji macaechepuca te mapanaquenenaji sache —nacahepa.

⁶²Tacahe, ema corregidor téchepurucainehi. Mayaserecapa ema Jesús. Ánipa maicha:

—¿Tájaha tacayema vahi pijicapavaca ena nani eta pépiyaequenehi? ¿Yátupipuca eta nacayemaquenehi? Taicha vímahavi vahi picatiuchavahini —máichapa.

⁶³Émasera ema Jesús vahi majicapavacahini. Tásiha, mápechavare mayasereca ema corregidor:

—Pímaha puiti, nuyaserecaviyare. Vahi nuvaraha pépiyahirahi. Némechavi máimahavihi ema Viya. Pátupiruva pimetacahavi te yátuphipuca pítiquenehi Cristo, Machichaquenevihi ema Viya —máichapa.

⁶⁴Tacahe ema Jesús majicapapa:

—Yátupi núti Cristonuhi. Nuti Manerejirunuhi ema Viya. Tásiha, numetacahayare eta apana. Járájapaya eta sácheyare ímahanuyare eta néjasirayare te mavaure ema Viya máitupajijíruvaquenehi. Ímahanuyareva núti eta núcupaisirayareva násihairayare te anuma, támiranuyarepahi eta úcaji —macahepa.

⁶⁵Tacahe, ema corregidor eta masamirahi, tisemarinehi ichape.

Tivetsayujiacavapa eta mamuiriha eta masemanevahi. Tásiha, macahepa:

—¡Tétavicavaipa eta maviurevahi ema maca taicha macaechahihi ema Viya! ¡Puiti émaquenepa visama éma tépiyacavahi Machicha ema Viya! ¡Váipa tácomesa vitanucahini ena testígoanainahini! ¡Puiti esamaripa éti eta juca macayemaquenehi! ⁶⁶¿Tájaha vícharacayare puiti ema maca? —macahepa.

Tásiha, najicapapa éna:

—¡Ticaviurevapa! ¡Étaina táimicapaca! —nacahepa.

⁶⁷Tacahe, náehavacapa ema Jesús. Nátutuquichapa. Náehamirahavare.

⁶⁸Tásiha, náichapa:

—Vímahasejicacha, te yátuphipuca pítihí Cristo. Te pijarauquipuca, pímatihaviyare nájahhipuca ema téhamirahavíhi —nacahepa.

Ema Pedro tépiyacavapa vahi máimati ema Jesús
(Mr. 14.66-72; Lc. 22.56-62; Jn. 18.15-18, 25-27)

⁶⁹Tiuri, ema Pedro, matiarihichahahi eta te canchón. Téjacaipahi tiásacavahi. Tacahe, sucahepaipahi esu mavanara ema corregidor. Suímahapa éma. Tásiha, suíchapa:

—Németeaca pítirichu nímiture eñi Jesús eñi ticavasahi te Galilea —suíchapa.

⁷⁰Émasera majicapapa:

—Vahi nímati ema péchajisihaquenehi. ¿Távihapuca pímatinenuhi píti? —máichapa.

⁷¹Tásiha, mavarahapa tiúchucavaneyarehini. Suímahavare esu apana vanaraca. Suíchavacapa ena natiarihiqueneanahi:

—Eñi ñica achane éñirichu ñichamuri eñi Jesús Nazareno. Nímahahi ñicachanepahi —suíchavacapa.

⁷²Tiápechavavarepa ema Pedro téchajica, ánipa macahe:

—Nujuracha te emirahu. Váhiquene nímati ema píchaquenehi —macahepa.

⁷³Te tiyererehachhavarepa, náimahavarepa ena apamuriana.

Náichavarepa:

—Yátupiquene pítirichu machamuri ema maena Jesús, taicha eta péchajisira éta tímereuchavihi —náichapa.

⁷⁴Tásiha, macahevarepa:

—Máicuñacanuine ema Viya te vahi nucucahe yátupina. Váhiquenesera nímati ema achane échajisihaquenehi —macahepa.

Tásiha, enurujipa téchajicanecha eta varayu. ⁷⁵Te masamapa eta varayu, enevanepa máechahi ema Pedro eta máichirahi ema Jesús: “Te tamirahuinapaichaha eta táechajisirayare eta varayu, píti mapaheyare eta pépiyacavayare vahi pímatinu”. Tásiha, tiúchucavanepa ema Pedro. Tíyahavanepa taicha máimativanepa eta táichapevahi eta máejecapiravahi.

Námapa ema Jesús te mamirahu ema Pilato

(*Mr. 15.1; Lc. 23.1-2; Jn. 18.28-32*)

27 ¹Te tijarahipa, tiúrujicavanapa namutuyaréni ena tuparairucana énapa ena aquenucarahana. Ticaechacasipa eta náimicapasirayarehi ema Jesús. ²Nacuchucapa ticaitihapaipa eta námirapahi te mamirahu ema Poncio Pilato, ema aquenucahi prefectohiquene.

Eta macapasiravahi ema Júlassi

³Tacahe, ema Júlassi eta máimairahi eta táichapevahi eta macatajivairahi ema Jesús étapa eta nacapasirayarehi, ichaperinehi ticatisamurevahi taicha eta máejecapiravarihi. Tiyanapa máimichavapanahi eta treinta reale eta plata mavachahi nayehe éna. ⁴Tásiha, máichavacapa:

—Néjecapavahi ichape eta njararesirahi ema maca achane matapirava-requene. Nuvaraha nímichavaya eta nuvachainihi —máichavacapa éna.

Énasea najicapapa:

—Jéhepuca, vahi vecha víti. Péchaquenevaichuhi píti —náichapa.

⁵Émasera ema Júlassi máquijimirauchavacapa eta te tajuhe eta Templo návihahi éna. Tásiha, tiúchucapa. Tiyanapa. Táichavenehi eta macatisamurevairahi, tichumucavapa.

⁶Ena tuparairucana navehapa eta plata. Tásiha, nacahepa:

—Vahi táuricahini víyaracuhahini eta juca plata tayehe eta caja vinaquisirareva taicha mavachaequeneya eta máepenirayarehi ema maca achane —nacahepa.

⁷Tásiha, eta plata máimichavaquenehi ema Júlasí, napanerechaipa eta navacharesirayarehi eta apaquehe nacaecarasirareyare ena apavasanana. Eta juca apaquehe naseresirarehi ena típuarecarahiana eta yupi. ⁸Puiti éta ticajarehi “Apaquehe máitinevacha ema Jesús”. ⁹⁻¹⁰Tacahehi eta táitauchiravahi eta májurehi ema víyaraha profetaíni Jeremías. Ani tacahehi: “Navehapa eta treinta reale eta plata. Ena tuparairucana navacharecapa eta apaquehe nayehe ena típuarecarahiana. Tacahe eta juca mametasiranuhi ema Viya eta náichirayarehi eta juca” macahepa ema víyarahaini Jeremías.

Emá Pilato mayaserecapa ema Jesús
(*Mr. 15.2-5; Lc. 23.3-5; Jn. 18.33-38*)

¹¹Emá Jesús ticayaserehípa te mamirahu ema aquenucahi Pilato. Ánípa macahe eta mayaseresirahi:

—¿Jéhesarejí réyivihi píti nayehe ena pijaneanana israelítana? —máichapa. Emá Jesús majicapapa:

—Pítupiruvahi eta juca piyaseresiranuhi. Yátupíhi eta nurreyvahi —máichapa.

¹²Tásihasera, te nametauchaipa ena tuparairucana, vahi majicapavacahini ema Jesús. ¹³Tacahe, ema Pilato máichapa:

—¿Vahi péchajíuchava eta juca nametauchiravihi? Camuríhi eta píviurevana eta nayehe —máichapa.

¹⁴Émasera ema Jesús váhiquene majicapahini. Tásiha, ema Pilato máramípa eta mamajicapirahi. Váípa máitucacarehini.

Emá Pilato macavanairípa eta náetatasiraya ema Jesús
(*Mr. 15.6-15; Lc. 23.13-25; Jn. 18.38-19.16*)

¹⁵Tiuri puiti, tatiaríhi eta mayeherepí ema Pilato, te Páscuamuhuana, macaiticayarehi ema émana preso, mácani nayasearuyarehi ena achaneana.

¹⁶Tiuri, matiaríhi ema achane ticajare Barrabás, ichape eta maviurevahi.

¹⁷Eta náurujisiravahi ena achaneana, mayaserecavacapa ema Pilato:

—¿Nájahapuca ema eyasesereruyare ema nucaítiruya? ¿Émapuca ema Barrabás, téhesera émapuca evaraha nucaítica ema Jesús, ema ticajare Cristo —máichavacapa. ¹⁸(Taicha máimatiacarípahi eta nametauchahi ema Jesús ena tuparairucana taicha nacapínarúhi éma.)

¹⁹Eta máejasirahi ema Pilato tayehe eta mávacure, suímimetarecapa esu mayena: “Vahi picuimisiapava ñíyehé éñi ñíra achane matapíravare taicha yati tametasiranuhi eta nuvapure eta ñíchararacavayare éñi” sucahepa.

²⁰Énasera ena tuparairucana énapa ena aquenucarahana náimitumurihapa ena achaneana nayaseserecahi ema Barrabás, émainahini máuchucuha. Tásiha, nayaseserecapa máepenahini ema Jesús.

²¹Máechajímuríhavarepa ema Pilato, mayaserecavacapa:

—¿Nájahasica ema evarahaquenehi nucaítica? —macahepa.

Éna najicapapa:

—¡Émaina máuchucuha ema Barrabás! —nacahepa.

²²Ema Pilato mayaserecavarepa:

—¿Tájahasica nícharacaini ema Jesús ticaijare Cristo?

Éna najicapapa:

—¡Pémetatareca te crusu! —nacahepa.

²³Ema Pilato máichavacavarepa:

—¿Tájaha tacayemahi eyaseacahi eta németatasiraya ema maca?

¿Tájahasica eta maviurevahi? —máichavacapa.

Enasera tipiararemurihanavare muracapana:

—¡Pémetatareca te crusu! —nacahepa.

²⁴Tacahe, máimahapa ema Pilato eta vahi máiturucahini macatiuchahini, taicha ena achaneana tivayuchavapaichucha eta nasemaneanahi. Tacahe, máemepanapa eta une, ticasipavahupa te namirahu ena achaneana. Tásiha, máichavacapa:

—Nuvaraha nímerecava te emirahu vahi nútíparacaina eta máepeniraya ema maca achane matapiravarehi. Éti échinavayarehi —máichavacapa.

²⁵Tásiha, najicapapa namutu ena achaneana:

—Vítinarine vicatapirava, énapa ena vichichanaveana. Vítinarine taeha eta máepeniraya ema maca achane —nacahepa.

²⁶Tacahe, ema Pilato macavanairipipa nacaítica ema Barrabás. Tásiha, macavanairipipa náestaca ema Jesús; tásiha náetatacayarevare te crusu.

Nacavayuemarajipa ena suntaruana ema Jesús

(Mr. 15.16-20; Jn. 19.1-3)

²⁷Tásiha, ena suntaruana námapa ema Jesús tayehe eta náestasiha-yarehi te távirarehi eta guardia. Nachayacapa ena camuriqueneana suntaruana náumurivana. ²⁸Navejamuhiacapa eta mamuiriha. Namuriachapa eta muíriare títsime. ²⁹Náítsamemacapa eta itapepi eta majarapiyarehi náicha. Nanacavarepa te machuti. Náimicaratacavarepa eta curina te mavahu vaure, matsucurúpayahijí. Eta nacavayuemarajirahi, náepuyumirauchapajicacha. Ánipa nacahe:

—Tata, ¡pítítataji nayehevihíji Rey ena israelítana! —náichapa.

³⁰Tásiha, nátutuquichapa. Náetetuvauchapa eta matsucurupahi, náepuchisicapa tayehe. ³¹Te tamutupa eta nacaecahijirisirahi, navejamuhiacavarepa eta mamuiriha títsime. Namuirichapa eta mamuirihaichu. Tásiha, námapa tayehe eta macaetataiyayarehi.

Náetatacapa ema Jesús te crusu

(Mr. 15.21-32; Lc. 23.26-43; Jn. 19.17-27)

³²Eta napaisirapahi te calle, nácapajicapa ema achane ticaijare Simón ticavasahi te Cirene. Napamicapa éma manaracuha eta macurusura ema Jesús.

³³Tacahe, nacaitecapapa tayehe eta masihi nacaetatairare ticaijare Gólgota.

³⁴Ánaquipa náesichinehi ema Jesús eta vino tisucareama ticasiriquiama eta ipuruji. Te masamaecapa ema Jesús, vaipa mávarahahini máerahini.

³⁵Te náitauchapa eta náetatasirahi ema Jesús, ena suntaruana nasuertehachapa eta mamuiriha eta náijarajirisiracacahi. Tacahehi eta táitauchiravahi eta májurehi ema víyahaini profetaini David. Ánipa tacahe: “Tíjarajiricacanapa eta numuirihaini. Nasuertehachapa eta náijarasiricacairahi”. ³⁶Tásiha, najaneacapa ema Jesús ena suntaruana. ³⁷Te tápusi eta macurusura, tatiarihihi eta ajureca táechajisihahi eta tiviuchahi. Ani tacahehi eta ajureca: “Ema Jesús, Rey nayehe ena israelítana”.

³⁸Natiarihivare ena apinana tiámerahiana. Ticaetatanahivare te machacaya, ema émana te mavaure, ema apana te masapa. ³⁹Tásiha, ena tiánucumirauchanapahi, tépiupiusicavanapaipa eta nacaecahirapaipahi éma. ⁴⁰Ánipa nacahe:

—¡Pítitataji! Picahechajiriruvahi eta piáquipaisirayarehíji eta Templo, pirátahahivaréji pímicahava picatupihahi eta arairu Templo te mapanayarerichuhíji sache. Puiti vivaraha vímaha eta pítupajijiasiravahi, te yátupipuca Machichavi ema Viya. Piúcupaica te jara crusu. ¡Picatiuchava pítijivaina! —náichapa.

⁴¹Énerichuvare ena tuparairucana nacaecahijiricavare, énapa ena escribánoana énapa ena fariséoana, énapa ena apamuriana aquenucarahana. Náichajiricapa:

⁴²—Ema mácacacha, macahehi eta máechajiriruvahi eta marátahairahíji macatiuchavaca ena apamuriana achaneana. Tásiha, puiti váhivare marátahahini émajivainahíni macatiuchavahini eta te jara mávihahi. Te yátupinahíni Réyinafni viyehe viti israelítana, macatiuchavaipahini, ¿masi? Máucupaicaripahini te jara crusu, ¿masi? Visuapasarepaini eta vímairainahini. ⁴³Téhevare te yátupihipuca ticasínavahi me Viya, vivaraha vímaha macuchucuha éma puftinaríchu, te yátupihipuca máemunacahi éma. Taicha macahehi eta máechajiriruvahi eta machichairahi ema Viya —nacahepa.

⁴⁴Ena tiámerahiana ticaetatanahivare te machacaya, énerichuvare nacaecahivare éna apanavare.

Eta máepenirahi ema Jesús

(Mr. 15.33-41; Lc. 23.44-49; Jn. 19.28-30)

⁴⁵Tacahe, te las dócequenepa, témahapa eta sache. Timapicupa tamutu eta apaquehe. Mapana hora eta tamapicuirahi. ⁴⁶Tásiha, te las trespa sache, tipiaracapa muraca ema Jesús, ánipa macahe:

—Elí, Elí, ¡lama sabactani! —te véchajiriruva, ani tacahe: “¡Tata Nucaiyaquene! ¡Tata Nucaiyaquene! ¡Vahi picujunijicanu!”

⁴⁷Tacahe, ena natiarihiqueneanahi ena tisamanahi, ánivarepa nacahe:

—Esama ema maca achane mapiaracahi ema víyahaini profeta Elías —nacahepa.

⁴⁸Ema apana tiyanapa tijunapahi máepanapa eta machuchujiruyarehi eta tisisica vino. Máitiacapa te tiúqui curinaqui. Máimicapayacapa eta majaca ema Jesús, machuchujicayarehi. ⁴⁹Énasera ena apamuriana, ánivarepa nacahe:

—Ésamiricachucha. Vímahayare te títecapayarepuca macatiuchapana ema Elías —nacahepa.

⁵⁰Tásiha, típechavavarepa tipiaraca muraca ema Jesús. Tásiha, tépenapa. ⁵¹Tásiha, tíjahúchavapa tétsayumecapa eta cortina tayehe eta Templo. Tépanava te anuquehe, tíchecuha te apaquehe. Tiyayacarepa eta apaquehe. Étaripa eta ichapepuhiqueneana mari téjepuichavacavare. ⁵²Étaripa eta ecariana téjiacavacapa. Técheputanavarepa ena náepenaqueneana ena tisuapajirahianahi mayehe ema Viya. ⁵³Tásiha, te mapanaqueneapa sache, téhevare te táequeneapa eta máechepusirahi ema Jesús te máecari, éna apanavare tiúchucanapa tayehe eta náecariana. Tásiha, tisiapanapa tayehe eta avasare Jerusalén. Tichavanapa te napenana. Ichapemurianahi ena achaneana tímahanahi éna.

⁵⁴Tacahe, ena tijanearecanahi, émapa ema nacapítara, te náimahapa eta tayayacarevahi eta apaquehe, étapa eta apamuriana tíáramicareanahi, ichaperinehi eta napisirahi. Tásiha, nacahepa:

—Yátupiquenerichuyapa Machicha ema Viya ema maca —nacahepa.

⁵⁵Natiarihivare ena camuriana esenana. Tímararacanahi te tiyerehi. Ena nani esenana, éna téhicanahi ema Jesús. Téchapajiricanapahi ema Jesús eta mapaisirapahi te másihapa te Galilea. ⁵⁶Nacarichusera ticajuanahi eta náijaruana esu María Magdalena, ésupa esu apana María, maena ema José émapa ema Jacobo. Sutiarihivare esu mayena ema Zebedeo, náena ena nuchamurianahi ema Juan émapa ema Jacobo, apóstoleanahi.

Nacucupaicapa te crusu ema Jesús, náecarayarepa

(Mr. 15.42-47; Lc. 23.50-56; Jn. 19.38-42)

⁵⁷Matiarihivare ema achane rico ticaijare José. Ticavasahi te avasare Arimatea. Émarichuhi téhichahi ema Jesús. ⁵⁸Te capererehipa, eta máimairahi máepeniraipahi ema Jesús, tiyanapa mayehe ema Pilato. Mayaseapanahi eta máquehe ema Jesús, mavarairahi máecarayare. Tacahe, ema Pilato macavanairipipa náisapahini eta náecarairaya. ⁵⁹Nacucupaicasarepa eta máquehe ema Jesús tayehe eta crusu. Náyuruacapa tayehe eta tijapuquene sávana. ⁶⁰Nanacapa tayehe eta máecari máemepiyareruhi máecariyahini ema José. Eta juca ecari, nasecajueruhi eta mari. Najihachapa tayehe eta tajitacarequene márime. Te náitauchapa, tiyananapa. ⁶¹Esu María Magdalena, ésupa esu apana María, téjacanahi éna, náimarararacaipahi eta ecari.

Ticavanahianapa ena suntaruana najaneaca eta ecari

⁶²Tásiha, te apanapa sache tiyananavarepa ena tuparairucana mayehe ema Pilato. ⁶³Náechajicapa ema Pilato. Ánipa nacahe:

—Tímitecahavihi, tata, vimetapanavi eta máechajiriruvahi ema Jesús te achanerichaha eta máechepusirayarehiji te máecari te mapanaquenénapaji sache. ⁶⁴Puiti, vivarahahi picavanairipihini náeratahini muraca eta tapaja

eta máecari, mapanainavare sache eta najaneasirayare ena suntaruana. Machu nayana te yati námechapana eta máquehe ena máimitureana. Machu nácaheriana “Téchepecaripa te máecari”. Tásiha, ena achaneana nasuapainapapuca, náimijachainapa yátupi. Tisuapacarepanainapapuca tayehe eta máichaqueneanahi te achanerichaha —náichapa.

⁶⁵Ema Pilato máichavacapa:

—Tiuri, níjaracahe ena nusuntarurana. Eyana iama. Evaneca najaneacaquenéna. Nachujichaquenéna muraca eta máecari —máichavacapa.

⁶⁶Tacahe, tiyananapa nachujichapa muraca eta ecari. Nanacapa eta táicutiaranayarehi. Tásiha, najaneacahi ena suntaruana.

Eta máechepusira ema Jesús te máecari

(Mr. 16.1-8; Lc. 24.1-12; Jn. 20.1-10)

28 ¹Te apanapa sache te tijarahichichapa eta lumíncuquenehi, tiyanapa esu María Magdalena, sucachanehi esu apana María, náimahapanayarehi eta ecari. ²Tíjahúchavapa tiyayacarehi eta apaquehe. Émahi ema ángele eta máucapaisirahi te anuma. Te máitecapauchapa eta ecari, máequehepuichapa eta mari tajihainihi eta máecari. Máejahamecapa eta mari. ³Tétavicava eta majaraivahi, tivayuhauquirahi. Eta mamuiriha, tétavicavavare eta tajapuva. ⁴Eta náimairahi ena suntaruana, tiáquipa-paicavanapa, tiyayacareanapa eta napisirahi. Tiánehini tépenaracana. ⁵Tásiha, ema ángele máechajicavacapa ena esenana. Ániapa macahe:

—Vahi ecupicanu. Núti néchahi eta etanusirapahi ema Jesús ema macaetataquenénihi. ⁶Májinaipahi eta te tajuhe eta máecari. Téchepecaripahi taicha tacachehi eta máechajiriruvahi. Yare, ímaha eta juca mávinénihi. ⁷Eyana púitinarichu, emetapanavaca ena echamurianahi máimitureana eta máechepusiraipahi tayehe eta máecari. Énerichuvare emetacavaca tiyanayare ema Jesús eta te Galilea. Ánaqui macuchapiaheyare emutu éti. Eta tímitecanuhi núti numetapanahayarehi —máichavacapa.

⁸Tacahe, ena esenana tiyananapa tichavanahi tijunaparacanapaipa eta nametasirayarehi ena nachamuriana. Tipicanapaipa, tásihasera tacachanepahi eta náurisamurevapahi ichape. ⁹Eta najunapirapahi, tíjahúchavapa tímerecava ema Jesús eta nayehe. Máechajicavacapa. Témeñahavanapa éna eta mayehe. Tépuycanapa natsiucapavachapa. ¹⁰Éma máichavacapa:

—Vahi ecupicanu. Eyana emetapanavaca ena apamuriana echamuriana nímitureanahi. Eyanayare emutu te Galilea. Ánaqui nucuchapiaheyare —máichavacapa.

Eta nametarapianahi ena suntaruana

¹¹Eta najunapirapahi ena esenana, ena suntaruana tijanearecanainihi tiyananapa éna, nametapanavacayarehi ena tuparairucana tamutu eta náimahaqueneanahi. ¹²Tacahe, ema corregidor ticurujiricapa namutu ena

apamuriana aquenucarahana, mavarairahi téchajiricavana napanerechayare eta náicharacavayarehi. Jéhesare, navachachavacapa eta camuriquene plata ena suntaruana. ¹³Tásiha, náimitucavacapa, ánipa náicha:

—Te natiarihinapuca nayaserecahe, ecaheyare: “Tiyananahi ena máimitureana ema Jesús te yátimuhu; námechapanahi eta máquehe. Ticamapuravanahi eta vímasirahi víti” ecaheyare. ¹⁴Émaripa ema aquenuca te máechapuca, vímaharinepa víti. Vitanucayare eta vivayuarasirayare, apaesa tacuíja eviurevaina éti —náichapa.

¹⁵Tacahe, ena suntaruana najacapapa eta plata navachahi. Tiyananapa. Jéhesare, étapaichuhi náechajisihapahi eta náimitucasivahi. Puíticha, ena israelítana, tanasirichuhi tacahehi eta nametarapi, te natiarihi ena tiyaserecana.

Ena Jesús mavanemurihapa ena máimitureana eta náimituresihaya te tamutu avasareana

(Mr. 16.14-18; Lc. 24.36-49; Jn. 20.19-23)

¹⁶Ene tacahehi eta viyanirahi viti óncequeneana apóstoleana tayehe eta Galilea te cerro taicha tacahehi eta mametarapihi éma Jesús.

¹⁷Tacahe, te vímahapa ema Jesús, vépuyumurihavanepa. Vimutu vitsiucapa. Natiarihisera ena vuíchaha nasuapapajicahini. ¹⁸Tásiha, ema Jesús témeñahavapa eta viyehé. Máichahavipa:

—Ena Tata te anuma tituparacanuhi núti néchayare tamutu te anuma étapa te juca apaquehe. ¹⁹Eta tacahe, eyanayare puiti epaicayare tamutu eta avasareana. Ímitucayare ena achaneana, nuchaneranaína éna apanavare. Ícachasicavacayarepahi te máijare ema Tata, nútipa nuti Machicha émapa ema Espíritu Santo. ²⁰Ímitucayareva eta nasuapiraina éna apanavare tamutu eta nímiturapianahi eta eyehe. Núti, tayanapane nuyerehehi, nímicatacaheyaresera. Níjaracahénapaipa eta nítupajijiasirava. Tamutu sácheana nucachanehevacyarehi. Váhiquene nujunijiacahémahi —máichahavipa.

Tamutupa eta juca nájuchaquenehi eta nímahaquenehi nuti Mateo.